

MATAUPU MO AUTALAVOU 2019

Aso Sa: 27 Ianuari 2019

Mataupu: UA IA I TATOU LE ATUA

Tusi Faitau: Kenese 1:26 – 28, 2:7

Fa'atalofa atu i lau Susuga i le Fa'afeagaia ma le Faletua, le mamalu o le Laulau a le Autalavou, fa'apea le ma'ave 'ese'ese o le Autalavou i ona tulaga fa'alupe. Tatou vi'ia le Atua ua aulia mai lenei tausaga 2019, ae maise o le amataina o galuega fa'a-Autalavou.

I le amataga o galuega fa'atino o lenei tausaga, e tāua lava le toe fa'amanatu o lo tatou fa'atuatuaga: UA IA I TATOU LE ATUA. O le fa'amoemoe ia avea lo tatou iloa o le **Atua auai mai**, e fai ma ala e saga fa'amalosia ai pea le soifua tautua i le Atua e ala atu i le Autalavou.

Fa'atinoga o le Mata'upu:

1. Faitau le tala ua filifilia ma sa'ili po'o a ni auala e iloa ai – **Ua ia i tatou le Atua.**

Fesoasoani mo le Mataupu:

Vaega muamua: Kenese 1: 26-28, 2:7

O lo'o finau nisi o le au su'esu'e o le Tusi Paia, e lua tala o le foafoaga – Kenese 1 ma le Kenese 2. Peita'i, ua talia lautele lava e le to'atele o tagata su'esu'e o le Feagaiga

Tuai, e tasi le tala o le foafoaga, ae fa'alua ona fa'amatalaina. O le tala muamua – Kenese 1, o lo'o fa'amatalatala au'ili'ili ai le tino mai o le si'osi'omaga i lona matagofie ae itiiti le fa'amatalaina o le taimi na fausia ai le tagata soifua. O le tala lona lua – Kenese 2, o lo'o mafuli le fa'amatalaga i le fausiaina o le tagata e pei ona finagalo i ai le Atua ae itiiti i le fa'amatalaina o le si'osi'omaga. O le uiga lea o le manatu, e tasi le tala o le foafoaga ae fa'alua ona fa'amatala.

I le tala o le foafoaga e pei ona filifilia ma faitauina: e tolu va'aiga tetele o lo'o iloa ai le Atua auai i le tagata.

1. O le tagata ua faia/created i le fa'atusa/image o le Atua.

E lua vaega tāua o lo'o ta'ua i le vaega muamua lea.

I. O lo'o fa'amatalaina e fa'apea na faia/created e le Atua le tagata i le efuefu o le 'ele'ele. O lona uiga na fai e le Atua, ae e le'i fetalai le Atua ia i ai o le tagata. O a'ao lava o le Atua ua tago atu i le efuefu o le 'ele'ele, ma na fausia ai le tagata. O le ata o le fa'asilisiliina o le tagata i le foafoaga pa'ia a le Atua. Ae o 'i'ina foi ua tatou iloa ai le finagalo o le Atua, ia mafanafana le la mafutaga ma le tagata. Ua pa'i atu ona 'a'ao e fausia le tagata, ina ia lagonaina e le tagata le mafanafana o lona alofa.

O le efuefu, o le mea e to'a i luga o le eleele (dust). O lona uiga o le pefu, le vaega lea e faigofie ona lelea i le matagi. O le pefu la i lona fa'amatalaina, o se mea e pito i le leai ose mea, (next to nothing). O lona uiga o le pefu po'o le efuefu, o se mea e laitiiti sona taua, (low value).

Mai i lena la'itiiti o lona taua, lea ua fai a'i e le Atua le mea aupito sili ona maua luga o lana foafoaga, o le tagata. O i'ina tatou te iloa ai le Silisili ese o le Atua. *O mea e fa'atauva'a ma lē aoga i le va'ai a le tagata, e mafai ona fa'atupu mai ai e le Atua se mea taua.*

II. O le fa'atusa/image o le Atua na faia a'i o le tagata. O lo'o i ai le fesili i le tusi fesili a le fanau: Po'o le a le uiga o lea mea ia foliga le tagata i le Atua. O le tali o lo'o i ai: *Ia foliga le tagata i le Atua i lana amio ia lelei i le itu fa'aleagaga.* Ua manatu nisi ua lē aogā le amio i le itu fa'aletino. Peitai, o le fa'amoemoe, a lelei ma mausali le fa'atuatua i le loto ma le agaga, e mautinoa foi le lelei o le itu fa'aletino. *O lona uiga, ia iloa i lau amio, o lau tautala, o fa'atinoga ma so'o se mea tatou te faia: Ua ia i tatou le Atua.*

2. O le mānava ola mai le Atua.

O le mānava atu e le Atua o le mānava ola i poga'iisu o le tagata, o le fa'ailoga o lona i ai lea i totonu o le tagata i aso uma. O le upu mānava e pei ona ta'ua i le tala, e uiga tutusa ma le upu Eperu o lo'o fa'amatala ai le Agaga o le Atua: "ruach". O lona uiga o le mānava ola na mānava atu e le Atua i poga'iisu o le tagata, o lona Agaga lava lea. O le ata lava lea o le i ai o le Atua i totonu o le tagata e lē aunoa.

O le mea la ua mautinoa, o aso uma lava e ola ai le tagata, o aso uma lava ia o lo'o mafuta ai ma le Atua. Se'iloga lava ua ave'ese le mānava a le Atua o lo'o i totonu o le tagata, ona fa'ato'ā iloa lea ma mautinoa ua valavala le

tagata ma le Atua. Po'o a lava la mea e fai e le tagata i aso uma e ola ai, o lo'o i ai fa'atasi lava ma le Atua. *O le fesili: o tatou fa'aaoga tataua ea le ola mai le Atua pe leai?*

3. O le pule ua tu'uina i le tagata.

O le upu pule, ua fa'auigaina o le stewardship – tausi mea. O le pule e tausi mea fa'atasi ai le tagata ma le Atua ina ia fa'atumauiina le foafoaga i lona matagofie ma ia fa'auau pea lea foafoaga mo tupulaga fai mai. E le o le pule e so'ona fai ma fa'aaoga ai le si'osi'omaga, a'o le pule e fa'atino i le loto alofa. Ia avea ai le siosiomaga e fai ma ala e ola ai le tagata i aso uma, ae lē o le fa'aaoga i le matape'ape'a ma le mana'o tele. *O fa'apefea ona tatou fa'atino le pule ua tu'uina mai e le Atua ia i tatou? O manuia ai le si'osi'omaga po ua fa'atupula'ia ai le tele o fa'amai ma fa'alavelave i nei aso?*

O nisi ia o fesoasoani mo le tatou mata'upu. Ae taua foi nisi o finagalo e fa'aali mai e le Aualavou. O le Atua auai ia i tatou e le o se mea e fou. O se fa'amanuiaga na tatou maua mai le amataga. Na afio mai foi Iesu ma toe foi atu i lona Tama, ao lana lea fetalaiga – "...fa'auta foi, ou te ia te outou i aso uma lava, e o'o lava i le gata'aga o le lalolagi" – Mataio 28:20.

O le ola i le olaga lelei i aso uma, o le fa'ailoga lea o le Atua o lo'o mafutaina i tatou, a o lo tatou faia pea o le agasala, o le ata manino lea o lo tatou matuā ile iloina o le Atua.

Fa'amanatu: E manuia galuega o lenei tausaga pe a tatou fa'atuatua i le Atua auai mai.

Aso Sa: 3 Fepuari 2019

Mataupu: O MAFUA'AGA UA TE'ENA AI E LE EFKS LE FA'ALAFOGAINA O ALOFA O ONA FAIFEAU TAUSI NU'U.

O le tasi leni o mata'upu o lo'o tele i ai tusitusiga i nei aso: O le Lafoga – INCOME TAX. O le mata'upu o leni Aso Sa, o se avanoa taua lea e fa'ailoa ai nisi o mafua'aga na fa'avae ai le finau atu o le EFKS ia taofi le fa'alafogaina o alofa o faifeau. O le fa'amoemoe ia lava le silafia o tagata lolotu i mafua'aga na fa'avae ai le tete'e atu a le EFKS.

Fa'atinoga o le Mata'upu:

Tu'u pea le avanoa i le Aualavou e fa'aali ai o latou finagalo i le Mata'upu i le faia o Lafoga ma le le faia o ni Lafoga.

Fesoasoani mo le Mataupu:

O nisi nei o mafuaaga o loo fa'avae ai le tete'e atu o le EFKS i lea mataupu a le Malo:

1. E LĒ O GATUSA LE TULAFONO O LAFOGA MA TAIALA O LE TUSI PAIA:

O le talitonuga o le EFKS, e lē aofia le au sa Levī, le au fai lotu ma ositaulaga i le vaevaeina o tamaoiga, o fanua ma le tele o measina a le nuu. E faalagolago tasi lava lo latou olaga faaletino i le **alofa ma le agalelei o tagata.**

2. E FETE'ENAI LE TULAFONO TAU LAFOGA MA TALITONUGA FAA-EFKS:

(a). Talitonuga o le EFKS i le galuega faa-Faifeau Tausinuu.

I.O le galuega faa-Faifeau e leai se tapula'a (limit) o le taimi o

le galuega faa-Faifeau.

Po'o le tuneva o le po, po'o le a lava le taimi e mo'omia ai e le aulotu se galuega e tataua ona fa'atino e le faifeau, e tulai lava ma alu. E le manatu i se totogi e pei o tagata faigaluega totogi e i ai itula fa'atapula'a o galuega fa'atino. Afai e ova atu itula, ona totogi lea o le ova taimi. Ao le faifeau tausinu'u, e leai ni ona ovataimi.

II.O le Faifeau e leai se tuaoi o ona nafa fa'atino i lana galuega

fa'a-Faifeau.

O le galuega fa'a-Faifeau i nu'u ma aulotu, ua lē na o le pulela'a po'o le falesa e pei ona manatu nisi. Peitai e faia foi ana Aoga Tusi Ma'a ma Aoga Faitautusi e fesoasoani ai i le ola a'oa'oina o le tamaitiiti auā lona lumana'i. E le gata i lea ae o le a'oa'oina o le amio o le tamaitiiti ina ia pulea lelei i nofoaga faitele. O nisi o Faifeau ua tauau a a'afia soifua i le tausiga o le filemu i le va o tupulaga ma nu'u pe a o'o ina tutupu ni fa'alavelave. Ma le tele lava o isi galuega lē fa'atua'oia a le Faifeau o lo'o

faia mo le lelei o aiga, o nu'u, ekalesia ma le atunu'u.

(e). Talitonuga fa'a-EFKS e uiga i le Foa'i ma le Alofa.

O so'o se foa'i e faia e tagata EFKS, e faia ona o le suafa o le Atua. E faia ma le talitonuga, o lana faiga taulaga lea i lona Atua. Po'o se tupe, o se suāvai (umu/mea'ai) e fu'e mō le faife'au, o fa'aaloaloga i so'o se fa'alavelave e faia, pe totogi le pasese o le faife'au i le pasi ma le va'a ma so'o se foa'i lava e faia, e faia ona o le suafa o le Atua, o Lē āna le galuega. O foa'i nei ua fa'aigoaina, o le ALOFA, ae lē o se totogi.

3. A'AFIAGA O GALUEGA A LE EKALEZIA ONA O LAFOGA

O le alofa o le faife'au o le alagātupe lea o lo'o maua ai nai seleni auā le tausiga o aiga ma fa'atino ai le tele o nisi fuafuaga. Peita'i, o le mātau i le gasologa o le galuega fa'a-faife'au, o le alofa o lo'o fa'atino ai taulaga a le faife'au mo le Ekalesia. O le sene, o le atina'e, o saōga tupe e faia a le Ekalesia, o saōga tupe a le Pulega ma le Matagaluega. O teutusi e 'ave ma le tofi lauga pe afai e i ai se tofi lauga o le aulotu. O taulaga 'ese'ese a le Ekalesia ma isi lava mea e mo'omia ai e le faife'au le tupe, o le alofa e fa'amoemoe i ai. Pe afai e fa'alafoga le alofa o lona uiga, ua tu'uititia foi le tupe maua e le faifeau mai le agalelei o tagata aua ana faigataulaga mo le Atua.

4. SAO MA LE LAGOLAGO A LE EFKS I LE MALO.

E i ai le talitonuga e le itiiti le sao taua o faifeau ma le EFKS i le malo ma ana galuega fa'atino. O lenei sao ma le lagolago e aofia ai itu uma o le atina'eina o le malo. E amata mai lava i totonu o aiga, o nu'u, o Ekalesia, o fale faigaluega ma so'o se mea, e iloga lava le sao taua o le EFKS ma le lagolago a le EFKS i le malo o Samoa.

Ua manatu nisi e tatau ona faia lafoga a faife'au ona o mau nei mai le Tusi Paia: Mareko 12:17, Mataio 17: 24-27. Peitai e manatu le EFKS e le feso'otai le INCOME TAX ma le lafoga –tax o lo'o talanoa ai tusi nei o le Tusi Paia.

(A.) "Ave mea a Kaisara ia Kaisara, ave mea a le Atua i le Atua" – Mareko 12:17

O le lafoga o lo'o talanoa ai le fuai'upu lenei o le 'poll tax –head tax'. E le o se income tax e pei ona naunau mai le malo. O le poll tax e lafo ia Kaisara o le fa'ailoga o le pule ua ia Kaisara e pulea ai tagata ma fanua ma so'o se mea. Pe afai e fa'aaoga le text lea e fa'avae ai le finauga a le malo, ona fesili lea; po'o ai Kaisara. Afai o le malo, ona manatu lea e le taliaina foi lea faiga. O Samoa e faavae i le Atua. E le pulea e se tagata se toatasi.

(E.) Mataio 17: 24-27

O le lafoga o lo'o talanoa ai Mataio o le Temple Tax e le o se Income Tax. O lafoga e lafo aua le tausiga o le Malumalu. E lua mea taua e tatau ona tulimata'i e tagata uma:

1. Na lafo le Temple Tax a Iesu ona o le manatu o le lotu Iutaia, o Iesu e le o se ositaulaga, o le atali'i o Iosefa. Ana

iloa ma manatu ifo o Iesu o le ositaulaga e pei ona tatou talitonu, e mautinoa e le faia se Temple Tax a Iesu.

2. O le lafoga a Iesu na maua mai le faiva o Peteru, e le o se totogi o Iesu.

O nisi ia o mafua'aga ua fai ma fa'avae o le tete'e atu o le EFKS i le fa'alafogaina o ona faife'au tausi nu'u. Ae taua le fa'aali pea o lagona o tagata lolotu e uiga i lenei mataupu.

Faamanatu: O le alofa mo le faife'au e faia i le loto malie ae le o se totogi o lana galuega.

Aso Sa: 10 Fepuari 2019

Mataupu: O FAIFA'ATOAGA O AGAGA

Tusi Faitau: Mareko 4: 1-20

O le tala filifilia o lenei Aso Sa, o le tala i le fa'ata'oto a Iesu e uiga i le lulu saito ma 'ele'ele e fa na pā'u'ū i ai fatu siato. Fuaiupu 14-20 o lo'o fa'amatala au'ili'ili ai e Iesu le uiga moni o le fa'ata'oto. O le fatu saito o le upu a le Atua(f.14). O 'ele'ele e fa: *auala, papa, vao tuitui, 'ele'ele lelei*, ua faatusa i ai le 'ese'esega o loto o tagata fa'alologologo i le upu a le Atua (15-20). I le fetalaiga a Iesu, o lo'o manino ai mo i tatou le au faitau, *o le ola ma le fua lelei o le fatu saito e fa'amoemoe i le palapala o lo'o pa'ū i ai.* Fetalai Iesu, ua na o le 'ele'ele lelei na tupu

ma ola lauusi ai le fatu saito. Ao isi 'ele'ele e tolu: *auala, papa ma le vao tuitui*, e le i ola fatu saito na pā'u'ū i ai.

O le mata'upu o le Aso Sa lenei, o le a tatou fa'aaogaina ai le fa'ata'oto lea a Iesu, o se mea moni o lo'o tupu i le soifuaga lenei. O le a tatou talanoa ai o i tatou o FAIFA'ATO'AGA MO LE MALO O LE ATUA. O lea ua fa'asino mai le fanua tatou te galulue ai. Ao itu'aiga palapala ia o lo'o i ai le fanua: *auala, papa, vao tuitui, 'ele'ele lelei*. E le mafai ona tatou 'alo ese ai i le fanua lea. O le sini ma le fa'amoemoe o le tatou galuega faifa'ato'aga, ia ola lauusi le fatu saito ma ia fua mai i ni fua e lelei.

Fa'atinoga o le Mataupu: Talanoaga/Fetufaa'i

1. Vaevae le Autalavou i vaega e fa. Tofu le vaega ma le 'ele'ele e galulue ai.
2. Ia talanoa le vaega, po'o a ni auala fa'a-faifa'ato'aga e mafai ona ola ai le fatu saito i luga o 'ele'ele nei e fa.
3. Mae'a le 10 minute ona toe fa'amaopoopo lea ae talanoa fa'atasi.

Fesoasoani mo le Mata'upu:

1. O le mea lava ua mautinoa, e lē faigofie ona ola ni fatu saito 'ele'ele e tolu e pei ona ta'ua e Iesu. Ae mautinoa le ola i le 'ele'ele lelei. Peita'i, o le fa'ata'oto a Iesu, ua aumai ai se ata manino o le soifuaga lenei tatou te i ai. E to'atele i latou e fa'alogologo i le upu a le Atua, ae to'aititi i latou e fa'alogologo, talia ma fa'atino ia Upu o le Ola.

2. O le tatou galuega fa'a-tupulaga talavou, o le tala'i atu lea o le finagalo o le Atua. O le fa'amoemoe, ia aua lava ne'i muta le tatou galuega tala'i. Tusa lava po'o le auala, papa po'o le vao tuitui, ia tala'i pea. Tapena e i tatou o faifa'ato'aga ni auala ma se faiga ina ia liua ai nei 'ele'ele leaga e avea ma 'ele'ele lelei e tupu ma ola ai le fatu saito. O le 'ele'ele lelei foi, e tatau lava ona tatou taumafai e fa'atumau lona lelei.

3. Afai o le auala, ia suatia le 'ele'ele ma tu'u i ai le fa'alelei 'ele'ele.

4. O le papa, ia la'u i ai le palapala ina ia mautinoa ua ola ai ni la'au.

5. O le vao tuitui, ia sasa ma suatia le vao tuitui ina ia mafai ona ola ai le fatu saito.

6. E fa'apenā foi i le 'ele'ele lelei, ia mautinoa le tumau o lona lelei. Ia fa'aauau pea ona galuea'ina ma fa'amamā i aso uma.

O le mea mautinoa, e le o se galuega e faigofie. E le o se galuega foi e tasi se vaiaso pe tasi se masina e fai ai. O le fa'amoemoe ia fua mai le fa'ato'aga i ni fua lelei. E mo'omia ai le onosa'i 'aua le fiu, fa'amaoni ma galulue fa'atasi ina ia tau lau o le fa'amoemoe.

Fa'amanatu: Finau ia tele ni agaga e liua i lau galuega faa-faifa'ato'aga mo le Atua.

Aso Sa: 17 Fepuari 2019

Mataupu: E 'AI LILILO FAIVA O FITI (Ua fa'amanuiaina le pologa).

Na taunu'u Iosefa o se pologa i Aikupito. Peita'i, o le amataga lea o fa'amanuiaga a le Atua mo ia e pei ona iloa i ana miti na fa'amatalaina i lona aiga - Kenese 37:5-8. E tele fa'amanuiaga na maua e Iosefa i Aikupito, ao lona tulaga – PULE o lo'o fa'amauiaina i le:

1. Kenese 39:1-6 –pule i le aiga o Potifara lē fa'afeao i 'au a Aikupito –

2. Kenese 41: 39-45 –pule i le aiga o Farao, ua na o le nofoalii e sili ai Farao ia Iosefa

3. Kenese 45:7 - pulu i lona aiga

O le fesili tele o lo'o fia tulimata'i i le tatou mata'upu:

O ni fua'fuaga/auala fa'a-le-Atua lea na taunu'u ai Iosefa i Aikupito po'o ni auala fa'a-le-tagata?

Fa'atinoga o le Mata'upu:

1. Ia su'esu'e ma sa'ili'ili le Autalavou i le tala'aga atoa o Iosefa – Kenese 37 -45, ma fa'ailoa ni va'aiga e lagolagoina ai le fesili ua tu'uina atu po'o le mau foi e te'ena ai le fesili.

Fesoasoani mo le Mata'upu:

I le aotelega o le va'ava'ai i manuia o Iosefa e pei ona fa'amauiaina i lona olaga talavou, e peisea'i o le inosia ma le fa'atau ese e ona uso o se pologa, ua ni auala fa'a-le-

tagata na faia peita'i, o lo'o va'ava'alua ia faiga ma auala fa'a-le-Atua ina ia taunu'u mai i Aikupito i le nu'u e tino ai lona tulaga PULE i tagata e pei ona iloa i lana miti.

O nisi nei o va'aiga na tutupu i le olaga o Iosefa e manatu le mata'upu, o ni faiga fa'a-le-tagata na va'ava'alua ma faiga fa'a-le-Atua e fa'ataunu'u ai fa'amanuiaga mo Iosefa:

(1) O le fa'atonuga a lona tama e asi ona uso o lo'o leoleo i le vao – Kenese 37: 32.

E to'atele le au su'esu'e o le Tusi Pa'ia, o lo'o fesiligia pe aisea ua mafai ai e Iakopo ona tuli lona atali'i e pele ia te ia e asi ona uso i le vao. O le fesiligia o le fa'atonuga a Iakopo e fa'avae i nisi nei o mafua'aga.

1. O lea ua iloa lelei e Iakopo, o Iosefa o se atali'i e inosia e ona uso, ona o lona alofa fa'asili ia te ia fa'atasi ai ma ana miti na fa'amatalaina. E lē taumate o lo'o sa'ili'ili e le au uso se auala e fa'ao'o ai se leaga ia Iosefa.

2. O Iosefa o le atali'i e pele ia te ia, a'o lea ua tuli to'atasi i le vao. Ao le alu to'atasi i le vao e lē o se galuega faigofie. E tele manu fe'ai e ono lamatia ai le ola. I le ma le isi, e le o mautinoa po'o fea tonu e aga'i i ai Iosefa. Aua o le galuega fa'a-leoleo mamoe e lē tumau i se mea e tasi. E feoa'i solo i le vao e sa'ili ni vao lelei mo manu. O fea lava e maua ai le vao lelei, o i'ina foi e malolo ai. O lona uiga, e le mautinoa le vave ma le tuai ona toe foi mai o Iosefa.

3. O Iosefa ua na o se tamaitiiti. E le tatau ona alu na o ia i le vao.

O nisi ia o mafaufauga o lo'o fa'avae ai le fesiligia o le fa'atonuga a Iakopo i lona atali'i e pele o Iosefa. Peita'i, o le vaipanoa lea ua manatu ai le mata'upu, o le fa'atonuga mo Iosefa o se avanoa na fa'aaogaina e le Atua e tatai ai Iosefa i ona manuia o lo'o fa'atalitali mai. O le isi itu taua o le tala lea; o le ola usiusita'i o Iosefa i le fa'atonuga. O le mea mautinoa, ua iloa e Iosefa le inosia o ia e ona uso, e le faigofie le alu to'atasi peita'i, na faalogo ma usitai i le fa'atonuga a lona tama.

E to'afia ni talavou e pei o Iosefa le fa'alogo ma usita'i i le fa'atonuga ae tu'u lona loto?

(2) O le fautuaga a Reupena – Kenese 37: 22

O le taupulepulega sa faia e le au uso, ia fasioti Iosefa. Peita'i o Reupena na fautuaina le au uso, e aua le fa'amaligiina le toto, ae tu'u ia te ia i se lua/pu i le vao ae aua ne'i o'o i ai se lima. O le fesili tele, o Reupena o le tasi o le au uso o lo'o 'ino'ino ia Iosefa. A'o lona suia o le taupulepulega ua faia, o se auala lea na mafai ai ona fa'asaoina le ola o Iosefa mo le taunu'u atu i Aikupito. I le soifuaga lenei, e seāseā ona fa'aalia se manatu pei o Reupena. Se'i vagana le tagata ua i ai le Agaga o le Atua, e amata mea i auala e maua ai le filemu.

E to'afia ni talavou e pei o Reupena le amata mea i ni faiga e fa'atupu ai le filemu?

(3) O le fa'aaogaina o tagata fa'atau oloa i le ala – Kenese 39:1-6

O le au fa'atau oa na latou fa'atauina atu Iosefa ia Potifara. E le o tele ni tala e uiga ia Potifara. Peita'i o lo'o ta'ua lona loto fesoasoani ma le alofa ia Iosefa i se taimi vave e ui o ia o le Aikupito ao Iosefa o le pologa. O le alofa o Potifara ia Iosefa na fa'aeaina ai Iosefa e fai ma pule i lona aiga. O le alofa o le ta'ita'i i se pologa e le o se mea e maua gofie, se'ia vagana se ta'ita'i ua talitonu i le Atua.

(4) O le tautū uaina sili a Farao – Kenese 41: 9

O le tautū uaina sili a Farao na ia manatua le atamai o Iosefa na fa'amatala ai a la miti ma lē e sili i mea e fai ai mea'ai a'o i ai i le falepuipui. Na taunu'u le fa'aeaina o le tautū uaina ae oti lē ua sili i mea e fai ai mea'ai. O le mea taua i lenei vaega o le tala, o le manatua e le tautū uaina o Iosefa ma lona agalelei ia te ia.

E to'afia ni talavou e pei o lenei tautū uaina le manatu alofa i ē na agalelei ia te ia?

O nisi ia o fa'atinoga fa'a-le-tagata e manatu le tatou mata'upu, na va'ava'alua ma faiga fa'a-le-Atua ina ia taunu'u manuia o le Atua ua fa'ailoa i a Iosefa e ala i le miti. Na lilo i manatu o Isaraelu/Iakopo ma lana fanau e fa'aeaina Iosefa i ni fa'amanuiaga fa'apea. Ao le uiga lea o le manatu autu - E 'AI LILILO FAIVA O FITI. E le taumasina le iloa o le tagata ma le finagalo o le Atua. O a fo'i faiga a le tagata e taumafai e 'ave'esea ai fa'amanuiaga a le Atua mo le tagata ua fa'amanuiaina, e lē mafai ona tino mai. Aua e fa'amaoni le Atua, e lē oge

auala foi le Atua. E mafai foi e le Atua ona fa'aaoga o mea e fa'atauva'a i le tatou va'ai e ala mai ai ana fa'amanuiaga. O le fa'amalosi, ia fa'amaoni ma onosa'i i le soifua tautua o lo'o i ai. O a lava tiute ma faiva o galulue ai, ia tatou fa'amaoni, aua e auala 'ese'ese lava fa'amanuiaga a le Atua. E 'AI LILILO FAIVA O FITI – O le finagalo o le Atua, e le o le loto lea o le tagata.

Fa'amanatu: E fa'aalia faiva 'ai lililo o Fiti pe a tatou fa'atuatua i le Atua

Aso Sa: 24 Fepuari 2019

Mataupu: O LE TUSI I LE EKALLESIA I EFESO

Tusi Faitau: Fa'aaliga 2: 1-7

E fitu Ekalesia o loo taua i le Tusi o Faaaliga na poloai le Atua ia Ioane e tusi ni tusi ma ave i ai: **1.** Efeso –2: 1-7. **2.** Semurana –2:8-11. **3.** Perekamo - 2:12-17. **4.** Tuatira - 2: 18-29. **5.** Sarataisa - 3: 1-6. **6.** Filatelefaia - 3: 7-13. **7.** Laotikaia - 3:14-22.

Aisea ua taua ai na o le 7 Ekalesia?

O le numera 7 (number 7) o loo faaaogaina i le Tusi Paia e faamatala ai le pule aoao a le Atua i mea uma. O le faailoga – ua atoatoa. Ua faaigoaina e nisi, o le numera

paia, o le numera a le Atua. O lona uiga, ua atoatoa le pule a le Atua. E leai se manatu ua le aoga isi numera, ae o le faaaogaina lea o le numera 7 i tala o le Tusi Paia. O lona uiga, o le 7 ekalesia, 7 fetu, 7 tuugamoli ua na o se faaupuga e faamatala ai le pule a le Atua i mea uma. O le tusi i Ekalesia i fitu (7), o tusi lava ia i le lalolagi atoa.

O tusi nei e fitu e foliga tutusa uma le faataotoga (format) o loo tusia ai.

1. O le faailoaina o lē (IESU) na aumai ai le tusi.
2. O le faafetai ona o galuega lelei sa faia ma o loo faia pea e le Ekalesia.
3. O faafitauli ua aliali mai i totonu o le Ekalesia.
4. (A) O manuia e oo mai i le Ekalesia pe afai e faalogo ma talia fautuaga ua aumai.

(E) O le malaia e taunuu i ai le Ekalesia pe afai e lē talia fautuaga ua aumai.

Faatinoga o le Mataupu:

Ia fefaasoaai le Autalavou i fesili nei:

1. O le a le uiga o ia upu; *o lē ‘u’u i fetu e fitu i lona lima taumatau, o lē savali i totonu o le tuugāmōlī auro e fitu – f.1*
2. Faamatala galuega lelei sa faia e tagata o le ekalesia i Efeso – f. 2-3.
3. O le a le faafitauli ua tulai mai le Ekalesia i Efeso? f.4
4. O ai le au Nikalitali?
5. O le a le tau o le tagata e faalogo ma usitai ma le tagata faalogo ae le tali?

Fesoasoani mo le Mataupu:

O Efeso e lauiloa i le tele o lona tamaoaiga. O lona uafu sa fai ma uafu e taulai i ai le tele o vaaolooa i le atu Asia. E faaigoaina e nisi, o le ogatotonugalemu lea o fefaatauaiga i soo se oloa. E faatumulia i tagata eseese mai isi atunuu ua nonofo tumau i Efeso ona o fefaatauaiga ma pisinisi. O le toatele o tagata eseese ua avea ma ala ua tele ai ma tapuaiga eseese. E taunuu atu le galuega faaaposeolo a Paulo i Efeso, o loo logologoa tala o le atua fafine o Tiana. Ua toatele foi tagata ua ifo ma tapuai i ai. Peitai, na mafai lava e Paulo ma e na fesoasoani ia te ia, ona liliu loto o tagata i le Atua ma le talalelei.

1. *o lē ‘u’u i fetu e fitu i lona lima taumatau, o lē savali i totonu o tuugāmōlī auro e fitu - f. 1:* - o le faailoga o le pule a le Atua i le Ekalesia i Efeso ma ekalesia uma o le lalolagi –O Ia o le malamalama o tagata uma o e faatuatua ia te Ia.

2. *O galuega lelei sa faia ma o loo faia pea e le Ekalesia – f.2-3:* O galuega lelei a Efeso e pei ona taua i le tusi: o le onosai ma le tautiga e feagai ai ma talaiga sese. O le faafetai e afua i le malosi o le faatuatua o ia tagata latou te iloa ai perofeta pepelo ma perofeta a le Atua. E ui i le tele tapuaiga ma talaiga ese ua oo atu, ae o loo mau pea le toovae o tagata Kerisiano i le faatuatua na uluai fa’ailoa atu e Paulo.

3. *O le faafitauli – f. 4. – Ua tuua le uluai alofa.* O le uluai alofa – o le alofa na faavae ai le ola talitonu i le tala lelei ia Iesu Keriso. O le alofa ia Iesu Keriso, ina ua faalogo i tala

o lona soifua e pei ona talai atu i le amataga. O le faafitauli, ua tuua – *leave, leave alone, forsake* le uluai alofa. Ua avea le tuua o le uluai alofa i le tala lelei ma ala ua tauau ina faaletino ai le ola galulue o tagata. Ua tauau ai ina faasili le iloa, potu ma le tamaoaiga e atiae ai le ekalesia, ae ua faasolo ina galo Iesu Keriso le Ao o le ekalesia. O le tusi mo le ekalesia i Efeso, o se faamanatu ma se fafagu ina ia toe manatua le uluai alofa semanu e lei faagaloina. O le faafitauli ua tuua ae le faagaloina. Ae sau le aso e faagalo ai le uluai alofa lea, ona tutupu lea o faafitauli e malepe ai le talitonuga faakerisiano.

4. *Nikalitai*: o le faapotopotoga o tagata ua taofi i aoaoga a Palaamo – Faaaliga 2:14-16. E aai i meaai ua fasia mo tupua. Latou te taliaina le faitaaga ma le mulilua, i le talitonuga o le tino e agasala. O le tino e pala, e tatau foi le agasala i le tino.

5. O le apoapoaiga ua aumai, ia salamo. O le salamo ua faauigaina o le liliu atoa o le tagata tuai e avea ma tagata fou – liliu -360°. Pe afai e salamo le ekalesia ma toe foi e faamalosi ma toe faaolaola le uluai alofa i le Tala Lelei, fetalai le agelu o le a avatu ia i latou le laau o le ola – o faamanuiaga mai le Atua e le uma. Ae afai e tumau pea ona latou tuua o le uluai alofa ma faagalo i le Atua – o le aveesea le tuugamoli – faailoga o le malamalama o le Atua ua aveesea. Ae o le a ufitia i le pogisa o faanoaoga ma le malaia e faavavaau.

O le feau mo le ekalesia i Efeso o le feau foi lea mo ekalesia uma ma tagata faatuatua. O lo tatou tutumau i le

Atua ma manatua le alofa o Iesu o le Ao o le Ekalesia, o lo tatou tumau foi lea i ana faamanuiaga e tele. Ae afai tatou te o ese mai le Atua, ua na o le pogisa, le faailoga o le faanoanoa ma malaia e faavavau. Ia manuia le Mataupu.

Faamanatu: Ia manatua le uluai alofa

Aso Sa: 3 Mati 2019

Mataupu: O TALAVOU MA TULAFONO A LE NUU

O le fa'amoemoe o lenei mataupu, o se avanoa tatou te faasoa ai i lagona faa-Autalavou e faatatau i nisi o tulafono ua taua i lalo. E leai se manatu e tetee pe faaleaga ni tulafono e pei ona taua i lalo mo le talanoaga. Ao le fa'amoemoe ia saili poo fea o i ai lagona. *E taua lava le tele o sulu e maua ai figota*. E taua foi le talanoa i ia tulafono e atili malamalama ai le tagata ua malamalama ae faamalamalamaina ai le tagata o loo tuufesili pea pe aisea ua faia ai nei tulafono.

Fa'atinoga o le Mata'upu:

Ia vaevae le autalavou ini vaega se lua, ona fai lea o se finauga, i le tatau ma le lē tatau ona faia o ni tulafono a nu'u. O nisi nei o tulafono e taulai i ai le finauga:

1. E sa le le lotu. E toatasi le tagata o le aiga e nofo e fai meaai.
2. E faasa le taele/faamalu i le vai i le Aso Sa.
3. Ia Autalavou/Aufaipese tagata uma o le aiga – o matua ma fanau
4. Ia leoleoina e taulelea ma matai le tapu/sa i le afiafi o faigalotu
5. A matai loa le tagata fai le matafale lotu.
6. E tapu taaloga faatoa tatala pe a oo i aso fiafia – Kerisimasi/tausga fou.
7. O nisi o nuu e faataga ona tufi le popo ao nisi e faasaina.
8. Ua faasa e nisi o nuu ona faatuina faleoloa o Saina i o latou eleele ao nisi ua fataga.

Ia fesiligia pea le Autalavou poo a nisi tulafono e manatu e tatau ona aofia i le talanoaga.

Fesoasoani mo le Mataupu:

O tulafono/tapu i soo se faalapotopotoga o ni taiala ia ua faataoto aua le manuia o tagata uma o lea faapotopotoga. E 'ese'ese uma lava nu'u ma a latou faiga fa'avae, ma le fa'atinoga o a latou foi tulafono. E i ai lava tulafono e tutusa uma ai nu'u. Ae e i ai foi tulafono e 'ese'ese ai le isi nu'u mai le isi nuu.

Peitai, ua avea o se faafitauli i nei aso le faia o tulafono ma ala e saili ai le manuia o le tagata lava ia ae lē mo tagata uma. O nisi o tulafono ua faia ma le fa'amoemoe ia faasalaina ai se toatele ae manuia ai le toaitiiti. *Silasila ane i lo tatou lotoifale i tulafono ua faia pe le o vaaia ai ia*

ituaiga tulafono. Tulafono e manuia ai isi ae tigaina ai isi tagata.

O tulafono, e le ni mea fou na fa'atoā faufau ina ua o'o mai misionare i Samoa. O le mea lava ua leva ona fa'atino e Samoa ma ona tagata, po'o tua'ā ua lago mau mai tia. E mulia'i omai misionare ma le Tusi Paia, ae ua leva lava ona ola ma soifua Samoa i tulafono. Pau a lea o le mea, ua fenumia'i le tulafono i nuu i le taimi nei, ona ua tele le malamalama, ma ua taumafai lava le tagata ia e fa'aopoopo i ai ma sana ia foi tulafono, e fua i le mea o lo'o mana'o i ai lona loto e fa'atino.

Esoto 20 o loo faamauina ai tulafono na tuuina e le Atua ia Mose mo le taitaina o lona nuu. E ese mai i tulafono e 10 na ave e le Atua ia Mose, ae na i ai foi ma nai faaopoopoga o ia tulafono ua suia e le tagata ina ia faamalieina lona manao. O le mafuaaga lea o le teena e Iesu o le tele o tulafono o loo tautau atu e le au Farasaio ma le au Tusi Upu ia te Ia. Silafia lelei e Iesu, e ese le fa'amoemoe o faia ai le tulafono.

Fetalai Iesu, ua ou sau e faataunuu le tulafono. Faimai Iesu, po'o le a lava le tele o na mau tulafono, e tasi lava le tulafono e ao ona tausia e tagata uma, o le tulafono o le alofa. *“Alofa i le Atua, alofa i le tuaoi”*.

Pau a lea o le tulafono na finagalo le Alii e ao ona tausia ma aloa'ia. Aua a alofa le tagata i le Atua, nate faia le finagalo o le Atua. A alofa foi le tagata i le tuaoi, nate le faia lava se mea e afaina ai lona tuoi.

O tulafono uma e faavae i le ALOFA, o tulafono na e manuia ai tagata uma. Ae afai e fai le tulafono ona o le matapeapea ma le faasausili, o le malaia lona iuga.

O le Ali'i o Iesu, na ia tausia lava lena tulafono sili i lona atoatoa e tatau ai. O le ala lea o lona maliu ma lona toetu manumalo, ina ia fa'asaoina mai i ta'ua mai i le a'afia ai i le malaia e fa'avavau, ona ua ta le tausia tulafono a o tatou nu'u, ae o lo ta tete'e lava lea i le tulafono a le Atua.

Faamanatu: Ia faavae a tatou tulafono i le ALOFA

Aso Sa 10 Mati 2019

Mataupu: 'AUA LE IFO I TUPUA

Tusi Faitau: Esoto 20:3-6

O le tupua o loo taua i le mataupu: o le "idol". Ua faamatalaina o se faatusa/ata o se tagata poo se manu e vaneina (carved) i se ogalaau, ma'a poo uamea – metals – silver or gold ae tapuai ma ifo i ai. O le tulafono e lua (2) – Esoto 20:3-6, o loo taoto ai le fa'amoemoe o le Atua ina ia aua, aua lava nei suia e se isi mea/faatusa lona tulaga mai le loto o le tagata faatuatua. O le finagalo o le Atua, ia aua lava nei tosina o tatou loto ma faasili se isi mea/faatusa i loo le manatu atu ia te Ia, o le Atua o le lagi

ma le lalolagi. Ia tau lava o le Atua e faasilisiliina i manatu o tagata uma o le foafoaga.

E i ai le talitonuga e le o vaaia i lo tatou atunuu le matuia o lenei mea o le ifo i tupua e pei ona molimauina i ata tifaga ma tala mai isi atunuu. *Peitai, o a lava faatinoga, faaupuga ma nisi lava mea ua tosina i ai o tatou loto ae faamulimuli le Atua, o tupua mea na i le manatu o le mataupu.*

O le faamamafa o le mataupu, o mea ua tosina i ai o tatou loto ma iu ai ina faamuamua mea ia i nisi o taimi ae faamulimuli le Atua ma lana Tala Lelei.

Fa'atinoga o le Mata'upu:

1. Ia fesiligia pea le Autalavou pe latou te lagolagoina le faauigaina o le upu – tupua ma lona faaaogaina e le tatou mataupu.

2. O le lisi lenei o nisi o faatinoga ma faiga e mafai ona taua o tupua pe afai e ave i ai le faamuamua ae faamulimuli le Atua.

- Taaloga, sailiga tupe - gambling, meaa, tapaa, 'ava malos, pepelo ma isi uiga inosia i luma o le Atua.
- faigaluega i le Aso Sa
- Poto
- Malosi
- Galuega
- Tupe (ma nisi tupua e finagalo i ai le Autalavou)

O le fesili mo le tatou talanoaga: *O le a se fofo o lea faafitauli mo i tatou te tupulaga talavou?*

Fesoasoani mo le Mata'upu:

O le tala ua filifilia o le tala masani i le tulafono lona lua (2) o tulafono e sefulu na tuuina ia Mose mo le taitaiina o le nuu o le Atua. Ao i ai Mose i le mauga, na auautasi Isaraelu ina ia faia se tupua e ifo i ai, ona latou fai lea o le povi auro e fai ma faatusa/ata ae tapuai ma ifo i ai.

I le vaavaai ma le susesue i le tala, *ua toesea le tamaoaiga o Isaraelu ma ua faamativaina ona o le fia fai tupua i luma o le Atua.*

- O le tupua auro na fausia i tamaoaiga o Isaraelu na omai ma i latou mai Aikupito. Ua latou faapotopoto auro ma mea feilafi uma ae fai ai le tupua. E uma ae le faiga o le tupua ua leai ni auro ma ni mea feilafi. Ua toesea foi lo latou tamaoaiga. Aua na o ese mai i Aikupito ma le tamaoaiga e tele. Ae ina ua latou manana'o i so latou atua e tapua'i i ai, na fa'aaogaina ai le tamaoaiga lea na omai ma latou, e fau ai le tupua.
- O le i'uga o le tupua auro na fa'atama'ia e le afi, ina ua susunuina e Mose. Ua maumau ai auro ma le tamaoaiga ma fausia ai le tupua ma ua faamativaina.

O aafiaga ia na maua ai Isaraelu, o aafiaga foi ia tatou te oo i ai pe afai tatou te fai tupua i luma o le Atua: E toesea le tamaoaiga ma iu i le faamativaina.

Talavou, e taua lo tatou iloa o le Atua moni. O tupua, o mea ia ua taina ma fausia mai i o tatou loto, ma ua fai ma atua ua na sui tulaga i le Atua moni o le na faia i tatou. O le fautuaga, va'ai tama'i atua na e ave'ese, leaga e mativa

ai lo tatou ola fa'a-le-tino, ma lo tatou ola fa'a-le agaga. Ae va'ai a'e i le Atua moni o Lē na foafoaina mea uma, ma na ave'eseina mai i tatou mai le pologa i le agasala, e ala i lona lava alofa tunoa na ala mai ia Iesu Keriso.

O le feagaiga i le va o le mauga ma le vanu, faimai e fa'aea e le vanu le mauga, ae fa'ainu e le mauga le vanu. O le a le uiga o lea mea? Aua foi a e alu ifo i le taele o le vanu, ma tilotilo ae i le mauga, o le matuā maualuga lava. Ae a maualuga se mauga, o le tele foi lea o le suavai nate pu'ea ma fa'atafe ifo i le vanu. Ae o le ata lava lea o le va feagai ai o le tagata ma lona Atua, e pei ona finagalo ai le Atua. O le iloa e le tagata ona ifo ma tapua'i i le Atua, o le fa'ateleina lava lea o le vi'iga o le Atua. Ae o le tele o le vi'iga o le Atua e maua atu i le tagata, o le tele foi lea o ana fa'amanuiaga nate fa'amaligi mai mo ia.

Faamanatu: Aua e te fai tupua i luma o le Atua

Aso Sa: 17 Mati 2019

Mataupu: O LE TUSI I LE EKALEZIA I SEMURANA

Tusi Faitau: Fa'aaliga 2: 8-11

O le Ekalesia lona lua lea mai Ekalesia e fitu e pei ona tusia tusi ma ave i ai – o le Ekalesia i Semurana.

Faatinoga o le Mataupu:

1. Faitau le tala ua filifilia ma tali i fesili ua tuuina atu i lalo:

a. O a upu o loo faamatala ai Iesu ao le a foi lona uiga?

e. Faamatala le uiga o le f.9

i. Faamatala le uiga o le f.10.

o. Faamatala faamanuiaga mo e faalogo ma usitai i le fautuaga mai le tusi.

Fesoasoani mo le Mataupu:

Talaaga o le aai o Semurana:

O loo iloga tala o Semurana i le tele o tapuaiga i atua mamate na faatuina ai:

1. O le tapuaiga i le atua faapaupau o Cybele, ua taua o le ‘Tina o atua’ ma Dionysus poo Bacchus.

2. O le fale tapuai na fausia faapitoa mo le tapuaiga i le atua fafine o Roma.

3. O le fale tapuai na faia faapitoa mo tapuaiga e faamamalu ai le Emeperoa o Tiberius – 26 C.E.

Peitai, i le lotolotoi o nei tapuaiga i atua mamate, sa i ai foi le au Kerisiano, o e ua talia le Tala Lelei ia Iesu Keriso. O le faafitauli tele sa feagai ma tagata Kerisiano o Semurana o sauaga faasaga ia i latou ona o lo latou faatuatuga – Persecution. O ia sauaga o loo tautaua ai se tasi o tama na

fasiotia faamaturu ai e suafa ia Polycarp. Ina ua fesiligia Polycarp pe tumau pea lona faatuatua ia Iesu ao le'i fasiotia o ia, na tali ai lenei tama e faapea: *"E valu sefulu ono tausaga na ou auauna atu ai i le Alii, ma na te faaseseina lava au, e faapefea la ona ou upu leaga i lo'u Alii ma le Faaola?"*

Fesili mo le Autalavou: Afai o oe o Polycarp, o le a sau tali i le fesili a le fitafia?

F. 8 – O tusi i ekalesia e fitu, e eseese lava faaupuga o loo faamatala ai Iesu. O nei faaupuga e i ai lona fesootaiga ma le aano o le tusi. Mo le tusi i Semurana, ua faamatalaina Iesu: *o lē muamua ma lē mulimuli, o lē na oti, a ua ola mai.* O le faafitauli tele o loo feagai ma tagata lotu i Semurana o le sauaina ona o lo latou talitonuga ia Iesu Keriso (Persecuted). E le o se mataupu e faigofie ona maua sona tali mautu. Peitai, o le faamatalaina o Iesu, o le na aumai ai le tusi, ua fai lea ma faamalosi i tagata faatuatua, ina ia tumau pea i le faatuatuga o loo i ai. Aua o Iesu, o loo muamua ma mulimuli ia i latou. E tausia pea i latou e oo a i taimi o faigata. O a foi tiga e oo i ai le au Kerisiano, ia faatuatua pea e le aunoa. Aua o le sauaina ma le oti, ua manumalo ai Iesu Keriso.

➤ O le tusi ua tusia mo Semurana, o se faamalosi lea mo le au Kerisiano ina ia tumau pea i lo latou faatuatuga e ui o loo taufaafefe atu le tele o sauaga mo i latou. O le sauaina o le au Kerisiano o se faafitauli tele lea o loo feagai ma tagata i aso uma ae vaavaalua i le utiuti o le faasoa poo le mativa – f.9.

- ‘...*ma lou mativa – a ua e tamaoaiga...*’ - O le aai i Semurana o loo faamauina o se aai e tele lona tamaoaiga, peitai, o le tele lava o nei tamaoaiga e maua mai auala piopio. O le tulaga mativa o loo i ai tagata o le Ekalesia, o le faailoga lea o le lē auai po o le lē aafia (not involved) o tagata lotu i faiga piopio ma faiga faapaupau o loo tamaoaiga ai isi tapuaiga. O lona uiga, ua malilie lava i latou e mativa i la le tino, ae ia faia le amiotonu mo le Atua.
Fesili: Ae a i tatou le Autalavou o fea e faamuamua: o le Tala Lelei poo le tupe mai auala sese?
- F. 10 –O le faamalosi ua aumai: *Aua lava e te fefe i mea o le a e tiga ai....o mea tiga o le a feagai ma le au faatuatua e aofia ai le lafoina i le falepuipui. O loo faamatalaina i latou e faia ia faiga i le au faatuatua – o tiapolo/poo faiga faatiapolo. O loo faasino lea faaupuga i le tagata e fouvale i le finagalo o le Atua.*
- O le i ai o le au Kerisiano i le fale puipui o se tofotofoga lea mo i latou mo le umi e 10 aso – *Silasila i le Tanielu 1:12-15 o loo faamauina ai faamanuiaga o le tagata faatuatua e lavatia le 10 aso o le tofotofoga.*
- *‘Ia e faamaoni seia oo i le oti, ona ou avatu ai lea ia te oe o le pale o le ola’, ...e lē afaina lava o ia i le oti faalua’...taui lea o tagata faatuatua o le ekalesia i Semurana pe afai latou te lavatia tiga ma faigata ua tofotofoina ai lo latou faatuatua.*

E pei lava ona silafia, o tusi i Ekalesia e fitu, o tusi lava ia mo Ekalesia uma o le lalolagi. O le feau momoli mo Semurana, o le feau foi lea mo i tatou le tupulaga talavou. O nei aso, ua le masino le tele o auala o loo faafefe ai lo tatou faatuatua ia Iesu Keriso. Peitai, o lea ua faamalosi ma toe faamalosi mai lenei tala. Ia tatou faatuatua pea i le Atua.

Faamanatu: O Iesu Keriso o lē muamua ma lē mulimuli, o lē na oti, a ua ola mai.

Aso Sa: 24 Mati 2019

Mataupu: AISEA UA LĒ TALIA AI TAMA’ITA’I E AVEA MA FAIFEAU FAAU’U MO LE EFKS?

O le tasi lenei o mataupu e faaleiloga le tuufesilisili pea i ai o le toatele. Aemaise lava o i latou o loo finauina le aia tutusa o tagata uma - gender equality. O le taimi nei, e i ai tapuaiga ua latou talia fafine e avea ma faifeau. O le a le aafia isi tapuaiga i le tatou mataupu. Ae o le a faasino lava lenei mataupu i le tatou Ekalesia EFKS. O le fa’amoemoe, ia aoao mai lenei mataupu e fa’ailoa ma faamanino atili nisi o mafuaaga o loo faavae ai le mau a le Ekalesia EFKS.

Faatinoga o le Mataupu:

1. Tatala pea le avanoa e faaali ai finagalo o le Autalavou poo ai e manatu e tatau ona avea fafine ma faifeau EFKS ao ai foi e lagolagoina le mau a le Ekalesia aoao o loo i ai – E le tatau ona avea Fafine ma Faifeau Faauuina mo le EFKS.

a. O le aotelega o mafuaaga o le talia ma le teena o fafine e avea ma faifeau i le EFKS e mafai ona faavasega i vaega tetele e lua:

1 – O mafuaaga faale-aganuu.

2 – O mafuaaga faale – Tusi Paia.

Ia manino ia vaega i finauga a vaega e lua faamolemole.

Fesoasoani mo le Mataupu:

Mafuaaga Faale-Aganuu:

1. O tamā o le ulu o le aiga, o tina e fesoasoani ma faufautua. O tina lava ia o le pae ma le auli. E faufautua ia tama pe afai e i ai ni vaega e tatau ona fa'aleleia o le galuega faafaifeau. A tatou talanoa i le tapuaiga/lotu, ona tatou iloa lea, e taua le galuega a le tina o le galuega/faletua e faufautua ma lagolago i nisi o galuega e tatau mo le manuia o le tala lelei. O le faafeagaiga/faifeau i nisi o galuega a'o le tina e tuualalo ma fa'aleleia atili. O le pine o ia manatu, o loo iloa lava i Mafutaga Tina, Mafutaga Tama, o le Aoga Aso Sa, o le Autalavou ma isi itutino o le ekalesia, o iina o loo iloa ai le taua o le galulue faatasi o le faifeau ma lona faletua. O le matau i lenei vaiata: o le faletua e peiseai e mafuli i ai le taitaiga o le –

Mafutaga Tina ma le Aoga Aso Sa. O le faifeau/faafeagaiga e taitaia le – Mafutaga Tama, Autalavou ma le Aufaipese. E ui o loo iloa lava lo laua galulue faatasi.

O le toatele foi o tina o le EFKS ua fesiligia i lenei mataupu, o le latou lava mau tauave: Ua sili le faiga lea e i ai nei. O tama e avea ma faifeau faauuina. Ao le tina e faaaauu pea lana galuega faufautua mo le manuia o le tala lelei.

2. E manatu nisi e le matagofie le vaavaai atu o le aulotu i le faifeau (fafine) o fealuai ma sona mavana ua to (maitaga). E le mamalu ai se tapuaiga i le Atua. A tulai mai foi e fai ni folafolaga ma fai le faamanatuga, e manatu lava i latou e le mamalu se tapuaiga.

3. O le molimau a le toatele o alii sa'o ma tulatoa o le atunuu, e le mamalu ni saofaiga matai pe afai e avea fafine (tina) ma matai faiupu. E ui o lea ua i ai matai fafine i nuu ma afioaga, peitai e foliga e le mamalu lava ia saofaiga pe afai e leai ni tamaloloa. O le mamalu lava saofaiga ona o matai tamaloloa. E peiseai e foliga faapena le tulai mai o le faifeau tamaloloa ma le faifeau fafine e taitai se lotu.

Mafuaaga Faale- Tusi Paia:

O nisi ia o tusi o loo faavae ai finauga a nisi o i latou e teena le avea o tina ma faifeau:

Kenese 1-2 (tala foafoaga)

Esoto 12:1-15

1 Timoteo 2: 12-13

1 Timoteo 3:2

Tito 2: 3-5

O loo tele lava tusitusiga ma finauga a le au suesue o le Tusi Paia e uiga i le avea o fafine ma faifeau i aulotu. Peitai, o loo mafuli lava le toatele i le faapea mai: e le tatau ona avea ma faifeau e aoao atu, ae tatau ona avea ma fesoasoani malosi i le galuega a le Atua– Galuega 18: 24-26, Filipi 4:2-3, Luka 8:1-3. O loo finau nisi e tatau ona avea ma faifeau. E faavae ia lagona i nisi ia o tusi o le Tusi Paia: 1. Kalatia 3:28, 2. Kenese: 1:28, 3. Kenese 2:24. Peitai, o loo finauina le eseese o context poo mafuaaga o ia tusitusiga. 1. Kalatia 3: 28 o loo talanoa i le tutusa o tagata uma i luma o le Atua e ala i lana faaolataga. 2. Kenese 1: 28 /2:24 – o aia tutusa a le fafine ma le tamaloa ona o le tino e tasi le fafine ma le tamaloa. E galulue faatasi mo le manuia o aiga, o nuu, ekalesia ma le atunuu. O loo manino lava le fa’amoemoe o le Atua, o le fafine o le fesoasoani mo le tamaloa. O a galuega e le oo i ale mafai o le tamaloa ona o le pisi ma le tele o galuega, o galuega na e faatino i le tina. E uma ae le aso, ua lelei ma manuia mea uma. Lea lava tatou te iloa i nei aso, a le galulue faatasi tina ma tama, e le manuia foi fuafuaga o aiga. Manuia le Aso Sa.

“Faamanatu: E eseese meaalofa ae tasi lava le Agaga ia”

Aso Sa: 31 Mati 2019

Mataupu: O LE LAUGA FA’AAMUIA A IESU

Tusi Faitau: Mataio 5: 3-9

Faatinoga o le Mataupu:

Tuu le avanoa e fetufaaai ai manatu ma lagona o le Autalavou e uiga i fesili ua saunia:

1. Amuia e faanoanoa, aua e faamafanafanaina i latou.
 - a. O ai o loo faasino i ai le upu faanoanoa ae aisea foi ua faanoanoa ai i latou ia?
 - e. O ai e faamafanafanaina i latou ia ua faanoanoa?
2. Amuia e agamalu aua e fai mo latou tofi le nuu.
 - a. Aisea e mafua ai ona agamalu i latou ia e taua e Iesu?
 - e. O fea le nuu lea faatatau i ai le lauga a Iesu?
3. Amuia e fia aai ma fia inu i le amiotonu aua e maona i latou.
 - a. O le a le uiga o ia upu – fia aai ma fia inu i le amiotonu?
 - e. ‘aua e maona i latou’ – o le a le uiga o ia upu?
4. Amuia e alolofa atu; aua e alofaina i latou?
 - a. E faapefea pe afai e alofa i le tagata mativa, e leai se mea e alofa mai ai ia te oe?
 - e. O ai la o le a alofa mai ia te oe?
5. Amuia e loto mama, aua latou te iloa atu le Atua.
 - a. E faapefea ona iloa le tagata loto mama?
 - e. Ae faapefea ona ia iloa atu le Atua?

6. Amuia e faatupuina le filemu, aua e taua i latou o atalii o le Atua?
- a. E faapefea ona e faatupu le filemu i le lotolotoi o tagata faatupu vevesi?
- e. Aisea ua taua ai le au faatupu filemu o fanau a le Atua?
7. Amuia e sauaina ona o le amiotonu; aua e o latou le malo o le lagi.
- a. O le a le uiga o ia fetalaiga a Iesu?
8. Amuia outou pe a latou upu leaga, ma faasaua ia te outou, ma latou tuuaina pepelo outou i mea leaga uma ona o a'u.
- a. Aisea ua upu leaga isi tagata ia i latou ia e faaamuaia i ai Iesu?
- a. O le a le taua o le tagata e lavatia ona tatali tiga o mea ia e fetalai i ai Iesu?

Faamanatu: Ia tatou faatuatua i mea ua fetalai ai le Alii aua e faamaoni o Ia

Aso Sa: 7 Aperila 2019

Mataupu: AISEĀ UA E TU'ULAFOA'IINA AI A'U?

Tusi Faitau: Salamo 22:1-15/Mataio 27:45-50

O le masina lenei o loo faamanatu ai puapuaga o lo tatou Alii o Iesu e pei ona Ia saunia ai le Faaolataga mo i tatou uma. O le mataupu o lenei Aso, o se toe faitau lea i le Salamo 22 faatusatusa i le tala a Mataio e uiga i le fetalaiga a Iesu: “Aisea ua e tuulafoai mai ai ia te au”

O le fa'amoemoe o lenei mataupu, o se toe sailiili loloto lea i le uiga o ia saunoaga a lo tatou Alii o Iesu.

Fa'atinoga o le Mata'upu:

Ia faia fa'atauvaga (debate) i le autalavou. Ia vaevaeina le autalavou i ni vaega se lua, ona fai ai lea o le fa'atinoga.

1. O le isi vaega e faitauina le Feagaiga Tuai, ona aumai lea oni o latou manatu e lagolagoina ai le latou tete'e i le autu. O le manatu o le vaega lea, e le i tu'ulafoa'iina le Ali'i e le Atua. Ta'atia le fai Salamo ae fa'aaoga puapuaga o le Ali'i e fai ai le fa'atinoga.

2. O le vaega lua, e faitau le Feagaiga Fou ona aumai fo'i lea oni manatu e lagolagoina ai la latou mau, na tu'ulafoa'iina Iesu e le Atua. E fa'amasino lava lau susuga i le ta'ita'i o le mata'upu. O le itu lava e malosi le latou finau, o le itu lea e manumalo.

Fesoasoani mo le fai mataupu:

Salamo 22: 1-15

O le vaega o le Salamo na faitauina, mai i le fuaiupu 1- i le 10, o lo'o matua manino mai ai le leai ose fa'amoemoe o totoe i le fai Salamo. Ua ia va'ava'ai atu i puapuaga ma faigata o le ola ua la fesaga'i. Ua leai se tasi o toe fiafia ma

alofa ia te ia. Ua aveesea mea uma ma ua leai sona faamoemoe. Ua o'o lava i le Atua sa fa'amoemoe i ai lona ola, ua le tali mai i sana valaau atu.

Ua iloa atu i ana upu lona tu'ulafoai'ina. *Ua fa'atusa o ia i le tuga po'o le anufe.* Aisea? Aua foi o meaola ia o le natura e leai ni vae. E fa'alagolago nei meaola i ni meafaitino malo e mafai ai ona vave ona o'o atu i se isi nofoaga. O lona uiga e ui ina ola, ae o lo'o mana'omia pea le fesoasoani mo lona saogalemu.

Ua ave fo'i lona mafaufau i tua i le taimi a'o pepe meamea. O le taimi fa'atoā ulufafo ai mai le manava o lona tina, o le vaitaimi o le lē sefe o lona ola. Aua a pa'ū lava le pepe e pa'ū lava. E le mafai ona tu pe savali. Peita'i e ui i lea le atoatoa o lona malosi, ae sa malu lava i aao o ona matua.

Lea la ua mafaufau le fai Salamo, o le ituaiga ola lea sa ia ola ai. Sa filemu ma saogalemu, aua sa fa'amoemoe lona ola i le Atua. Ae o lea ua o'o mai ona puapuaga, ua fesaga'i foi ma le oti, ae o lea ua fiu e vala'au lona Atua, ae ua le tali mai. Ua vala'au i le po ma le ao, ae ua leai lava se lavea'i. Lea la ua sa'i ai fa'apea le fai Salamo. *“Lo'u Atua e, lo'u Atua e, aisea ua e tu'ulafoa'i mai ai ia te a'u?”*

O le alaga ua iloa atu ai le leai ose fa'amoemoe o totoe ia te ia. Peita'i, e ui lava i lea le tali mai o le Atua, ae faimai lana upu, “A o oe, e paia oe”. O lona uiga, e le uma pea le fa'amoemoe o le fai Salamo i le Atua. E ui lava ina le tali mai le Atua i lana valaau atu, ae tumau pea le Paia o

Israelu, ma e tali mai lava o ia ise taimi. E ui ina matuia ma ogaoga puapuaga ua feagai nei ma ia, ae tumau pea le alofa o le Atua. Le ala lea o lona vivii i le Atua i le fa'aiuga lava o le Salamo lenei.

Ae o le alaga lea a le fai Salamo, lea foi na alaga ai lo tatou Ali'i o Iesu i luga o le satauro. E pei ona fa'amatalaina ele aufaievagelia puapuaga o lo tatou Alii, faimai ua sasaina o ia ma ua tu'ulafoa'iina o ia e tagata. I latou na ia alofa i ai ma a'oa'o atu i ai le malo o le Atua, ae o lea ua latou toe ta ma po ma feanu ia te Ia.

Faimai ua latou tu'itu'i ona lima ma ona vae i fao ma fa'atautau ia te ia i le satauro. O le ata o le to'ilalo popo ma le fa'alumaina. Ua ave'eseina le mamalu ma le malosi sa ia te ia, ma ua tu'ulafoa'iina lava o ia. Lea e pei ona fai mai ai Tavita i lana Salamo na tatou faitauina, “Ua punitia a'u e le vao tagata amio leaga; ua tu'ia e i latou o'u lima ma o'u vae. Ua latou tufatufa o'u ofu mo i latou, ma latou faia le vili i lo'u ofutino.

O lona uiga o puapuaga na o'o ia Tavita, ose valoaga lava i puapuaga o lo tatou Ali'i. Lea e pei ona tatou fa'amanatuina i lenei aso. Faimai Mataio, ua pogisa le nu'u uma, ona alaga ai lea o le Ali'i ua faapea, “Lo'u Atua e! Lo'u Atua e! Aisea ua e tu'ulafoa'i mai ai au?”

E ui o le vala'au o le tu'ulafoa'iina, ae le fa'apea ua tu'ulafoa'iina o Ia. Sa silasila mai lava le Atua ma lona mafatia, ao tautau lona alo i le satauro. E ui ina pele ia te ia lona alo e toatasi, ae na ia tu'u mai lava, e fa'atino ai le fa'aolataga. Le ala lea o le tagi o lo tatou Ali'i, e foliga

mai ua tu'ulafoa'iina o ia e lona Tama, peitai e leai sa i ai faatasi o ia ma le Atua i ona puapuaga.

A'OA'OGA:

Ia tu'u atu pea e lau Susuga i le autalavou le avanoa mo ni a latou a'oa'oga fou na maua mai i le mata'upu. Ia saunia foi e lau Susuga a le ta'ita'i ni a'oa'oga taua mo le autalavou, e fa'atatau lava i le autu ma lona taua. Aemaise lava o le fa'amoemoe o le fa'aolataga na saunia e Iesu Keriso, ina ia fa'aolaina le lalolagi. Ae o le ata manino lea o le Atua nate le tu'ulafoa'iina i tatou e ui ina tatou leiloa

.....

Aso Sa: 14 Aperila 2019

Mataupu: O LE LAUPAMA

O le Aso Sa lenei o le laupama. O loo faamanatu ai le malaga faatupu a Iesu i Ierusalem. O le tala ua masani ai i tatou. E manatu foi o loo faia ni faatinoga e nisi o Autalavou.

Ao le mataupu o lenei aso, o le toe talatalanoa ma toe sailiili i lenei Aso Faamanatu mo le Au Kerisiano. O le fa'amoemoe, ia tupu pea le iloa o le au faatuatua i le taua o lenei malaga a Iesu.

Faatinoga o le Mataupu:

O nisi ia o fesili ua saunia e tuli mata'i i ai le tatou talanoaga:

- a. O le a ni mea taua tatou te aoaoina mai lenei Aso Sa o le Laupama?
- e. O a ni lu'itau mo tatou mo le aga'i i luma?

Fesoasoani i le Mataupu:

E manatu e tele lava ni mea taua e aoaoina ai i tatou i le taua o le Aso Sa o le Laupama, ao nisi ia o mea taua o loo faamauiina i nisi o suesuega i lenei tala.

1. O Iesu le Tupu e Pule Aoao i mea uma:

E tele tala o faamalologa a Iesu, o loo manino ai le Pule Aoao a le Alii i mea uma. E oo a temoni ma agaga leaga e pule aoao ai Iesu. O le tala o le malaga faatupu na amata lava i le toe faamautu mai o le tulaga silisili ese o Iesu i le lalolagi. O Ia e Pule Aoao i mea uma. Na mafai ona iloa lea Pule Aoao i le faatonuga e aumai le asini. E le o se asini a Iesu. Ao le asini ua manao i ai le tupu.

2. Ua oo i ona ituaso:

O le tele o aoaoga a Iesu ma ana faamalologa mo e mamai, e masani lava ona vavao e Iesu i latou ua faamaloloina ina ia aua nei talaiina atu lē na faamaloloina i latou. O le fesili pe aisea e vavao ai e Iesu le faailoaina o Ia i le amataga. O le tali o loo mafuli i ai suesuega a le au popoto o le Tusi Paia, o le finagalo o Iesu, ia aua nei fevatauai tagata, ina nei o latou faasala ia te Ia ao le'i oo i ona ituaso. E moni lava na sailiili solo e le au farasaio ma le au tusi upu ni

mafuaaga e molia ai Iesu, peitai e lei matua maumaututu ni a latou tuuaiga. Ao le tietie mai o Iesu ae alalaga tagata ia te Ia, o le molimau manino lea e faamautu ai o Iesu o le tupu. E lei toe vaoia e Iesu tagata, ae ua faataga ma fiafia i le viiga ua aumai, aua ua latalata mai ona ituaso e faataunuu ai lana misiona i le lalolagi. I le ma le isi, e le'i iloa gata e le au tusiupu ma le au farasaio Iesu, aua o le asini e le o se manu e saosaoa tele e pei o le solofanua.

3. O Iesu o le Areto ma le Uaina mo le Paseka.

O loo i ai le talitonuga, e taunuu mai Iesu i lana malaga faatupu, o loo tumutumu tagata Iutaia i Ierusalema e faataunuu le Paseka e manatua ai le alofa o le Atua, na taitaiina ma faaolaina i latou mai le malosi o Aikupito. O le sauniga e omai uma ai tagata Iutaia o loo aumau i fafo atu o Ierusalema. E manatua ai foi le ituaso na laaloa ai le oti, ina ua fasiotia na o ulumatua a Aikupito ae faasao tagata Isaraelu. Faatasi ai ma nisi o vaaiga, o loo tumatila ai le alofa laveai o le Atua mo i latou. O le afio mai o Iesu, o loo aga atu e tapena le Paseka mo le Lalolagi. O lona tino o le a faamomomoina ma lona toto o le a faaligiinaa, o le areto ma le uaina ua saunia mo le Paseka. E taumamafa ma feinu i ai tagata faatuatua. E fai ma faailoga o le loto faafetai ona o le Alofa Laveai o le Atua. Faasaolotoina ai le tagata mai le pule a le agasala.

4. O Iesu o le Tupu o le Filemu.

O le tietie o Iesu i le asini o le faailoga o Ia o le tupu. Peitai, e le o se tupu e tietie i le solofanua e fai ma faailoga o le malosi faafitafita. Ao le tupu o le filemu. Na matua

manino le vaai ma le faalogo i upu ua faalupe ai: O Iesu o le Mesia. O Iesu o le Faaola o tagata uma. Peitai, o le tupu e sau i le asini, e leai ni ofu tau ma ni aupega. Ao lona lava ola ua ofoina e tau ai le taua, mo le faasaolotoina o le lalolagi agasala.

4. O le Tupu o le Manumalo.

Ao afio atu Iesu i le ala, na fola e tagata le ala i ofu ma lau o laau. O le lau laau o loo faaoga tele e tagata o le **lau pama**. O le lau pama i lona faaaogaina i le Tusi Paia, o le faailoga o le Manumalo – victory ua afio mai ma Iesu.

5. O Iesu o le Tupu o tagata uma.

O loo taua le fola o le ala i ofu/laei o tagata ma alalaga. O ofu/laei o le tasi lea aganuu taua a Iutaia ma le tele o atunuu. E iloa gofie le tagata i ona laei. O ofu pauli, o ofu talaloa ma isi lava ituaiga laei e fa'ailoa ai le tagata ma lona faasinomaga. Peitai, o le faaupuga ua aumai: ua latou fola le ala i ofu. O le faailoga o le faatauva'a o le tagata i luma o le tupu ua afio mai. O a tofiga ma valaauina, e lolo mea uma i le tupu ua afio mai.

O nisi ia o mea taua e toe faamanatu mai i lenei Aso Sa o le Laupama. E talitonu le manatu, o le a tele nisi mea taua e faamanatu mai e le Autalavou mo le malamalama atili o le taua o le malaga faatupu a Iesu i Ierusalema.

Faamanatu: O le malaga faatupu a Iesu na iu i le satauro.

Aso Sa: 21 Aperila 2019

Mataupu: UA TOETU IESU

E le o se mataupu e fou e lenei mataupu i le au faatuatua. Ae manatu, e taua foi le toe faamanatu ina ia saga faatumau pea lo tatou talitonu, e moni ua toe tu Iesu.

O le mataupu o lenei Aso Sa, o le a tatou sailiili ai i ni tali mo nisi o fesili o loo tuufesilisili ai nisi o tagata e uiga i le TOE TU O IESU.

Fesili mo le talanoaga:

O loo taua i le tautinoga faa-Aposetolo le faaupuga e faapea: O Lē na puapuagatia i le pule a Ponotio Pilato, sa faasatauroina, sa maliu, sa tanumia. Na oo ifo i Seoli; o le aso tolu na toe tu mai ai nai e ua oti.

1. E fia aso na maliu ai Iesu ae toe tu?
2. O le a le uiga o le faaupuga: Na oo ifo i Seoli- ao Seoli o le nofoaga o e ua faasalaina?
3. Aisea ua taua ai na o le igoa o Ponotio Pilato i puapuaga o Iesu, ao e toatele isi tagata o loo aafia ai?
4. O a nisi feau taua ua tatou maua mai le Maliu ma le Toe Tu o Iesu?

Faatinoga o le Mataupu:

Tuu le avanoa i le Autalavou e faasoa ai i fesili ua tuuina atu.

Fesoasoani i le Mataupu:

Fesili 1: O loo tuufesilisili nisi i le faitauga o aso talu ona maliu Iesu. O le talitonuga o loo i ai, o Iesu na maliu pe tusa o le itula e 3.00 i le afiafi o le aso Faraile, ae toe tu i le vaveao o le Sapati. Pe afai tatou te faitau – 24 itula i le aso, o lona uiga e le atoa ni aso se tolu. O le fesili ua pelogia ea i tatou e le Tusi Paia? O le tali e leai. O le faitauga o aso faalutaia o loo mulimuli lava i le faitauga o aso e pei ona i ai i le amataga. O le taeao ma le afiafi o le uluai aso lea. O Iesu foi na fetalai e sefulu lua itula i le aso – Ioane 11: 9.

Na maliu i le Aso Faraile ae toe soifua i le Aso Sapati. A faitau i le oso ae o le la ma le goto ifo o le la, ona atoa lea o aso e tolu.

Fesili 2: “Na oo ifo i Seoli”. Ua finau nisi ma faapea mai, po ua oo Iesu i le nofoaga o tagata ua faasalaina. Peitai, o le faaupuga – na oo ifo i Seoli, ua faaogaina e faamatala ai le faamaoni, na maliu Iesu. Aua o le finauga lea a nisi o tagata, e le i oti Iesu. Ao le faaupuga- ua oo i seoli, ua faamautu ai le moni, na maliu Iesu.

Fesili 3: E toatele i latou na taupulepule e faaoo le faasalaga ia Iesu. Peitai, o loo taua lava na o Ponotio Pilato. I le talitonuga o le au suesue o le Tusi Paia, o le igoa Ponotio Pilato ua faaogaina e manatua ai tagata uma o le malo o Roma ma taitai o le lotu i lea vaiata, o e na taupulepule e faaoo le sala ia Iesu – History in the Name ma le History of the Name. O soo se taimi lava e taua ai Ponotio Pilato, o le taimi foi lena e manatua uma ai i latou na tutupu ma pulea le malo o Roma. O augatupulaga ma

tagata na soifua i lea vaiata, e manatua uma pe a talanoa le igoa o Ponotio Pilato.

Fesili 4. O nisi o aoaoga ua maua mai le Toe Tu o Iesu:

1. O le toe tu o Iesu, ua faaleaogaina ai le Sapati faalutaia. O le mafuaaga lea ua suia ai le Aso ua faamamaluina e le Au Kerisiano o le Sapati. Ua faaaogaina le Aso na toe soifua mai ai Iesu e fai ma Sapati. Ua avea ai le Aso Sa ma Sapati e faamamalu ma tapuai ai i le Atua. O le faailoga o le Ekalesia Manumalo ma tagata Manumalo i tatou, ina ua tanumia e Iesu o tatou leaga i le tuugamau ae toe soifua manumalo mai.

2. E i ai le ola tala atu o le Oti

O le tasi lenei o tala ma aoaoga iloga i le soifua o Iesu Keriso. Ua fai lea ma faamafanafanaga i ituaso o le faanoanoa pe a oo mai. Aua manumalo Keriso, e faapena foi ona manumalo o le au faatuatua uma o e ua talia ma talitonu ia te ia i le ola e faavavau.

O nisi ia o mea taua e ao ona tatou faasoa ma talanoa ai ao tatou faamanatuina le Maliu ma le toe soifua mai o Iesu Keriso. O le fa'amoemoe o lenei mataupu, ia toe faamanatu ma saga faamanatu pea nisi o mea taua ua aoa mai ai le Toe Tu o Iesu Keriso.

Faamanatu: Tatou te manumalo faatasi ma Keriso, pe afai tatou faatuatua ia te Ia.

Aso Sa: 28 Aperila 2019

**Mataupu: 'AUA LE ANU I LAGI
(Ia tausi le va fealoaloa'i)**

O le vaiaso lenei o le a tatou talatalanoa ma toe faamanatu le taua o le va fealoaloa'i. E talitonu o se tasi lenei o uiga ma aga e tatau mo i tatou o tupulaga talavou. E le o se mataupu e fou, aua e amata mai lava i totonu o aiga ona aoaoina i tatou i le taua ma le aoga o le tausi lelei o le va fealoaloa'i ma isi.

“Aua le anu i lagi” - E maueseese lava le atunuu e uiga i lea fuaitau.

1. Ua manatu nisi o le fuaitau e mafua mai le tasi o tala e faapea: O teine e toalua e tutusa o la igoa, na alu le la tafaoga i le tasi o motu. Ua faalogo tagata o igoa o teine nei o – LAGI. O le faaigoa o teine ia ia LAGI na avea ma ala e aamu ai tagata o le nuu lea i teine ia. Ua latou faifai upu ma faapea ane, “Ai ni fanau a agelu teine ia, ua mafua ai ona faaigoa ia LAGI. O nisi ua faapea ane, “Ai lava se amioatua o teine ia ua mafua ai ona faaigoa faapea” Ma nisi lava o tala ua aamu ma inosia ai teine ia e toalua. O uiga aamu o tagata na oo ai lava i le tuufeanu ma fai nisi o uiga ua iloa ai lo latou inoino i teine ia ma o la igoa. O iina lea e maua ai le upu –ANU I LAGI...o lona uiga, o le inoino i le isi tagata.

2. Ua manatu nisi o le –ANU I LAGI, o le feanu i le lagi. Ao le lagi i le talitonuga lautele o le afioaga o le Atua. O le ANU I LAGI i le manatu o ia tagata. O le inoino i le Atua. E ui i le eseese o talitonuga, peitai, e tasi lava lona faauigaina – o le inoino, aamu, vaai maualalo ma isi lava uiga ua fai ma pine o le tuaoi tagata.

O lona uiga o le – Aua le Anu i lagi- i se isi ona faaupuga lata mai: *Aua le vaai maualalo i isi tagata, aua le inoino ma aamu. Aua le manatu faapito ma faausausili i isi tagata. O le tasi lea mafuaaga ua soli ai le va fealoalo a'i i nei aso. Ua tele le vaai maualalo ma le manatu faapito o le isi tagata i le isi tagata.*

Faatinoga o le Mataupu:

Fetufaai ma talanoa i fesili ua taua i lalo.

1. O le a le uiga o le – va fealoaloa'i.
2. O ai e tatau i ai lenei aganuu taua?
3. O le a le uiga o lea fuaitau: *Aua le anu i le lagi*
4. Saili ni Tala o le Tusi Paia o loo taua ai le taua o le tagata e fiafia e anu i lagi.

Fesoasoani mo le Mataupu:

O le mea ua mautinoa e le lelei le Anu i Lagi. Ua toe faamanatu lenei mataupu i le taua o le va fesootea ma le va fealoaloai i totonu o aiga, o le nuu, ekalesia ma soo se mea. O i tatou o tupulaga talavou e taua lo tatou faaaloalo i tagata matutua. Aua nei avea le potu ma le atamai o le talavou, e sosopo ai faaupuga ma faamatalaga i le tagata matua. Aua nei avea le lelei o galuega ma le tulaga o le

taumafai ma ala ua tausisi ai le mamalu ae galo ai le va fealoaloai ma isi tagata. Aemaise lava i tagata matutua.

O nisi foi o taimi, ua avea le masani ma mafutaga mafanafana ma isi tagata e galo ai le va fealoaloai ma le mea e tatau ona fai.

O nisi o Tala o le Tusi Paia, o loo taua ai le taua o le tagata e fiafia i anu i lagi:

1. *Kenese 9: 18-29.* O loo faamatala ai le malaia o Hamo ma lana fanau ona o le le ava i lona tama o Noa. Ua iloa e Hamo ua le lavalava Noa, ona aamu lea ma talaula i isi ona uso. Peitai, o Semu ma Iefata ua la ufiufi le faaletonu o le toeaina, ao Hamo ua aamu i lona tama. O lona iuga, o le fai ma pologa i ona uso.

2. *2 Samuelu 17: 1-23* – O le tala ia Aitofele le tulafale sa ia fautuaina Tavita le tupu. Ua oo ina sola ese Tavita ona o le matamataita o Apisaloma, ae tulai mai Aitofele ua fai lana pule. Ua foliga ai o ia ua tupu ao Tavita o lana auauna. Ua fia tupu le auauna. Ua avea le mafanafana o le la mafutaga ma Tavita, ma ala ua galo ai ia Aitofele e i ai lava le tuaoi o le tupu ma le auauna. E ui i auala na faia e Aitofele peitai na faalogo le nuu ia Ausai ma lana fautuaga. Ua faaleaoga ai le pule a Aitofele ma iu ai ina noa e ia o ia lava.

3. *Mataio 27: 3-10* - O le tala ia Iuta le faalata. Ua avea le mafanafana o le la mafutaga ma Iesu ma ala ua galo ai ia Iuta, o Iesu o le Atua. E silafia e Iesu mea uma. E oo ai loto o tagata uma. Ua ia faalata i lona matai ona o tupe.

Mulimuli ane ua salamo ae ua leai se aoga. Na iu foi i le noa lava e ia o ia lava.

4. *Esoto 14: 23-31* – O le musua ma le faatautee pea o Farao i le Atua, na iu i le sami ulaula. E lei iu i se lelei lona faatautee i le finagalo o le Atua.

Faamanatu: Aua le anu i lagi auā e lē lelei lona taunu’uga.

Aso Sa: 5 Me 2019

Mataupu: O LE TUSI I LE EKALEZIA I PEREKAMO

Tusi Faitau: Fa’aaliga 2:12-17

O le ekalesia lona tolu lea o ekalesia e fitu e pei ona poloai le Atua ia Ioane e tusia ni tusi ma ave i ai.

Faatinoga o le Mataupu:

O fesili e tatala ai le mataupu:

1. O le a le uiga o upu o loo faamatala ai Iesu i le amataga o le tusi: O le ua i ai le pelu e faatau maai ona itu ua maamaai lava.
2. O a galuega lelei a le Ekaleisa o loo taua i le tusi – f. 13
3. O le a le uiga o ia upu: ua ou iloa le mea ua e nofo ai, o i ai le nofoalii o Satani?

4. O le a le faafitauli o loo feagai ma le Ekalesia i Perekamo?

5. Faamatala le uiga – manai lilo, maa sinasina ua tusia foi i le maa le igoa fou, e le iloa e se tasi ua na o le ua maua.

Fesoasoani mo le Mataupu:

O nisi o vaaiga e iloa i Perekamo:

- O Perekamo sa faatuina ai se tasi o ofisa tutotonu e taulai i ai galuega faatino ma lona malosi faafitafita o le Malo o Roma. E ui i le tele o isi aai/nofoaga na faamautu i ai ana Pulega, peitai, o le tasi o ona ofisa tutotonu, o Perekamo
- O le aai sa faatuina nisi o fale tapuai mo nisi o atua:
 - ✓ Seu –Zeus: o le talitonuga o tagata Eleni, o Seu o le atua o le lagi, o le atua o atua uma o loo talitonu i ai tagata uma.
 - ✓ Athena – o le atua fafine e talitonu na fanau mai ai Seu (fanau mai le muaulu – forehead o Seu). E faamatalaina o le atua o le potu ma taleni i galuega taulima (handicraft) faatasi ai ma le iloa e faatino ai taua (warfare)
 - ✓ Dionysus: o le atua Eleni anamua o le uaina, gosia o le uaina, galueina o vine, fualaau fa’anatura, faitaaga masani, fale tifaga, ma fa’afiafiaga fa’alelotu. O lona igoa Roma o Pakusa. O ia o le atalii o Seu.
 - ✓ Demeter: atua fafine o le seleselega.

- E aofia i nei tapuaiga eseese tapuaiga ua faia faapitoa mo Emeperoa o Roma e faamanatu ai a latou taitaiga.
- E lauiloa foi Perekamo i se tasi o fale tusi – library iloga o le lalolagi e maua ai tusi e silia ma le 200,000 tusi faitau. O le tele o suesuega i soo se mataupu e maua uma tusi faitau i le fale tusi lenei i Perekamo.

Fesoasoani mo Fesili:

1. *O le ua i ai le pelu e faatau maai ona itu ua maamaai lava:* o le soifuaga o aso uma, a sauni se galuega tele e faia, e tataua ona maamaai pelu e faaaogaina. Aua a matatupa ma elea e leai se galuega e mafai ona faia. E faaaoga pelu maamaai ina ia mautinoa le mama ma le matagofie o se galuega o le a faia. E foliga faapea le faaaogaina o le pelu maai e faamatala ai Iesu. Peitai, o loo taua le pelu e faatau maai ona itu e lua. O le faamatalaina o le faamasinoga a le Atua e leai se isi e sao ai. O le ‘ai luma toe ‘ai tua. O le faamasinoga amiotonu e tutusa ai tagata uma. O le tusi ua avatu, o le lapataiga, ina ia iloa e le Ekalesia, ua lalata le faamasinoga a le Atua, ona o amio o loo latou faia.

2. *Galuega lelei ua faia e le ekalesia:* Ua faamauina le faafetai mo le ekalesia ona o le faatuatua o loo faaalua e ala i le taofi mau i aoaoga e faatatau ia Iesu Keriso. O loo taua le igoa- Anetipa; o se tasi o tagata faatuatua sa fai ma faaitaiga o le ola faatuatua o tagata kerisiano i Perekamo

e ui o loo fefiloi faatasi ai ma tagata e tapuai i atua mamate.

3. *O le nofoalii o Satani;* o le faaupuga lea o loo faatatau i le tele o tapuaiga ma atua mamate ua fausia ma tapuai i ai le toatele o tagata o Perekamo e pei ona taua i le talaaga o le aai.

4. *O le faafitauli – ua mulimuli i aoaoga a Palaamo ma Nikalitai:* O Palaamo – o le perofeta na fautuaina e Palako le tupu o Moapi ina ia fetuu le nuu o Isaraelu – Numera 22-24. Peitai, na fetalai le Atua ia aua nei fetuu ae faamanuia i le nuu. E lei usitai Palaamo ae na alu lava ona o le manao i tupe ma le tamaoaiga, peitai, na toe faaali i ai le agelu a le Atua i le ala. E ui i le usitai o Palaamo i le Atua, ae na tosina lava lona loto i ario ma le tamaoaiga o Palako.

Numera 25 o loo taua ai le faitaaga ma le mulilua o le nuu o le Atua faatasi ma tagata o Moapi. O le Numera 31:16, ua faamauina ai: o aoaoga a Palaamo ua mafua ai ona faitaaga le nuu. O le faafitauli lea o loo tupu i le ekalesia i Perekamo. Ua toatele i latou o loo faia le faitaaga ma le mulilua, o le faailoga o le mulimuli i aoaoga a Palaamo. Nikalitai: o tagata ua le gata ua talia le faitaaga ma le mulilua o le mea lelei, ae ua latou talia foi le aai i meaai ua fasia mo tupu mamate. O aoaoga a Palaamo ma Nikalitai, o aoaoga e tetee i aoaoga Kerisiano.

5. Manai lilo ma le maa sinsina e tusi ai le igoa fou: O faamanuiaga ia ua folafola mo le au kerisiano e faalogo ma talia le upu ua aumai. O le ‘manai’ na fafagaina ai e le

Atua le nuu ao i ai i le vao. O lona uiga, o le tagata e faalogo ma talia le upu a le Atua o le tagata foi lea na te maua faamanuiaga mai le Atua. O faamanuiaga e le oo i ai se iloa o le tagata. O le mana lilo e aumai mai le Atua i ala faaleAtua.

Maa sinasina ua tusia ai le igoa: O le maa sinasina o le faailoga o le manumalo. O nisi o faigaai tetele i Asia itiiti, ua na o i latou e umia maa papae e tusia ai o latou suafa e ulufale i le faigaai. O le faamanuiaga foi lea o le tagata e faalogo ma talia le upu a le Atua, e ulufale ma fiafia i le tausamiga ua saunia e le Alii, o le ola lea e faavavau. O le feau ua momoli i le Ekalesia i Perekamo, ia salamo ma fultua mai faiga faapaupau ma le mulimuli atu i aoaoga Palaamo. Ia filifili ma le totoa tagata uma, aua e i ai le taimi e oo mai ai le faamasinoga a le Atua, o le pelu e tau maai ona itu uma, e leai se tagata e sao ai. Ao le tagata e tumau ma faatuatua pea i le talaaiga a Iesu Keriso, o tagata faamanuiaina ia i manuia o le Atua.

Faamanatu: Ia mulimuli ia Iesu e maua ai faamanuiaga ua ia saunia.

Aso Sa: 12 Me 2019 (Aso Sa o Tina)

Mataupu: E AU LE INAILAU A TINA

O le tasi lenei o alagaupu e masani ona faalupe ai le mapuepue ma le taua o nafa faatina i totonu o aiga, o nuu,

Ekalesia ma soo se faalapotopotoga o i ai tina. “E au le inailau a tina” – o lona uiga: e mafaia e tina ona faatino o soo se galuega. E leai se manatu o le mataupu e faasili nafa faatina i nafa faatama. Aua o lea lava ua tatou iloa ma silafia, e i ai lava galuega e mafaia e tina, e i ai foi galuega e moomia ai le fesoasoani a tama. E faapena foi i tama. E moomia foi e tama le fesoasoani a tina ina ia manuia ma atoatoa nafa famatua.

O le mataupu o lenei Aso, o le a tatou sailiili ai i nisi o tina o le Tusi Paia o loo atagia i a latou galuega faatino le uiga ma le aano moni o le manatu autu – “E AU LE INAILAU A TINA”.

Faatinoga o le Mataupu:

1. Vaevae le Autalavou i vaega e lima.
2. Sailiili i tala ua taua i lalo ma saili le fesootaiga o ia tina agai i le autu – “E au le inailau a tina”
Ruta ma Naomi – Ruta 1-4: (O le tusi atoa o Ruta, o loo faamatalatala ai le mafutaga a Ruta ma Naomi. Saili mai e le vaega 1 ni vaaiga o loo iloa ai – “E au le inailau a Ruta”)
Eseta le Masiofo – Eseta 1-10: (O le tusi o Eseta o loo faamatalatala ai galuega lelei na faia e Eseta mo lona nuu. Saili mai e le vaega 2 ni vaaiga o loo i ai – “E au le inailau a Eseta”)

Apikaila le ava a Napalu- 1 Samuelu 25: 23-37

Risepa le afafine o Aia – 2 Samuelu 21: 1-14

Ana le Perofeta Fafine - Luka 2: 36-38

Fesoasoani mo le Mataupu:

1. *Ruta ma Naomi* – O le aganuu faa-Iutaia lava ia, o le manuia, tamoai ma le soagalemu o soo se aiga Iutaia, e fa'amoemoe i galuega faatino a tāmā. E pei foi o le tatou aganuu. E fa'amoemoe lava i tāmā le sailiga o le tamaoai ma le malu puipua o soo se aiga. Peitai, o le tala ia Ruta ma Naomi, ua leva oti le toalua a Ruta. Ao ia lava na tusia Naomi. O le toe foi i Peteleema ma saili solo i ni meaai mo le tausiga o aso uma, o Ruta lava na faia lea galuega tele. O le fesootai foi ia Poasa e le o se mea e faigaofie, ae na maua le lototele o Ruta e faatino ai lea galuega.

2. *Eseta*: E foliga tutusa le tala ia Ruta ma le tala ia Eseta. O galuega ia e tataua ona faia e tama na faia e Eseta. O le faaolaina o le nuu mai ona fili o se galuega e patino i tama, peitai, o le galuega tele lea a Eseta na faia. O ia na ala mai ai le faaolaina o lona nuu o Iuta.

3. *Apikaila le ava a Napalu* - O le mataupu leni o loo faamatala ai le sailiga fesoasoani a Tavita ma ona tagata na afea ai Napalu. Peitai, na teena e Napalu lea manao o Tavita ma le faaupuga na te le iloa Tavita – f. 10-12. O se tali na tupu ai le ita o Tavita, ma talaiina ai loa se taua ma Napalu–f. 13. Peitai, na fa'ailoa ai e le auauna ia Apikaila le leaga o le mea ua faia e Napalu. Na agalelei Tavita ia Napalu ao lea ua teena e Napalu le manao o Tavita. O lea na sauni ai e Apikaila meaai ma vaiinu e alu e faafetaiai ia Tavita ma talosaga i ai mo se avanoa e faasaina ai lona toalua. Na talia lelei e Tavita le galuega a Apikaila na faia.

4. *Risepa le afafine o Aia*: Ina ua fasiotia le fanau a Risepa faatasi ma isi fanau a Saulo, o Risepa na ia leoleoina o latou tino i le po ma le ao. O le galuega faatino e lei foi i le taumalulu o le po ma le vevela o le la. Aua ua leai se manu e aina o latou tino oti.

5. *Ana le Perofeta fafine*: O tausaga o Ana e 84, a o loo galue pea o se perofeta a le Atua. O lana galuega o le tatalo ma faafoi le faafetai i le Atua.

O nisi ia o tina ua filifilia ae toatela a nisi tina o loo taua i le Tusi Paia e mafai ona aofia i le tatou talanoaga o leni Aso Sa. O le fa'amoemoe, ia iloa ma malamalama i tatou le Autalavou, i le fesootaiga o ia tala ma le Alagaupu faasamoa – E au le inailau a Tina

Faamanatu: Ave o tatou ola ia aoga mo le Alii

Aso Sa: 26 Me 2019

Mataupu: O OE MA LE 'AVA MALOSI/'AVA 'O'ONA

E le fou leni mataupu i le Autalavou. O se mataupu e talanoaina soo tele ona o le ogaoga o aafiaga e oo i le tupulaga talavou pe a le faaeteete i ai. Ma e aoga tele le faamanatu pea lava pea i aso uma ma taimi uma, ina ia mataala i ai le tupulaga talavou ma aloalo mamao ese mai i le tagofia o le ava oona.

Ua masani la tatou faalogo i le faaupuga e faapea: “*e lelei le ava, ae leaga ona o le tagata lava ia*”. E foliga mai i se tasi itu ua avea lea faaupuga e fai ma alofaga (excuse) a le tagata inu ava, ae maise lava i le tagata ua avea ma ana masani le inu ava malosi. Ia tatou talanoa ma le totoa ma le manatu mamafa i lenei mataupu, ae maise lava, o le saunia o tupulaga ia ola fefefe i aafiaga o le ava oona.

Faatinoga o le Mataupu:

1. O le tatou Mataupu o lea talanoaina ai aafiaga o tupulaga talavou ini vaega se tolu ona o le ‘ava malosi:

a. O aafiaga o le tino, e. O aafiaga o le mafaufau, i. O aafiaga o le va ma tagata lautele

2. Vaevae le Autalavou i vaega e tolu: tolu le vaega ma le aafiaga e talanoa ma faailoa pe faapefea ona iloa ia aafiaga i le tagata.

3. Suesue vaega uma i aafiaga o le ‘ava malosi i le ola faaleagaga o le talavou.

Fesoasoani mo le Mataupu:

O le ‘ava malosi ua manatu nisi e lelei. Peitai, ua faamaonia le tele atu o itu e le lelei ai le ‘ava i le tagata i loo itu e lelei ai (pe afai e lelei ia te oe). Ua faamaonia e fomai, e i ai le faama’i e taua o le: ‘ALCOHOLISM’, o le ma’i e mafua mai i le maoae tele ma le faifai pea o le inu ava oona.

O mea inu uma lava e pei o uisiki - whiskey, voka - volda, pakati, pia -beer, uaina - wine etc, ua i ai uma lava i totonu

le mea ua faaigoaina o le ava-oonā (alcohol). O le ava oona o le vailaau (drug), ma ua faavasegaina i le vaega o vailaau faamoe (sedative), ma o vailaau uma e i lalo o le vasega lea o vailaau faamoe, a oo ina tele lona faaogaina, o le atili foi lea ona lagona le momoo i ai (addictive); aemaise lava, ona o le fia suia o le mafaufau ma le faalogona, pei e fiafia (mood changing effect). O le taimi e inu ai le ipu ava oona muamua lava seia oo ina amata ona suia le faalogona, ua taua le laasaga lea o le “Gafatia” (tolerance). O lea laasaga o le gafatia e eseese lava i tagata, ona o isi e fiu lava e inu e tuai ona onā, ao nisi pe tasi, lua ni ipu a ua tau i le ua.

E tolu vaega ua faavasega i ai le afaina o le tagata soifua e le ava oona:

1) O le aafia o le tino (physical).

2) O le aafia o le mafaufau (mental).

3) O le aafia o le va ma tagata lautele (social).

A. Aafiaga o le Tino –

i) Galogalo gofie mea.

ii) Ua malamalama gata ma ua faigata ona taofi se mataupu poo se vaaiga faa-le-maufaufau (impediment of concentration).

iii) Augata le faiai e suesue ma sailiili (brain fatigue).

iv) Faoa ma aveesea le faautauta ma le agavaa e fai ai se tonu i soo se mea pe foia se faafitauli.

v) Ma’ale’ale le mafaufau – itaita gofie, popole vale, fefe, ma etc. (Isi vaega o le tino) – Neura – pepe, mainiini, pe tiga, gagase ma tau le lagona le pai atu, lima, tino etc.

ATE – faatumulia i le gao, ma amata ona mate, ma ua tau le aoga le ate i le tino.

PUTA – puai ma tiga soo le manava (gastritis), papala totonu o le puta (peptic ulcer).

ATEPILI – e iloa gofie ona o le aupito sili ona mafatia le mai lea i le tiga uiga ese o le manava.

E. Aafiaga o le MAFAUFAU –

O se vaega o tagata e inu ava oona o le mnao i se fiafia ua mapu mai i se galuega, ao se isi vaega e ala ona inu ava oona ona o le fia faagalogalo o mafatiaga o le mafaufau; o le tele lava o nei mafatiaga e tupu mai i le (i) Fefe, ma le (ii)ita.

1) O le fefe e aofia ai le popole, ma le lē to'a. E fefe foi ona o le ma, ma le lagona faapea ua agasala.

2) O le ita, e mafua ona o se faamoemoe ua le taulau o se faiga le amiotonu, poo se taupulepulegale sa'o (frustration), ona tupu mai ai lea ma isi uiga e pei o le mataua, ita faamoemoe, ma le fia tauai ma sui etc.

O le natura o soo se tagata soifua lava ua afaina le to'a filemu o lona mafaufau, o le fia maua o se mapusaga mai faafitauli o le mafaufau; ma e tusa ma le 50% o tagata nei e toomaga lava i le ava oona. O le 5 i le 20 tausaga o inu ava oona pea se tagata, ona amata lea ona maua i le tulaga lea, o le mate/pe/'ivā o le mafaufau i taimi e le tagofia ai le ava.

Faataitaiga: E savalivali lelei lava ma talanoa malamalama lelei lava ao inu, ae mulimuli ane, ua na le manatua se mea e tasi o mea sa i ai, ma ni ana tala sa fai, pe o ni tala tau

faavevesi ma faalumaluma i se isi, ua matua le manatua lava.

O le laasaga mulimuli lava, o le lē sagatonu lea o le mafaufau, a ua pei e faavalevalea ma sioa, ua sesepe mata ma ua tau tevateva le savali.

O le vaega e sili ona popole i ai le mafaufau, o i latou ia a oo ina le mafai ona onosaia nei uiga (ita ma le fefe), ona le gata lea i le inu ava oona, a ua agai le mafaufau i le fia mou atu ma le olaga nei, poo le fia pule i le ola (suicidal).

I. Aafiaga o le VA MA TAGATA LAUTELE –

O le aafia o le va ma isi, e muai tino muamua lava i totonu o aiga, i le va ma le toalua ma le fanau, ma o se itu faanoanoa tele lea.

O le nonofo ma se inu ava oona ma ua mai i le **Alcoholism**, e tei lava ua agai ina fai faatauga ma amioga uma e faatusatusa i ai i ana amio. Ua faapea foi ona suia faataua ma gaoioiga uma ina ia faamalieina manaoga o le tagata mai (alcoholic).

a) Va ma le Toalua:

Ua mai ai ma le toalua ia ona o le inu ava a lona aiga; o uiga ia o lona mai:

i) E faafiti lava i tagata e le ona soo lona toalua.

ii) E misa soo; ona o le ona faalausosoo.

iii) E faataua ma fuafua mea uma a le aiga i le inu ava a Papa/Mama.

iv) E tupu ae pea le lagona e le toe mafai ona fai se suiga.

v) E taumafai e puipei le fanau mai amioga a le ona.

e) Va ma Tamaiti:

Ae maise lava i tamaiti laititi, o le a tupu:

- i) Le matua fefe.
- ii) Fai ma masani le faalogologo pe ua tai tauaimisa o latou matua.
- iii) Ai foi a fasi si o matou tina.
- iv) Faanoanoa i le tele o taimi.
- v) Pau mauualalo le taumafai .
- vi) Fia sola ese mai le aiga.
- vii) Fai toalua laititi (o se auala e alu ese ai ma matua ma le aiga).

i) Va ma Tagata Lautele:

- i) Tiai galuega ma ua le lelei i le manatu o le pule.
- ii) Mai soo (faanoi soo).
- iii) Solo i tua le faatinoina o galuega.
- iv) Ua le faatuatuaina ona o le pepelo.
- v) Lima tagovale, aemaise i mea tau tupe.
- vi) Faasoesa le aitalafu solo, ma fai aitalafu leaga.

O itu e sili ona maitau i ai ua mautinoa, o le afaina lea o le soifua sologa manuia ma le nofo lelei, ua le gata ua mai i le Alcoholism ae ua faapea foi ona aafia ai ma isi. Ae le gata i lea, o le faoa mai i tulaga tofi, i aiga, nuu, galuega, ekalesia, faalapotopotoga etc. Aemaise ai foi, ona o leni mai o le Alcoholism e le faigofie ona togofitia. E uiga ese foi, e faitogafiti isi ona uiga, ma e faafiufiu foi i tagata lautele.

FAUTUAGA

O le ma'i o le Alcoholism e aafia ai soo se tagata, o le tagata e aga malu ma loto alofa, o letagata e le migao ma le le mafaufau, o le faipule, o le mauoa, o le tagata mativa, o le tupu, o le tagata noa etc. Soo se tagata lava e mafai ona maua i le mai leni o le Alcoholism.

O le tóatele o e ua maua i leni gasegase, e taumafai lava latou e tuu le inu ava oona i nisi taimi, peitai e mafai ona tuu pe nao ni nai aso, ae toe foi lava i le inu o se (ipu) ava oona, talu ai ona o le ma'i e momoo (addictive) i ai le tino i le ava oona.

E ita tele ae tau fautua atu se isi tagata i lana inu ava oona. E inu po se pia i le taeao ona ua tau le mafai ona faia se galuega pe a le inu. E manatu ifo lava ia i lona loto, amuia tagata e mafai ona pulea le ava oona. E tiga ona utiuti se seleni e maua e le aiga, e taumafai lava e faasaosao (pe nana) se tupe aua lana pia.

A vave uma ni mea inu (ava oona) i se faafiafiaga e alu iai, e taumafai lava i se auala e toe maua ai nisi mea inu. E finau maumau tutu lava na te mafaia ona tuu lana inu ava (ae le mafai ona tuu).

Faamanatu: E tele aafiaga o le 'ava malos i lou olaga Talavou.

Aso Sa: 2 Iuni 2019

Mataupu: E MANUIA Ē MATATA’U I LE ATUA

Tusi Faitau: Salamo 128: 1 – 6

Tatou te le fesiligia le moni ma le faamaoni o lenei mataupu. O le tagata e mata’u i le Atua e manuia. E le faigofie ona maua e le tagata lenei mea o le mata’u i le Atua. A’o le fesili ua tulai mai, O le a ea lenei mea **“O le mata’u i le Alii”** a o le a le mea e tupu mai ai pe a maua e le tagata?” O se upu po o ni upu e faigofie lona faaleoina, ao lona faatinoga e faigata tele. Aua foi, o le mata’u i le Alii o le savali i ala o le Atua ma faia Lona finagalo. O le tausī i Ana poloaiga. O lona uiga e le faigofie, e tigaina ma pologa lona asaina. Ae peitai, o ia mea uma ma lona faatinoga e iloa lona foliga mai i le amio, gaoioiga, poo galuega faatino. O le tu ma le savali ma le tautala, o loo atagia ai le tagata o loo i ai lea meaalofa ma lea faamanuiaga a le Atua.

“O le mata’u i le Alii”. E faigata tele ona faatino e le tagata o ia mea i aso ma taimi uma. Ae a mafai, e pepese faatasi ma le au paia. O lenei Salamo 128, e mafai ona faatatauina i le olaga o Isaraelu. Le nuu filifilia o le Atua. Le nuu na taitaiina mai le pogisa ma le pologa i Aikupito ma tuuina i Kanana, le nuu folafolaina ma faamanuiaga. Ae peitai o le tele o tamaoaiga na maua e Isaraelu mai le Atua, a’o le tele a o taimi latou te le mata’u ma anaana i le

Atua. E fai ma avaga o latou loto i atua faapaupau, ma o latou fai ane o faamanuiaga mai i ia atua. Ae peitai, o ia tamaoaiga ma faamanuiaga uma e mai le Atua Soifua le Atua o faamanuiaga.

Faatinoga o le Mataupu:

Ia vaevaeina le Aulavou i vaega e tolu (3) ma suesue i manatu ia ma fuaiupu nei o le Salamo.

- 1) O faamanuiaga Taitoatasi – f1 & 2
- 2) O faamanuiaga o Aiga – f3 & 4
- 3) O faamanuiaga o Malo – f5 7 6

Fesoasoani mo le Mataupu:

Manatu Muamua (f1 & 2)

O lo o tautala ai le fai Salamo i le manuia o tagata lava i, o e matata’u i le Alii ma savavali i ona ala. O i latou o e tausī i poloaiga a le Atua ma faia Lona finagalo. E ai i ana lava galuega. Na te selesele lava i fua o ana galuega. O lona manuia ma lona lelei, ona o le mata’u i le Alii. E leai se mea e mativa ai, ona o le faalagolago i le Atua ma ana faamanuiaga.

Manatu Lua (f3 & 4)

O lo o tautala ai le fai Salamo i faamanuiaga o se aiga e mata’u i le Alii. Ua faatuina ai lana ava i le vine fua tele mai. O le vine o se laau e sili lona taua i tagata Palesitina. Ai o le mea lea ua faatusaina ai le ava. O lona matagofie ma faamanuiaga e maua e se aiga. E fiafia ma olioli, e leai se fevaevae’i ma se fefaauua’i ae fesagisagia’e, o le

faailoga o e matata'u i le Alii. O lana fanau foi e pei o tamai olive i Palesitina e sili ona tau ama manaomia tele, ma ua faatusaina iai le fanau. E mafai ona faatusaina i le lili e ola matagofie i le vai, i lona fua mata lea gofie pe a fua mai, ma lona faataamilomilo ma siomia ai se vaiata i lona lanu moana. E faapena le fanau ae matatau i le Atua ma faamanuiaga e tulai mai.

Manatu Tolu (f5 & 6)

O faamanuiaga o Ierusalemā mai Siona, pe a fai e matatau Isaraelu i le Atua ma savavali i ona ala ma faia lona finagalo. E manuia lava ona laueleele ma laufanua i aso o le olaga. E iloa atu le lumanai; e faapena isi augatupulaga fai mai, e manuia foi e oo i le faavavau. E ia Isaraelu lea lava manuia ma tumau ai faamanuiaga mai le Atua, pe a faalagolago i le Atua ma matata'u i le Atua. E le gata i lea, ao lenei foi Salamo 128, i le manatu o le tóatele, o le tasi lenei o Salamo e masani ona usuina i faaipoipoga a Isaraelu. Ae le gata i lea o se aoaoga e faailoa atu ai, o se aiga matata'u i le Alii, faalagolago lona tamaoaiga i faamanuiaga mai le Atua.

AOAOGA:

Ioe, o le mata'u i le Alii, o le savali lea i ala o le Atua ma faia Lona finagalo. E le o le galue, ae nofonofo e faatali faamanuiaga. Ao le galue ma faatino mea lelei e tusa o le finagalo o le Atua ma o le tagata ola e mata'u i le Alii, na te maua le manuia, ma e le taumate i le ola e faavavau. O le faalagolago i faamanuiga e ala lea o lou logosaia o mea

tiga, ma faafitauli e ono tutupu mai i le olaga. Ia matata'u i le Atua.

Afai ua le taitaia e le faifeau le Mataupu i le amataga, ona tuu lea iai o le avanoa i le taimi mulimuli ane mo sana fesoasoani ina ia atili lelei ma tamaoaiga ai le Mataupu. AMENE!

Faamanatu: Aua nei galo se faafetai i le Atua, o Lē e ana faamanuiaga.

Aso Sa: 9 Iuni 2019

**Mataupu: PA'UPA'U IA AE O'O I LEPEA
(‘Aua le manatu faatauvaa i tagata)**

O le tasi lenei o fuaitau e masani ona faaaogaina e fai lauga i taimi o lauga. O upu o loo afiafi ai lagona o le faatauvaa ona o se faatinoga ua le lava ma le atoa. O nisi lava o taimi e faaaogaina o se gagana faafitifiti. E tiga lava ona tele mea ua faia, ae tau faalalolalo lava ona o le manatu i le le faamalieina o tagata i se taumafaiga ua fai.

E i ai le talitonuga, e tele lava se taua ma se aoao mai o lenei alagaupu mo i tatou le tupulaga talavou. Aemaise o le fesoataiga ma le olaga faakerisiano e ao ona tatou ola ai i aso uma.

Ia avea foi o se avanoa e toe faamanatu ai lenei alagaupu ma lona maufaaga.

(E muai faamalulu atu i le pa'ia o le Aupalavou i ona tulaga faalupe pe afai e le atoa iinei le faitau o lenei tala. O upu a le atunuu, o Samoa e tala lasi. E eseese foi mau a nuu ma afioaga. Pe afai e le atoa se fa'amatalaga e uiga i lenei tala, e manatu o le a fale i le Atua o outou finagalo. E fa'amoemoe fo'i i lau faautaga mamao e atoa ai fa'amatalaina o lenei tala e ala i la outou fesoasoani.)

TALA:

Fai mai na logologoā tala o le lalelei o le taupou o Faleata e nofo i Lepea. Ona manatu lea o le manaia mai i Salafai, o le a sau lana aumoega i le taupou o Faleata ua 'a'ave atu ona tala. Ona sau ai lea o le malaga. E taunu'u mai le malaga i Toamua, o vevele vao si toeaina matua lava male po'ua i tafā ala. Ona fesili loa lea o le tulafale o le malaga lea i le toea'ina, po'o fea e maua i ai le taupou o Faleata ua 'a'ave atu tala o lona lalelei. Na tali atu le toea'ina, "O Lepea i le afioaga o le Tupufia. Ae a pe a tatou o, ou te fia alu i le tou malaga."

Peita'i na mumusu le aumalaga, ona o le po'upo'ua o si toeaina. Faimai na fa'aauau le malaga i Lepea, ma ina ua taunu'u atu, o lo o leo mai e taulelea le 'a'ai. Ona fa'anoi lea o le malaga pe mafai ona ulufale. Na fesiligia pe o le a le ala o le faigamalaga, ona faamatala atu lea e le tulafale i le au leoleo faitotoa le ala o le malaga.

Na tali ane taulelea, e lē mafai ona ulufale, ona e le o i ai le tama o le teine. Ae sili ona toe fo'i e 'a'ami le tamā o le teine o lo'o i Toamua. Na fesiligia e le au malaga le suafa o le toeaina, ona fa'ailoa lea i ai e taulele'a, o Pāgamālie.

Na toe foi le malaga i Toamua ma toe tau atu ai i le toeaina lea o lo'o vevele vao, ona fesili lea i ai o le aumalaga, po'o fea e maua i ai le toea'ina o Pāgamālie. Na tali ane le toeaina, o ia lea.

Na fa'amalūlū le aumalaga i le toea'ina ma fa'ato'ai i ai la latou savali. Na ata le toeaina ma fa'apea atu, "Ia ai ona o lou po'ua ma le papala o lo'u tino na outou mumusu ai e ave au i le tou malaga. E sa'o e pa'upa'ua lo'u tino, ae va'ai outou, e pa'upa'u lava ae o'o a i Lepea. Ona talia ai lea o le savali.

Fa'atinoga o le Mata'upu:

E fautuaina lau susuga i le fai mata'upu, ina ia fai ni kopi o le tala, ona vaevae lea o le aupalavou i ni vaega se lua. Ia tofu le vaega ma le kopi o le tala, ona tu'u lea i ai o le avanoa e su'esu'e atili ai i le tala, ma fai ai se su'esu'ega a vaega ta'itasi, i se tala o le Tusi Paia e atagia ai le uiga o le autu.

Fesili mo le talanoaga:

1. O a ni aoaoga e manatu le Aupalavou e mafai ona aoaoina mai lenei tala?
2. Saili ni tala o le Tusi Paia o loo atagia ai aoaoga ua maua mai lenei tala faaSamoa.

Fesoasoani mo le Mataupu:

E tai feso'otai lava lenei tala tu'u ma le tala i a Lasalo ma le mau'oa, o lo'o ta'ua i le **Luka 16:19-31**. O lo'o fa'amanatu mai e lenei tala ia i tatou tupulaga talavou, le

taua o le fa'atauaina o tagata uma. Manatua foi, o le fetalaiga a lo tatou Ali'i o Iesu, "O se tasi e aupito itiiti o ou uso nei ua outou faia i ai, o a'u (Iesu) lava lea.

O le tala a le Kenese, na faia e le Atua le tagata i lona fa'atusa. O lona uiga o le fa'atusa o le Atua na fai a'i le tagata. Pe papala, mataivi, gūgū, logonoa, vaepi'o, ma'i, ma isi lava mau a'afiaga fa'apena o le tagata, aua ne'i galo, o le fa'atusa lava o le Atua na fai ai o ia.

E lē se mea lelei lo tatou va'ai maualalo i tagata mama'i ma lē taualoa. E lē se mea lelei foi lo tatou nonofo ma vavae ese se tagata mai i le fa'apotopotoga o tagata ona oni 'a'afiaga fa'apea. E pei lava o le fetalaiga a lo tatou Alii, o ia lava lea ua tatou faia i ai.

Talavou, e taua lou fa'atāuaina o tagata uma. O lou alofa i le isi tagata, o lou alofa lava lea i le Atua. Manatua o Iesu, e le i afio mai mo se vaega o tagata, pe na afio mai na o tagata malolosi. Ae na afio mai lava Iesu, ina ia ola tagata uma ia te ia. O lona maliu foi ma lona toetu, ina ia saofaga tagata uma o e fa'atuatua, i le ola e fa'avavau. O la Ioane, "Aua ua fa'apea lava ona alofa mai o le Atua i le lalolagi, ua ia aumai ai lona atali'i e to'atasi, ina ia le fano se tasi e fa'atuatua ia te ia, a ia maua e ia le ola e fa'avavau".

Faamanatu: E tutusa tagata uma i le Atua

Aso Sa: 16 Me 2019

Mataupu: 'AUA NEI E FAI MO OE NI ATUA ESE I O'U LUMA

Tusi Faitau: Esoto 20:3

O le autu ua atofaina o lenei mata'upu, o le tulafono lea - "*Aua ne'i e fai mo oe ni atua ese i o'u luma.*" O le ulua'i tulafono lava o Tulafono e sefulu na tu'uina ifo ia Mose i luga o le mauga o Sinai, a'o fa'atali le nu'u o Israelu ma le gatete i le auvae mauga o Sinai, lea ua fa'amauina lona fa'alauiloaina i le *Esoto 20: 3*. O Tulafono lava foi nei e sefulu, lea foi na toe fa'a'ailoa e Mose i le nu'u, a'o i ai i laufanua laugatasi o Moapi, o sauni ai e ulufale i Kanana le nu'u folafolaina, fa'apei ona fa'amauina i le *Teuterenome 5: 7f*.

Fa'atinoga o le mataupu:

Ia fa'atalatalanoa le mata'upu i le autalavou, ma tu'u i ai le avanoa mo ni fesili, ae ia matuā su'esu'e atili lau susuga i le mata'upu ina mafai ona tali ni fesili o le a tu'uina mai. Saunia pea e lau susuga ni a'oa'oga mo le autalavou.

O nisi o fesili e tau tatala ai le mataupu:

1. O le a se silafia o le Autalavou i le faauigaina o le tulafono muamua?
2. O le a le taua o lenei tulafono muamua mo Israelu?

3. O le a se fesootaiga o le tulafono ma aso nei ua tatou i ai?

4. Ua tele tapuaiga ua i totonu o Samoa, o isi tapuaiga e le talitonu ia Iesu Keriso. Faamata e leo aafia ai le faavae o Samoa i le tele o nei tapuaiga ua oo mai?

Fesoasoani mo le Mataupu:

O le a le uiga o le Tulafono Muamua?

O le faauigaina masani lava, o le tapu lea, pe matua faasaina ona tapuai ma auauna le tagata i se isi atua e ese mai i le Atua Soifua. O le sailiga o le uiga tonu o le Tulafono, e tutupu ai nisi o fesili e faapea;

(I) Po’o ai isi atua ese lea e taua i le Tulafono?

(II) Po’o le a se taua o lenei Tulafono mo Isaraelu?

O nei fesili, e ono toe tutupu ai nisi fesili e faapei o lenei, Pe faamata o iai i Samoa ni atua o aofia i atua ese o taua i le tulafono? Pe faapefea foi ona tatou tausia ma olaina lenei Tulafono i lo tatou soifuaga o nei ona po?

E toatele e manatu o isi atua e faatatau i ai le Tulafono, e aofia ai atua mamate o Sasa’e Tutotonu (Middle East), ma e le sese lea vaaiga. E mafai foi ona tali le fesili lea, pe a tatou vaai i le upu Eperu o fa’aaogaina, lea o faaliliuina faa-Samoa o le “*atua*”. O le upu Eperu o fa’aaogaina i le Tulafono o le ‘*elohim*’. O le upu e faasino i so o se atua. O le upu “*elohim*” e sau mai le upu faavae o le “*el*”, o lona uiga o le malosi po’o le pule(*James K Hoffmeier, The Book of Exodus. pg 38,39*). A tatou fa’aaogaina la ia uiga, o lona uiga, e mafai ona tatou faapea, o Tulafono muamua,

e le gata o tapu ma sa ai ona auauna i atua ese, ae faapena foi ona faasa ai le faalagolago i nisi malosiaga i le lalolagi nei ma luga, atoa ma so’o se mea e puleaina le loto ma le mafaufau o le tagata, e mai i le Atua moni e toatasi.

O le a le taua o le Tulafono Muamua mo Isaraelu?

A fua i le faatulagaina o Tulafono e Sefulu, e mafai ona faapea o le tulafono sili lava lea lona taua mo Isaraelu, aua o le tulafono e tapui ai lona va feagai ai ma le Alii. O le Tulafono foi a tausia e tagata uma, e manatu e faigofie ai le tausisi o isi tulafono e iva o mulimuli mai. Aua o le leai lava o se isi atua ma nisi mea e faalavelavea le auauna ma le atua o le tagata i le Alii, o le mafai lava lea ona olaina lona finagalo o fa’aalia i isi tulafono.

E manino atili foi le taua o le Tulafono muamua, pe a tagai i le Talafaasolopito o Isaraelu ma Iloilo i Tusi o faamauina ai lenei tulafono, o i le Esoto ma le Tusi o Teuterenome.

a. Tusi o Esoto

I le Tusi o Esoto, o le uluai taimi lea na tuu ifo ai Tulafono a le Alii, i le toai taunuu ai o Isaraelu i le mauga o Sinai. Ua mavae atu le faasaolotoina mai le nuu o Aikupito lea sa aumau ma nonofo pologa ai. Aua ai lena taimi na nofo pologa ai i Aikupito. O le mea mautinoa lava, na matua afaina lo latou talitonuga i lo latou Atua, i le tele o atua mamate o Aikupito na latou vaai i ai i aso uma o lo latou ola i lea mea.

Peitai, o lo latou faimalaga mai i le vao seia oo mai i le mauga o Sinai, ua taua ai lenei Tulafono mo i latou. Aua, lea ua faatoa mavae atu la latou osiga feagaiga ma le Alii,

“Fai a’u ma outou Atua, fai outou mo’u nuu.” O lona uiga, o le Feagaiga a le Alii ma Isaraelu, lea ua faamau faailogaina i Tulafono e sefulu. O le Tulafono la muamua, o le lapataiga tupito lava a le Alii mo lona nuu fulifilia, nei mea ane tapuai se isi i ni ona atua na sau ma ia mai Aikupito, galo ai le Feagaiga na osia.

O loo iloa i Tulafono e sefulu, o Tulafono muamua e fa, e tausia ia le va feagai ai o le tagata ma le Alii, po o le maga muamua o le Feagaiga. O le Tulafono e ono mulimuli, e tausia ai le va o tagata, ina ia mafai ona avea pea Isaraelu ma nuu o le Atua.

E foliga mai, o le ute lava o le Feagaiga a le Atua ma Isaraelu, ua manino mai ai le taua o le uluai Tulafono. Aua o le avea o le Alii ma Atua o le tagata Isaraelu, o le mafai lava foi lea ona faatumauina le tagata Isaraelu ma tagata o le nuu o le Atua. E tele foi le taua o le uluai tulafono lenei, i le vaitau o le toe a’e o le tafeaga a Isaraelu mai Papelonia. O le vaitau lea e manatu le au suesue, na tuu faatasia ai le Tusi o Esoto. Aua lea ua foi mai Isaraelu mai Papelonia le nofoaga o le mau atua eseese. O le mea mautinoa, ua pisia le nuu i faiga ma tapuaiga faapaupau aua e le laititi ni tausaga na aumau ai i Papelonia. E taua la le tapu ona tapuai ma auauna i ni atua ese, a ia fai le tulafono muamua, ma faamanatu taua mo i latou, o le Atua faamaoni, ua na toe faafoisia le tafeaga. Aua i le toe a’e ai o le tafeaga, na iloga le telē o se taumafaiga e toe tapu’e le tapuaiga Iutaia i le Atua Soifua.

e. Tusi o Teuterenome:

I le tusi o Teuterenome, o le toe faitauina lea e Mose o Tulafono 10, i ana lauga taumavae, ao iai le nuu i laufanua laugatasi o Moapi, e sauni ai le sopoia atu o le Ioritana, ma nofoia le nuu folafolaina. Ua silafia lelei e Mose le faafitauli o le a feagai ma le nuu i Kanana. O Kanana o le nuu o le mau tapuaiga eseese i atua faapaupau, ma e ono seetia ai le fanauga a Isaraelu. O le nuu e tafe ai le suasusu ma le meli – o le faailoga o le nuu o le oa ma le tamaoia. O foliga feilafi ia o Kanana na manatu ai le taitai toaina o Mose, e toe faailoa pea tulafono, nei atua le nuu i mea e tosina i ai o latou loto, ona galo lea o le Atua na ia foa’i atu le nuu o manuia mo i latou.

Ua talia lautele lava, o le Tusi o Teuterenome na tuufaatasia i le vaitau o le popofou o le tafeaga i Papelonia. O lona uiga, o lo latou mauaina o lenei tulafono, o se luitau tele i lo latou fesagai ai ma atua mamate o Papelonia, le nuu ua tafea i ai. A ia aua lava nei faia ia atua ese ma o latou atua ao silasila le Atua na la osi feagaiga.

2. Tulafono Muamua ma Aso nei.

E manatu ua manino se sailiga vaivai i le uiga o lenei tulafono ma sona fesootaiga ma le soifuaga o le nuu o Isaraelu. Ae sei tatou liliu ane i lo tatou lotoifale, i aiga, i nuu, Ekalesia ma Malo, poo a ni atua o i ai faaleiloga, ae poo faapefea foi ona tatou tausia lenei tulafono i nei aso.

E talitonu, e le masino le mau atua o Samoa, pe a tatou toe to manatu i a tatou tala tuu ma tala o le vavau. E ui ina e

le o maua nisi o toe tapuai i ai, peitai o loo fai lava ma alia'e mai i o tatou mafaufauga.

Mo se faataitaiga – E i ai lava tagata o loo talitonu lava i o latou tapu a fanua. Pe le o le fai ea lea o atua ese i luma o le Atua o faavae i ai Samoa. Lata mai nei i le nusipepa o loo aumai ai le mau a nisi e faapea—E tutusa Tagaloalagi ma le Atua o le Tusi Paia. Ua manatu ia tusiga, e mafai foi ona faaigoa le Atua o le Tusi Paia ia Tagaloalagi. E foliga ua toe tau faaolaola e lea mafaufauga, atua ese o loo tapu mai e le Tulafono.

E lei matua mamao atu, le pesi mai faatai faana'e o nisi o tapuaiga fou i lo tatou atunuu. O le tapuaiga Isalama, o le tapuaiga Mooni mai Korea, lea fai mai e iai le atua fafine ma le atua alii. Na toatele foi o tatou tagata na mulimuli ma gauai i ai. E le gata ina soli ai le manulauti o le Faavae, ae sili ai ona soli le tulafono muamua.

Pe afai o le uiga o le upu '*atua ese*' i le gagana Eperu o iloga le aofia ai o malosi ma le pule. E manatu ai le pepa, leiloa po'o le vaega lea o loo ela ai, lo tatou tausia o lenei tulafono. Aua e tele mea malolosi e foliga e faoa le tulaga o le Atua, e pei o le tupe ma le tamaoaiga. O mea faafiafia e aofia ai le ava malosi ma fualaa faasaina. E manatu foi o loo aofia ai le aganuu ma taitaiga faalemalo. E taofi se vaivaiga, ai lava o atua ese ia, ua tatou atua i ai, ae ama i le Atua ua faasino mai e le Tulafono.

Aotelega:

O nai sailiiliga ia i le uiga ma le taua o le Tulafono muamua mo Israelu, aua le va tapuia o le tagata ma le Atua. Ua iloa ai foi le mafai ona atua le tagata i nisi mea o le ola nei e ono puleaina lona loto ma le mafaufau, ma afaina ai le ola auauna i le Atua moni e toatasi.

a. Tamaoaiga/oa: E le leaga le tamaoaiga, e taua e atina'e ai lo tatou ola i le tino. A ia manatua, a o'o ina faamuamua i lo tatou ola, ona avea lea ma ala e faoa o tatou loto, ma taitaiina ai i tatou i le ola tuinanau. Ae leiloa po'o le ala lea ua manatu ai nisi, e le afaina le le alu i le lotu, aua o loo saili tupe e fai ai mea faalelotu.

e. Faapolokiki/Pule: O le pule foi ma le tulaga taualoa i faiga faaupufai ua naunau ai nisi, atoa foi ma e o umia tulaga faataitai ma tulaga pule, o le popolega lava nei fai ma ala ma avanoa, e faatoilalo ai se soifua ma se ola, ona o ni pulega sau. Ia o nisi foi, o le naunau lava i le power, ma o le malosi lea ua puleaina loto ma mafaufauga; ae faa lona lua ma faamulimuli le Atua. O le naunau i le pule, e faatino ai faiga fai faamalosi, e faatatau ina ia maua le mea ua atua i ai.

Faamanatu: Ia faamuamua le Atua i mea uma.

Aso Sa: 23 Iuni 2019

Mataupu: O OFU UA E MASANI AI

Tusi Faitau: 1 Samuelu 17: 38-47; Efeso 6: 10-12

O laei, o le tasi lea o vaaiga e mafai ona ia faamatalaina le tagata ma lona faasinomaga. Aua ua iloga lava laei ma ona taua/aoga mo le tagata soifua. O atunuu eseese foi o le lalolagi, e i ai lava laei faaleaganuu e iloa ai lea atunuu ma lea atunuu. E i ai lava foi laei e tatau mo lea sauniga ma lea sauniga. O suiga o le tau i le malulu ma le mafanafana, ua i ai lava laei e tatau i soo se tau aua le saogalemu o le tagata soifua.

O ofu poo laei o loo faamamafa i le tatou mataupu o lenei aso, o laei/ofu faaleagaga e tatau ona laei ai le tama ma le teine talavou. O uiga faaaliga ma amioga e tatau ona faia ina ia atagia ai le manulauti a Tupulaga Talavou EFKS – Ia Ola Ia Keriso.

Faatinoga o le Mataupu:

1. Vaevae i vaega e lua: tofu le vaega ma le tala e faitau

Vaega 1- 1 Samuelu 17:38-47

a. O a ofu tau o loo taua i le tala.

e. Aisea ua naunau ai Saulo ina ia laei e Tavita ia ofu tau?

i. O a ofu ua masani ai Tavita e pei ona taua i le tala?

Vaega 2 – Efeso 6: 10-20

a. O a ofu poo laei o loo taua i le tala.

e. Aisea ua tā’ua ai e Paulo ia laei e tatau mo le Ekalesia i Efeso?

i. Mo i tatou le Autalavou, o a laei e tatau ona tatou laeiina i aso uma ma taimi uma?

Fesoasoani mo le Mataupu:

a. 1 Samuelu 17: 38-47

O le tala masani, i le taunuu atu o Tavita, o loo malomaloa le ulavale o Koliata e tausaili se Isaraelu la te tau. Na faateia tagata uma, ina ua ofo atu e Tavita o ia lava e tau ma Koliata. Na naunau lava Saulo ia Tavita ina ia ofu i ofu tau e tatau mo le taua. O laei e faaaoga i taua o loo tā’ua ai: pulou apamemea, ufifatafata uamea, pelu ma le tao. Peitai, e lei mafai ai Tavita. O le tala a Tavita – “*ou te le masani ai*”. Ai lava ua silafia e Tavita le vaivaiga o Isaraelu ua i ai, ua fa’amoemoe i le lelei o ofu tau ma aupega e tau ai le taua ae ua le fa’amoemoe i le Atua soifua. O le uiga lea o ana upu e pei ona faamauina i le fuaiupu 44-47. Ua le taua ai ia Tavita ni laei ma le aupega mo le taua, ae ua ia faamuamua le Atua. I lona talitonuga, e mafaia mea uma i le faatasi mai o le Atua. O aupega faatauva na faaaogaina e Tavita ae na manumalo ona o lona faatuatua i le Atua.

E faapena foi i tatou le tupulaga talavou, tatou te manumalo i fita ma faigata pe afai tatou te fa’amoemoe i le Atua soifua.

e. Efeso 6: 10-12

1. O apoapoaiga a Paulo mo le Ekalesia i Efeso, o le apoapoaiga foi lea mo i tatou le Autalavou. Tatou te le o faaaogaina ni pelu, polou apamemea, ufifatafata uamea ma nisi aupega mo le taua o nei aso. Tatou te le o tau foi i ni taua faaletino, e ui o loo tutupu lava ni misa ma ni feeseeseaiga i nei aso. Ao le faataua o le mataupu, o le ola tapenapena ma sauniuni mo le taua faaleagaga o loo tatou tauina i nei aso. O le avea ma talavou ua talitonu ia Keriso, e le faigofie. E tele faaososoga a le fili. E felanulanuai auala e ono lamatia ai i tatou. Peitai, o laei faaleagaga e pei ona timai ma apoapoi mai Paulo, o laei ia e tatau mo i tatou i aso uma. Ia faaopoopo i ia mea o le ola tatalo. Tuu ese ofu o le faamaualuga, manatu faapito, o le paie ma le vaai maualalao faatasi ai ma nisi lava uiga le lelei o loo vaايا ma tatou faia pea. O ofu na, o ofu faaletino e oti ai le agaga.

Faamanatu: Oofu ia outou i ofu o le faatuatua.

Aso Sa: 30 Iuni 2019

Mataupu: O LE TUSI I LE EKALLESIA I TUATIRA

Tusi Faitau: Fa'aaliga 2: 18 – 29

O le ekalesia lona fa lea o tusi e pei ona taua i le tusi o Faaaliga. O le mataupu o lenei aso, o le sailiiliga foi i mea taua o loo taua i le tusi mo le silafia e le Autalavou.

Faatinoga o le Mataupu:

Tatala le avanoa e faasoa ai i fesili ua taua i lalo:

1. O le a uiga o ia upu ua faamatala ai Iesu: O le e pei o le mumu o le afi ona mata, o ona vae foi e pei o le apa pupula
2. Faamatala galuega lelei a le ekalesia.
3. O le a le faafitauli o loo iloa i le ekalesia i Tuatira.
4. Faamatala auiliili le uiga o le f. 22-23.
5. Faamatala faamanuiaga mo le tagata e faalogo ma talia upu ua fetalai mai ai le Atua.
6. O a ni aoaoga e aoaoina ai i tatou mai lenei tusi?

Fesoasoani mo le Mataupu:

Faamatalaga e uiga i le aai o Tuatira:

O Tuatira o le tasi lea o aai e logologoa ona tala i le toatele o tagata atamamai ma tagata talenia i le gaosiga o le tele o oloa eseese mo le faatau atu i isi atunuu. O ia tagata atamamai ma tagata talenia ua vaevaeina i faalapotopotoga o agavaa faapitoa ua latou maua. Mai le tele o tagata talenia i Tuatira, e lua lava oloa na sili ona tautaua ai lea aai:

1. O oloa e gaosi mai le copper - Coppersmiths
2. O le faiga o le ie dye-dye. O Tuatira na afua mai ai le faiga o le dye-dye e oo mai i nei aso. Ma e i ai le talitonuga, e i ai lava le tomai faapitoa o le faiga o le dye-dye e le o maua e le toatele o tagata, seia vagana i latou sa aoaoina faapitoa i Tuatira. O le aai o Tuatira e tupuga mai ai Litia, o le faatau ie pāuli – Galuega 16:14.

Peitai, o le toatele o ia tagata talenia, e le o ni tagata kerisiano. E avea a latou faapotopotoga o tagata gaosi oloa ma ala e taitaiina ai lava i latou i o latou manatu ae le talitonu i le Atua. E i ai le talitonuga, ua tauau ina pisia atu ai ma tagata lolotu i Tuatira i ia talaiga.

1. *O mea nei ua fai mai ai le Atalii o le Atua, o lē e pei o le mumū o le afi ona mata, o ona vae foi e pei o le apa memea.* –

E foliga tutusa faaupuga ia e faamatala ai Iesu i le tusi ma upu o loo taua i le mataupu 1:13-14. Peitai, na o le pau lea o le taimi ua faalupe ai Iesu – O le Atalii o le Atua.

- *O fofoga o le Alii ua faatusaina i le afi e mumu.* O le faailoga o le faamasinoga amiotonu a le Atua i ona tagata. O le Atua e ati lana silasila i mea uma e faia e le tagata.
- O loo manatu nisi o le au suesue, o Tuatira o se vaega o aai e i lalo o pulega a Maketonia. O Maketonia sa tapuai i le atua e igoa o Apolo. E faaigoaina o le atua o le la – Sun god. O le faaaogaina o le faaupuga – afi mumu e faamatala ai fofoga o Iesu, o le faailoga, e malosi atu Iesu i loo Apolo.
- *o aao e pei o apa memea.* O le upu Eleni o loo faamatala ai – apa memea e faaliliuina – o le tuufaatasiga o uamea eseese. O lona uiga o aao apa memea – o aao ua atoatoa ai ai le malosi o uamea. E le mafai lava e se isi malosi ona faaleaga. E le oo foi i ai se ‘ele.

➤ O faalupega ua faalupe ai le Silisili ese o Iesu i lona tulaga Atua mai le tele o atua mamate o loo tapuai i ai tagata o Tuatira.

2. O galuega lelei o loo taua i le f19 – alofa, faatuatua, auauna i le Atua, onosai.

3. O le faafitauli o loo feagai ma le ekalesia, ua molimauina nisi o le au Kerisiano, ua peseai e faaleogalua o latou olaga. E moni o loo faamauiina a latou galuega lelei, peitai, o loo i ai foi i latou o loo faia uiga mataga i luma o le Atua.

O nisi o i a uiga inosia e aofia ai le: o le faia o amioga na muai faia e Iesepela.

- Faia o amioga faa-Iesepela. O Iesepela o loo faamatalaina i le Feagaiga Tuai-1 Tupu 16:31-33. O se fafine e tapuai ia Paala. O le fafine faapaupau. E fai togafiti leaga. Na ia fafau le pepelo lea na oti ai Napota ae ave faamalosi lona tovine. Na tuli ma lamalama i perofeta a le Atua. E le o se tagata lelei. O le faafitauli lea o loo aliali i le ekalesia i Tuatira, ua fiafia i amioa faa-Iesepela.
- Talia aoaoga a perofeta pepelo: E le gata i lea, ae latou talia foi nisi o perofeta pepelo e talai atu tala sese ia i latou.

4. fuaiupu 21 – ua i ai le valaau e salamo ma tuua mea uma ae foi i le Atua. Fuaiupu 22-23 o loo taua ai le malaia/faasalaga o e lē salamo.

- F. 22 – ua tuufaafeagai e le Atua le fiafia e fai le agasala ma le tiga/puapuaga e oo i ai pe afai e le

salamo. *O le mulilua ma ia* – o loo faasino ia i latou ua faia amioga faa-Iesepele. O le mulilua i la le tino (physical adultery) ma le mulilua faaleagaga (spiritual adultery).

- f.23- ou te fasia foi *ana* fanau – o le ana – o le suinaua o loo faasino tonu ia i latou o e ua faia amio faaIesepele. O i latou uma e faia amio inosia i luma o le Atua, o le a feagai ma puapuaga e iu i le oti, pe afai e le salamo ma foi i le Atua.
- O faasalaga ma le malaia ina ia iloa e le lalolagi ma tagata uma, e leai se mea e lilo i le silafaga a le Atua. O manatunatuga o le tagata i lona loto, e silafia uma e le Atua.

5. O faamanuiaga mo lē ua i ai taliga e faalogo ma talia ai upu a le Atua

- O faamanuiaga mo e ua faatuatua ma tutumau i le Atua – E pule faatasi ma le Atua.
O le pule e afua mai le Atua le malosi ma mea uma.
O le pule e faatoilalo ai o soo se
- *nutipalaina o ipu*: faatoilalo ai o soo se malosi.
- *Fetu ao*: e tele fetu o le lagi, ao le fetu ao, o le fetu e silisili lona pupula. E fai ma taiala i tagata malaga. Ua fetalai Iesu, o le tagata faatuatua e avea o se fetu ao, o se fetu pupula malosi lona malamalama e fai ma taitaiala i tagata uma.

6. O a ni aoaoga ua maua lenei tusi? E tuu atu pea i lau susuga i le fai mataupu e faamaumau ma faamalamalama

ni aoaoga e saunoa i ai le Autalavou. Ia manuia le Mataupu.

Faamanatu: Aua tatou te faia uiga faa-Iesepele.

Aso Sa: 7 Iulai 2019

Mataupu: O TUPULAGA TALAVOU MA FAALAVELAVE UA TUTUPU.

Ua le toe nā ma le laina le tele o fa'alavelave e fou i le faalogoua

1. Ua vaivai le ola aoaoina i totonu o aiga. Ua vaivai le aoao atu o matua.
2. E lē o lava le ola aoaoina i le itu faaleagaga.
3. Ua tele le aafiaga o fanau i tekenalosi (technology) i nei aso.
4. Ua mulimuli i taiga a isi tamaiti.
5. O le mativa ma le manao le faamalieina.

O le tatou mataupu o lenei Aso Sa, o le a tatou sailiili ai i mafuaaga ua taua i luga poo fea o i le sa'o. Pe tatou te ioe e sa'o ia tuaiga pe leai foi.

Faatinoga o le Mataupu:

Ia talanoa faatasi le Autalavou, poo ai e tetee i ia mafuaaga ao ai foi latou te lagolagoina. I a mausali ni mafuaaga e faavae ai manatu.

Ia saili poo le a se isi laasaga e tatau ona faia e matua, nuu, Ekalesia ma le Atunuu ina ia foia ma tuuititia ia faiga le pulea a tupulaga talavou.

Fesoasoani mo le Mataupu:

O le a taoto pea le talanoaga o mafuaaga i le tofa ma le utaga loloto a le mamalu o le Autalavou. E talitonu le fa'amoemoe, o le a tele se aoga ma se aoaoina e maua ina ua faaali finagalo e uiga i fesili ua taua i luga.

O le Tusi Paia lava ia ma lona aoao mai, e le fiafia le Atua i talavou e faatupu vevesi ma faamisa i soo se mea. O le finagalo o le Atua, ia ola matatau fanau/talavou i lona finagalo. E pei ona molimau le Tusi Paia, ua finagalo le Atua: Ia aoao le tama e tusa ma ona ala. O ala o le Atua o ala o le filemu. O ala o le fealofani ma le fealolofaai. O ala o le amiotonu. O a amioga ma faatinoga e faia e fanau/talavou, e tatau lava ona atagia ai uiga ma aoaoga a Iesu Keriso.

Ia aua nei galo, na faia le tagata i le faatusa o le Atua. O lona finagalo, ia lelei atoatoa le tagata. O lona alofa faamaoni na tuua ai lona mamalu, ae afio mai e militino faatasi ma le tagata. O le Tusi Paia o loo faamauina ai lona finagalo, ina ia tatou faitau ma aoaoina. Ma ia fua mai i o tatou olaga o aso uma.

O le fofo o lenei faafitauli o loo i outou aao ma tatou lima. E moomia lo tatou galulue faatasi.

I totonu o aiga, ia aua lava nei fiu le aoao atu i fanau. O nei aso, e peiseai e aoga loa le tamaititi ma le teineititi i le

Kolisi (College level), ona tuu lafoai lava lea e alu ia i le aoga. E tapena e ia ona lavalava aoga. Ua na o le tuu lava i ai o le pasese alu loa i le pasi. A oo foi i le tuua o aoga, ua pule a le tamaititi ia i le taimi e sau ai. Pau le mea taua ia oo mai le fale. Peitai, o le tele o le galuega sa faia a'o aoga i Primary Levels ua le toe faia. O le faamanatu o le tatou mataupu: Sei silasila ane pe le o le isi lea vaipanoa o loo tutupu ai faafitauli i fanau?

I totonu o nuu, e taua toe faamamalu pea o tulafono e puipuia ai fanau mai le tele o faalavelave. O le ava oona ma fualaau faasaina le isi aafiaga tele. Ae tatau ona toe faamalositia le auai uma o tagata i le lotu.

I totonu o Ekalesia, ia faia ma faatele ni polokalame e faatino e fanau, e taofia ai le feoai solo i le auala ma faia isi uiga mataga. Ia faamalositia uma fanau a le nuu i le lotu ma auai i le Aoga Aso Sa, Autalavou ma isi itutino o le Ekalesia. Ia faia ni polokalame e faaoga ai talenei a fanau: siva samoa, siva faaleagaga ma isi.

O le atunuu foi e tatau ona tele ni polokalame ma ni tulafono e puipuia ai fanau mai le faaososoina i faiga a le fili ma iu ina toilalo ai.

O nai fesoasoani ia i le tatou mataupu ae fa'amoemoe lava i le talanoaga o le a faia, e manino ma malamalama atili ai le mataupu o lenei Aso Sa. Ia manuia le mataupu.

Faamanatu: Ia ola ia Keriso

Aso Sa: 14 Iulai 2019

Mataupu: SALAMO 24: 1-10

E 150 pese/salamo ua mafai ona faamauina i le Tusi o Salamo. Ae lē aofia ai le tele o isi pese ma salamo o loo faamauina i isi tusi o le Tusi Paia – Pese a Hana, Pese a Miriama, Pese a Elisapeta ma isi lava pese. O le tusi o Salamo e le o ni mataupu/chapters. O le mafuaaga lea e le mafai ona faapea: Salamo mataupu e 24 aua o pese ma solo. E ta’u lava o le Salamo 24 poo le Lautusi o Salamo 24. O Salamo o loo vaevaeina i stanzas/parakalafa.

O le Salamo 24 ua talia lautele e le a le Suesue o le Tusi Paia, o le Salamo na tusia e Tavita e faatatau i le taimi ma le ituaso na aveesea ai le atolaau a le Atua mai le fale o Opete-etoma – 2 Samuelu 6: 10-12. O le salamo poo le pese lea ua lagiina e manatua ai le taimi ma le ituaso ma toe faafoi ae ai le atolaau a le Atua agai i Ierusalem ma le aai o Tavita.

Faatinoga o le Mataupu:

O le Salamo 24 ua vaevaeina i parakalafa/stanzas e tolu:

1. Parakalafa 1:1-2. 2. Parakalafa 2: 3-6. 3. Parakalafa 3: 7-10

Ia faasoa manatu o le Autalavou i uiga o parakalafa taitasi ma lona fesootaiga i le auina ae o le atolaau a le Atua.

Fesoasoani mo le Mataupu:

1. Parakalafa 1: 1-2 - O le Atua e pule aoao i mea uma o i le lagi ma le lalolagi.

Ua toe faatepa e Tavita le aufaitau i le tala o le foafoaga – Kenese 1-2 e pei ona faamatala ai le silisili ese ma le matautia o le Atua na faia ai o mea uma. Ae palealuga i le tagata soifua. O le fa’amoemoe o Tavita, ia toe faamanatu i le foafoaga uma e aofia ai ma tagata soifua, ua na o le Atua e pule aoao i mea uma.

E pei lava ona taua i luga, o le Salamo 24 e fesootai ma le ituaso na toe faafoi ai le atolaau a le Atua i le aai o Tavita. Manatua foi, o le atolaau a le Atua na faoa e Filisitia ina ua manumalo i le taua ma Israelu – 1 Samuelu 4. Peitai, o le i ai o le atolaau a le Atua i aai o Filisitia na fasiotia ai le toatele o tagata ona o Filisitia – 1 Samuelu 5. Mulimuli ane ua tonu i tagata Filisitia ua tataua ona toe faafoi le atolaau ona ua maumau le toatele o soifua o tagata Filisitia ona o le matautia ma le silisili ese o le Atua o Israelu – 1 Samuelu 6. Ona toe faafoi lea o le atolaau a le Atua ina ua fasia e Israelu Filisitia i lalo o le taitaiga a Samuelu – 1 Samuelu 7. O le 2 Samuelu 6 o loo faamatala ai le toe faafoi ane o le atolaau a le Atua i le aai o Tavita ina ua avea Tavita ma tupu ia Israelu. O le talitonuga o loo i ai, o le Salamo 24 na pepese ai Israelu ina ua latou toe faafoi ane le atolaau. Lea o loo amata upu o le Salamo i le toe faamanatu a Tavita, “O le pule aoao i mea uma ua na o le Atua o Iakopo”.

2. Parakalafa 2: 3-6 - O tagata faatuatua e faapaleina i manuia o le Atolaau a le Atua.

E lua fesili a Tavita o loo taua i le vaega lea o le Salamo:

O ai se alu ae i le mauga o le Alii?

O ai se tumau i lona afioaga paia?

Mauga o le Alii ma le Afioaga Paia – o loo faasino i le Silisili ese o le Atua o loo tauave e le Atolaau (manatua o taimi ia e lei fausiaina le Malumalu o le Atua lea na faia e Solomona). O le atolaau a le Atua, o le faailoga lea o le Atua auai ia Isaraelu ao le'i faia le Malumalu.

O le tali o le fesili o loo taua i le f.3-f4: “*O le ua i ai lima māmā, ma le loto māmā; o le ua lē naunau lona loto i le mea fatauvaa, ma ua lē tauto faa’ole’ole*”

lima mama – faatinoga e faia ma le loto mama

loto mama – o le tagata ua loto atu i mea a le Atua. Ua na o le Atua e afua ai mea uma e faia. E le faia ona o se isi mea, ae ua faia ona o le alofa i le Atua.

naunau lona loto i mea faatauvaa ma le tauto faaoleole – o le tagata ua na o le Atua e mafaufau i ai lona loto. Ua ia tautino o ia o le tagata faatuatua, e tatau foi ona faamaoni i lea tautoga ua faia. Afai e faa’ole’ole, o lona uiga ua pelogia le Atua.

Atua o Iakopo – Atua o Isaraelu

O fesili a Tavita e pei ona taua, ua iloga ai le eseese o tagata e talitonu i le Atua ma tagata e tapuai i atua mamate. Ua fai ai Filisitua ma faataitaiga o tagata e tapuai i atua mamate – o *tagata e le mama o latou lima, e le loto foi i mea a le Atua*. Ao Isaraelu, o tagata ia ua talitonu ma faatuatua i le Atua – o *tagata e mama o latou lima, e loto foi i mea uma e finagalo i ai le Atua*. I le aotelega o

mafaufauga o Tavita, ua na o Isaraelu (tagata e faatuatua i le Atua) e tatau ona aofia ma faapaleina i manuia o le atolaau o le Atua. E pei ona taua i le tala, e toatele tagata Filisitua na fasiotia ona o le atoalaau, ae na manuia ai tagata Isaraelu.

3. *Parakalafa 3:7-10 - Ia saunia tagata uma mo le Afio mai o le Atolaau a le Atua.*

O le stanza/parakalafa mulimuli o loo faamatala ai le ulufale atu o le atolaau a le Atua i le aai. O aai o ia aso, e malu puipuia lava ona ‘olo/pa e siosiomia ai le aai atoa mai ona fili. O ai lava e fiaulufale atu i le aai, e muai saili se fatanaga mai le tupu poo leoleo o le faitotoa/entrance. O le valaau lea a le tupu o Tavita i ona tagata o loo leoleo i le faitotoa ma i latou o loo i le aai, ina ia tapena ma saunia tagata uma. O fitafita ma tagatanuu ia latou iloa ma faaaloogia le ulufale o le Tupu Mamalu. Ua faaogaina e Tavita le upu: Tupu Mamalu e tavavae ai lona tulaga tupu faalelalolagi ma le Tupu Silisili ese ua afio mai.

O ai ea lenei Tupu Mamalu? Fai mai Tavita: “*O le Alii, le malosi ma le fitafita, o le Alii le fitafita i le taua. O le Alii o ‘au, o ia lava le tupu mamalu*”.

O le fa’amoemoe o lenei Mataupu, ia toe faamanatu le taua o lenei Salamo 24. O lona uiga ma le vaiata na lagiina ai e Isaraelu, ao lea ua faamauiina i le Tusi o Salamo. E i ai foi le talitonuga, o soo se Salamo lava e i ai lona mafuaaga ma lona uiga na tusi ma faamauiina ai.

Faamanatu: O le Atua e pule aoao i mea uma o i le lagi ma le lalolagi

Aso Sa: 21 Iulai 2019

Mataupu: UA LEVA ONA AO SAMOA.

O upu ua fai ma manatu autu, o se fuaitau ua tatou faalogo ma faaofoga so’o i ai. O lona uiga e pei ona faaoga ai i aso uma: *ua leva ona faatalaleleiina Samoa.*

O le talitonuga, e taunuu mai le Tala Lelei ia Iesu Keriso e pei ona aumai e Misionare i le 1830, ua leva ona ola o tatou tagata Samoa i uiga ma faiga faatalalelei. Ma e tele lava agaifanua ma aganuu faasamoa e mafai ona lagolago ai lea finauga: ua leva ona ao Samoa.

O le mataupu o lenei Aso, o le a tatou sailiili ai i nisi o Mavaega iloga o le atunnu e pei ona maua mai nisi o tala tuu pe faapefea ona fesootai ma le Manatu Autu: Ua leva ona ao Samoa.

Faatinoga o le Mataupu:

O nisi nei o mavaega faasamoa ua filifilia mo le tatou mataupu. O itu e fia faamamafaina e le Mataupu, o le uiga ma le aano moni na faia ai ia mavaega. Aua o le talitonuga, o ia Mavaega na faia ao le’i oo mai le Tala Lelei. Peitai, o upu ma le agaga na fai ai le mavaega, o upu lava a le tagata ua iloa Iesu Keriso. (E le afaina pe afai e talanoaina le mafuaaga o le Mavaega)

Mavaega ua filifilia:

1. O le Mavaega na i le Tai – Tilafaiga ma Taema - “*A ta fefulituaa’i, ia tumau lo ta fealofani*”

2. O toe upu a Afia – “*Aua nei galo Afia i si ona vao*”

3. O le mavaega a Tāē i ona matua - “*Ia manatua Tāē i Atua*”

4. O le mavaega nai le tulatalā – “*A ou toe sau i Samoa, ou te sau i ao uliuli folau, ou te le toe sau i se ao uliuli tau*”

5. O le mavaega na i le siuvao o Vaoto – “*O le ua na afua mai Manua*”

6. O le mavaega a le Tuitoga ma le Tuimania – “*Ua lē gagana Faitolo*”

O Mavaega nei na faia ao le’i oo mai le Tala Lelei, taimi o le vatau o tagata. Taimi o itulua tagata. Peitai, o upu ma le aano moni o ia Mavaega o loo atagia ai uiga ma aga a le tagata ua talitonu atoatoa ia Iesu Keriso.

O le lu’i o lenei mataupu, afai o lea sa faia e tagata itulua ma tagata ia faaupuga ma mavaega ao lei oo mai le Tala Lelei, aisea la tatou te le faia ai i o atou taimi?

Faamanatu: Ua leva ona ao Samoa

Aso Sa: 28 Iulai 2019

Mataupu: O LE TUSI I LE EKALEZIA I SARATAISA

Tusi Faitau: Fa’aaliga 3:1-6

O le Ekalesia lona lima (5) lea i le faasologa o tusi e pei ona tatou talanoaina faasolosolo mai Aso Sa ua tuanai. O le faatinoga o le Mataupu e tutusa lava ma le talanoaina o isi Ekalesia e pei ona taua muamua.

Fa'atinoga o le mataupu:

Ia su'esu'e atili le autalavou i le tusi faitau ae fesoasoani i ai lau susuga a le fai mata'upu pe a mae'a le su'esu'ega.

O nisi o fesili e tatala ai le Mataupu:

1. Faamatala le uiga o upu o loo faalupe ai Iesu.
2. O le a le faafitauli o loo feagai ma tagata o Saretaisa.

Fesoasoani mo le fai mata'upu:

O le igoa Sarataisa e feso'ota'i ma le igoa Korosa. O Korosa o ia lea na ala ai ona tamao'aiga ma maualuga le tulaga o le malo o Roma. O Roma sa ogatotonu i ai fefa'ataua'iga i totonu o Asia ititi. Ae o le vaitau foi lea na matuā iloga ai ona alia'e le tapua'iga ia Saipele le atua o Roma, fa'atasi ai ma tapuaiga i Emeperoa o Roma.

v.1. "O mea nei ua faimai ai Lē ua i ai agaga e toafitu o le Atua, ma fetu e fitu".

"O Lē ua i ai agaga e toafitu": O lo'o fa'atatau le fa'aupuga lea ia Iesu Keriso.

"Agaga e toafitu": O lo'o fa'atatau lea i le fa'au'uga a le Agaga Paia i luga o Iesu Keriso i le aso na papatisoina ai o ia, ma tumau ai ia te ia le Agaga o le Atua e fa'a'ato'atoaina ai lona malosi ma lona mana. O le uiga o le "fitu" o le numera atoa, o lona uiga ua atoatoa le malosi

ma le mana ia Iesu Keriso. Ua atoatoa foi lona silafiaina o mea uma e uiga i Ekalesia e fitu.

"Fetu e fitu": O agelu ia i Ekalesia e fitu.

"Ua ou iloa au galuega, ua ia te oe le igoa ua e ola, a ua e oti": Ua na o ni nai tagata Kerisiano o lo'o tumau pea i le fa'atuatua, ae o le ekalesia atoa ua oti uma. Ua le mafai ona fa'aolaina i latou ona o le agasala.

v.2. *"Ia e mataala, ma ia e fa'atumauina mea ua totoe, o le a mate; aua ou te le i iloa au galuega ona 'ato'atoa i luma o le Atua"*.

O le vaega muamua o le fuaiupu lea, o lo'o atagia ai le fetalaiga a le Ali'i o lo'o ta'ua i le Mataio 24:42, ae o le vaega fa'ai'u, o lo'o atagia ai le fuaiupu e 27 o le Tanielu e 5. O le vala'au ia mataala, aua ua fuatia i latou i le fua fa'atautau, ma o le a oo mai lo latou iuga.

v.3. "O lea foi ia e manatu ai i mea ua e maua ma ua e fa'alogo ai, ma ia e taofiina ai, ma ia e salamo. Afai foi e te lē mataāla, ou te alu atu ia te oe pei o se gaoui, e te le iloa foi le itu aso ou te alu atu ai".

O le fuaiupu lea e le o tumau i se taimi (tenses) se tasi.

"O lea fo'i ia e manatu ai..." (taimi nei),

i mea ua e maua ma ua e fa'alogo ai" (taimi tuanai),

ma ia e taofiina ai (taimi nei),

ma ia e salamō (taimi nei faifaipea)

Afai foi e te le mata'ala: O lea ua toe aumai ai le fetalaiga a le Alii o Iesu e pei ona fa'amauiina i le Mataio 24:43 & 44, ma o lo'o fa'atatau lea i le aso o le afio fa'alua mai o le Ali'i.

v.4. “Ua ia te oe foi ni nai tagata i Sarataisa lava, o e ua le fa’aelelea o latou ofu; latou te savavali ma a’u i ofu sisina, aua ua tatau ai i latou”.

O i latou ua le fa’aele’eleaina o latou ofu, o i latou o Kerisiano o ē ua le ifo atu i atua fa’apaupau a o latou uso a tuaoi, ae ua tumau pea i le fa’atuatua i le Ali’i o Iesu Keriso. i latou ua fiafia pea i le ta’uleleia ma le fa’asilisiliina o le suafa o Iesu. Ua mautinoa foi lo latou savavali fa’atasi ma Iesu i ofu sisina i le ola e fa’avavau.

v.5. “O le manumalo, e fa’aofuina o ia i ofu sisina, ou te le soloiesea foi lona igoa i le tusi o le ola, a e ou te ta’u atu lona igoa i luma o lo’u Tama, ma luma o ana agelu”.

Tusi o le ola: O le tusi lea e faamaumau uma ai tagata o le malo o le Atua. Tagata amio Atua ma alolofa I le Atua. Le tusi lea o loo tautala I ai le tusi o Tanielu, ma le tele o isi tusi o le Feagaiga fou.

N.B: A vaai lelei I le faataotoga o le tusi lenei I le ekalesia I Sarataisa, o loo matua manino mai ai le Silisili ese o le Alii o Iesu Keriso ma lona mamalu. E foliga mai o se pusa lavalava o loo teuina ai ni laei mananaia ma le aulelei I totonu, ae le o iloa atua I fafo, sei vagana ua susue. E faapena le vaai atu I ai I foliga o le tusi lenei.

E pei o loo tautala I se gagana faalilolilo ma le faigata ona iloa, peitai, ina ua susue ma iloa atu ai, le matagofie o le Atua ma lana amiotonu, atoa ai ma lana faamasinoga tonu. E le mafai ona sao I ai se eleelea poo se palapala, aua o le Paia e mama ma atoatoa.

A’oa’oga: Ia e tumau o oe o le talavou ua e malamalama ma iloa le Talalelei ia Iesu Keriso ma e ola ai. Aua le femoumouai lou olaga, Ae ia e matua tumau ma le le faagaetia, I lo tatou Alii o Iesu Keriso. O ia o le atoatoa o mea uma, o lana pule foi e aoao I mea uma.

Aso Sa: 4 Aokuso 2019

Mataupu: O AI LOU TUAOI?

Tusi Faitau: Luka 10: 29-37

O le tala ua masani ai le tatou faalogo ma le faitau. Ae taua lo tatou toe sailiili ma sutesue poo a nisi o aoaoga taua o afifi i lenei tala. O le sini ma le fa’amoemoe o lenei mataupu, ia toe faamanatu ia i tatou o tatou tuaoi.

Faatinoga o le Mataupu:

1. O le a uiga o ia upu: *o le fesili faafiatonu ia Iesu.*

2. O le faataoto o loo taua ai le sa Levi ma le osi taulaga. I le faataunuuna o tiute ma nafa o i laua, e leai se eseese tele. O i laua uma o tagata e galulue mo le Malumalu o le Atua.

O le fesili faatupu manatu: *Aisea ua le ta’ua ai le sa Levi ma se tagata mauoa. Poo le osi taulaga foi ma se tagata mativa. Ao lea ua ta’ua uma le sa Levi ma le osi taulaga i le faataoto lea e tasi?*

3. Aisea na le fesoasoani ai le sa Levi ma le osi taulaga i le tagata manua?

4. O ai lou tuaoi i le finagalo o Iesu?

Fesoasoani mo le Mataupu:

1. *O le fesili a le taulealea ia Iesu.*

➤ O loo taua le fesili a le taulealea ia Iesu, o *le fesili faafiatonu*. O lona uiga, e le o se fesili e fia malamalama moni, ae o se fesili e saili ai sona lelei i le va ma Iesu.

➤ O le fesili ua iloa manino ai se tasi o talitonuga o loo tuaoi ai tagata Iutaia ma tagata o nuu ese. O le talitonuga o tagata Iutaia, e le aofia tagata o nuu ese i le faaolataga. O i latou o tagata Isaraelu, o tagata ia na osi feagaiga ma le Atua i le Feagaiga Tuai. O nuu ma tagata e ese mai le fanau a Aperamo, o tagata o nuu ese i latou. E oo foi i tagata o nuu ese, ua latou talitonu foi e i le tuaoi o i latou ma tagata Iutaia – *Ioane 4:4-15*. Peitai, e le o le finagalo lea o le Atua e pei ona iloa i le faataoto ua faamatalaina.

2. *Aisea ua ta'ua faatasi ai le sa Levi ma le osi taulaga i le faataoto?*

E eseese lava manatu faaalua o le au suesue e uiga i le faataoto leni:

➤ O le faamatalaina o le upu *tuaoi* i le Feagaiga Tuai, e faasino tonu i le va feagai o le tagata Isaraelu ma le isi tagata Isaraelu – Levitiko 19:18. E le aofia ai tagata o nuu ese. O lona uiga, o le fesili o loo faasino lava i

tagata Isaraelu. O le sa Levi ma le osi taulaga o galuega ia e patino i tagata Isaraelu/Iutaia.

➤ Ua manatu nisi, o le tali a Iesu o loo faasino tonu ia i latou o loo faalogologo atu ia te Ia.

➤ Ua manatu nisi, o le sa Levi ma le osi taulaga e eseese le faataua ma le faamamafa o galuega. E eseese foi tulafono e puipuia ai ia galuega. O le sa Levi, o le tagata e lei avea ma osi taulaga, e tatau ona faamamalu i le tulafono. O le osi taulaga o le tagata ua faamauiina le sao mai le tele o tulafono e tatau mo le au sa Levi.

➤ Ua manatu nisi, o sa Levi ma tagata osi taulaga e tele ina latou uia le ala lea i Ieriko. E seasea foi ona osofaia i latou e tagata faomea, aua o tagata faomea, o tagata Iutaia lava. Ua latou iloa e le tatau ona osofaia tagata ua galulue i le malumalu.

3. *E i ai mafuaaga na mafua ai ona le fesoasoani le sa Levi ma le osi taulaga:*

O le talitonuga faaIutaia, o sa Levi ma osi taulaga, o tagata e tatau ona paia mo le galuega a le Atua. E i ai foi tapu ma aiaiga e tatau ona usitaia e faatumauina ai le paia o tagata ia. E aofia i lea tapu le faasa ona tagofia e se sa Levi poo se osi taulaga o se tagata manua poo se tagata oti. Afai ae soli lea tulafono, ona aveesea lea o tofi mai ia te oe, pe faasala foi i ni faasalaga i totonu o le sosaiete.

4. *O ai lou tuaoi i le finagalo o Iesu?*

O lou tuaoi i le finagalo o Iesu, o soo se tagata. E taulia i le Alii poo fea e te sau ai, ao fea e te alu i ai. O le a lau galuega. O a tapu ma aiaiga o lou valaauina. O le measili i

le finagalo o Iesu, o le alofa. O le alofa lena e mafai ai ona tutusa tagata uma i lau vaai. Poo a foi tapu o lou valaauina. O le a foi tulaga taualoa i le faalapotopotoga o loo e i ai, e mafai lava ona e pa'i atu i le tagata manua ma tago atu i le tagata ua oti pe afai e te lotoalofa.

O le faataua lea o lenei faataoto. O le alofa. O le alofa e le na o upu. Ao le alofa e o faatasi ma galuega. Silasila i galuega na faatino e le Samaria agalelei:

1. Ua fusifusi i manua o le tagata ua tali oti
2. Ua liligi i ai le suauu ma le uaina– suauu taugata
3. Ua faatietie le tagata manua i lana manu ae savali – e le iloa poo le a le mamao o le ala
4. Ua ia totogi mea uma mo le togafitiga o le tagata manua.

O le alofa e le na o upu, ao le alofa e o faatasi ma faatinoga. O ai lou tuaoi?

Taoto pea i lau Susuga i le fai mataupu ni aoaoga taua ua maua i lenei tala.

Faamanatu: O lou tuaoi tagata uma

Aso Sa: 11 Aokuso 2019 (Aso Sa Tama)

Mataupu: E AFUA MAI MAUGA MANUIA O AIGA

O le Aso Sa lenei o loo faamanatu ai le taua o nafa faatama i totonu o aiga, o nuu ma ekalesia, faatasi ai ma soo se faalapotopotoga. O se aso e fai meaalofa ai le tina

ma fanau i tama, e fai ma alofaaga o le sao taua o tama i ona nafa faataitai.

O le mataupu o lenei aso, o le a tatou sailiili ai i nisi o tama o loo taua i le Tusi Paia, na o latou taitai o latou aiga i manuia o le Atua.

Faatinoga o le Mataupu:

1. Vaevae i vaega e lua: Sailiili i nisi o tama o le Tusi Paia ua taua i lalo ma lo latou fesootaiga i le Manatu Autu.

1. Aperaamo – Kenese 12: 1-9

2. Iosua – Iosua 24: 14-15

3. Konelio – Galuega 10:1-8

4. Sakaio – Luka 19: 1-10

O le fa'amoemoe, ia toe faamanatu mai e tala ua filifilia le taua o taitaiga lelei i totonu o aiga. O upu e masani ai: E afua mai mauga manuia o aiga. O loo faalupe tama, o le ulu o le aiga. O ia e palasi i ai le mamafa o faatinoga ma faaiuga e faia aua le manuia o aiga, nuu, ekalesia ma le atunuu.

Aso Sa: 18 Aokuso 2019

**Mataupu: O LE ALA I LE PULE (faaeaina)
O LE TAUTUA; O ALA O LE PULE
(faatinoina) O LE TAUTUA**

O le upu *tautua* o loo taua i fuaitau nei e lua, o loo faasino i le *tautua faamaoni*. E i ai le eseese o fuaitau o loo taua i luga. (1) O le ala i le pule o le tautua: e faapaleina oe i le avea ma Pule pe afai e faamaoni lau tautua. (2) O ala o le Pule o le tautua: - o le Pule e tatau ona faamaoni lana tautua i ona tagata o loo pulea.

Faatinoga o le Mataupu:

1. Vaevae le Autalavou i vaega e lua – tofua le vaega ma le fuaitau e faamalamalama.

Vaega 1 – 1. O le a le uiga o le fuaitau: O le ala i le pule o le tautua.

2. O a ni tala o le Tusi Paia e lagolago ai le mau

Vaega 2 - 1. O le a le uiga o le fuaitau: O ala o le pule o le tautua

2. Saili ni tala o le Tusi Paia e lagolago ai le mau.

Fesoasoani mo le Mataupu:

(1) O LE ALA I LE PULE O LE TAUTUA - Mataio 20: 25-28/Efeso 2:10

A fia avea ma pule, e tatau ona tautua faamaoni. A fia avea ma muamua e tatau ona tautua. O le tasi lea o lu'i taua o le ola talavou o le tagata. Ina ia faamaoni i le faiga o lana tautua aua e mulimuli ane ua faapaleina i ni suafa taua o aiga ma nuu. O nisi o tagata e avea le tautua e fai ma

faapogai o le faapaleina i ni tofiga taualoa i totonu o faalapotopotoga.

Peitai, ua ese foi nei aso. Ua tele lava le suiga ua i ai faigafilifiliga a tagata. O nisi o filifiliga ua faavae lava i le tagata e lelei le aoga ma tele tusi pasi ae le'i tautua. O nisi ua faaoga le tele o le tamaoaiga ma tupe e maua ae le'i tautua.

Fesili mo le Talanoaga: O tumau pea le faamaoni o lenei fuaitau po ua le toe faaogaina.

(2) O ALA O LE PULE O LE TAUTUA – Eperu 13:7

O le Pule, o ia lea o le taitai o tagata uma. E tatau foi ia te ia ona fai ma faataitaiga mo ona tagata- Lead by Example/Walk the Talk. E tatau ona ia faaaoao le tautua faamaoni i ona tagata. E pei lava o upu e masani ona faalogoina: E afua mai mauga manuia o soo se nuu. O taitai o i latou ia e manuia ai tagata uma. Pe afai e manuia a latou taitaiga.

O le faataitaiga sili lea na faia e Iesu. O ia o le Atua ua liutino tagata, o Ia o le Pule o Pule ae na ia auauna mo ona tagata. E tiga lava ona inosia ma amusia o Ia e tagata, ae na fai lava lana tautua mo le faaolaina o tagata uma.

Fesili mo le talanoaga:

(1) O i ai ni taitaiga faapea i nei aso?

(2) E faapefea ona tatou maua o ni taitaiga faapea?

O le mea mautinoa, o le tagata e tautua faamaoni e faapaleina i manuia o le Atua. Poo le pule poo le tautua, o

le faamaoni ma le faatuatua i le Atua e sili lea i soo se mea.

Faamanatu: Ia avea i tatou o ni auaua faamaoni mo le Atua

Aso Sa: 25 Aokuso 2019

**Mataupu: O REPEKA MA LANA FAATONUGA IA IAKOPO
(Vaaiga i le lotoifale o aiga – va o matua ma fanau)**

Tusi Faitau: Kenese 27: 1-17, 41-45.

Kenese 27: 1-5, o loo taua ai le faatonuga a Isaako ia Esau e tapena se meaai manogi mo ia ona faamanuia atu lea. Fuaiupu 5-10, o loo taua ai le faatonuga sa faia e Repeka na suia ai le taunu'uga o le faatonuga a Isaako mo Esau. O aafiaga o le gaoiga lea ua faia e Repeka e aofia ai mea nei:

1. Ua usitai Iakopo i le faatonuga a Repeka, e ui o lea ua ia iloa le sese o le mea o le a faia e lona tina – f 11-17
2. Ua olegia/pepelo e Iakopo lona tama o Isaako ona o Repeka: f. 18-24.
3. Ua tupu le feitagai i loto o tama ona o Repeka – f.41.

O nisi ia o mea taua e fia oo i ai le tatou talanoaga o lenei Aso Sa. O se tala ua masani ai, ae taua foi le toe iloilo ma talatalanoa poo a nisi aoaoga taua o afifi ai i lenei tala mo i tatou.

Faatinoga o le mataupu:

Debate/Finauga – Vaevae i tama ma teine. Silasila i le lotoifale o aiga Samoa i le va fesootea o matua ma fanau e fesoasoani i le finauga o le a faia.

O nisi ia o fesili e taiala ai le tatou finauga.

1. O se gaoiga e tatau ona faia e se tina o se aiga le mea lea na faia e Repeka i lana fanau? Ua ia faatonu Iakopo e aumai se manu e tapena ai se meaai mo Isaako ina ia maua e ia faamanuiaga? *Tama – Leai, e le tatau. Teine: Ioe e tatau.*

2. Sa tatau ia Iakopo ona usitaia le faatonuga a Repeka pe leai? *Tama – Ioe e tatau ona usitai, Teine – Leai sa tatau ona le usitai.*

3 f. 21-24 o loo taua ai le iite o Isaako i le sese o le mea lea ua faia. O le a sou lagona, sa tatau ia Isaako ona faatuai lana faaiuga ma ana faamanuiaga seia mautinoa ua sa'o atoatoa lona masalosalo o loo i ai? *Tama – leai, aua le faatuai. Teine – Ioe, sa tatau ona faatuai.*

Ia manino i tali a vaega taitasi ni mafuaaga maumaututu e faavae ai o latou manatu. e fai ma faataitaiga o mea o loo tutupu, o mea o lea a tutupu ma mea foi sa tutupu. Saunia pea lau susuga i le Faimataupu e faamalamalama tali ua tuuina mai aua ni aoaoga mo le Autalavou.

Fesoasoani mo le Mataupu:

O le toatele lava o le au faitau Tusi Paia o loo faapea mai: *e sese Repeka*. O le mea lea na ia faia, e le o se mea e tatau i se tina o se aiga. Aua o lea ua aliali ai lona faitama faapito ia Iakopo. O le isi itu, o le gaiogia lea sa faia e Repeka na mafua ai ona tupu le feitagai i loto o tama ia e toalua – f. 41-45

Peitai, o loo finau nisi e faapea: O Iakopo lava ia e manuia lona olaga a’o Esau, o se tagata na ona vaavaai ma faalogo i faamanuiga ae le fai mo ia. E faavae lea finauga i le Kenese 25: 19-26.

O i o loo faamauina ai le fetalaiga a le Atua ma lana polokalame e taunuu i ai Esau ma Iakopo. O manuia e tatau ona maua e Esau, e mulilmuli ane ua manuia ai Iakopo. E i ai vaaiga i le soifuaga o le auuso lenei o loo fai ma molimau o lea finauga:

1. O le faoa o le tofi ulumatua. – Kenese 25: 27-34.

E moni lava o loo tuuaia e nisi Esau i lona le manatu mamafa i lona tofi ulumatua lea na ia faatau atu ia Iakopo i le fia’ai, peitai, o vaega uma na o le polokalame a le Atua mo Esau. O ia o le ulumatua, ae lē inu i faamanuiga o le tofi ulumatua.

2. O le ulumatua ae fai ava i fafine o nuu faapaupau – Kenese 26: 34-35

E toalua fafine o loo taua i le tala – o Iutiti le afafine o Peeri le sa Heti ma Pasameta le afafine o Aluna, o le sa Heti. O fafine e tapuai ma ifo i tupua mamate. E le taumate ua faapena foi lona auaiga atoa, aua o lea ua 40 ona

tausaga. O le tasi lea vaaiga o le le manuia o Esau, aua o lea ua faaipoipo atu i fafine o nuu ese. Ua le tapuai i le Atua o lona tama o Isaako. O le ifo i tupua o se faatinoga e le fiafia i ai le Atua.

3. O le faatinoga na faia e Repeka lona tina – Kenese 27:1-27

O loo manatu nisi, e leaga le mea ua faia e Repeka. Peitai, e auai lagona o le tatou mataupu i le finau o nisi o le au suesue o le Tusi Paia, o loo faapea: *O le gaiogiga a Repeka o se vaega o polokalame a le Atua mo Esau ma Iakopo* – E mafai ona faamalosi lea finauga, pe afai tatou te toe to manatu i le manuia na oo i ai Iakopo. Aua o le talitonuga masani lava, afai e le auai le Atua i se mea, e le manuia foi lona taunu’uga. Ae a faaauau pea le faitau i le tala ia Iakopo ma le taunu’uga o lona olaga, o se tagata manuia tele. O le faatinoga lea a Repeka i le manatu o nisi, ua se faitotoa na auala atu ai Iakopo i manuia o le Atua o loo faatalitali mai mo ia i fafo atu o lona aiga.

Faamanatu: Ia alolofa i matua

Aso Sa: 1 Setema 2019

Mataupu: O TAULAGA ESEESE I LE FEAGAIGA TUAI.

E tele nisi tusitusiga a le au suesue o le Tusi Paia e uiga i faigataulaga o le Feagaiga Tuai. O le molimau a le Tusi Paia, e tele ituaiga taulaga eseese na faatinoina e Isaraelu. E eseese foi taulaga ma o latou fa'amoemoe e faia ai.

I le aotelega o suesuega a le au suesue o le Tusi Paia, e faatatau i taulaga eseese na faia e Isaraelu, e lima vaega tetele o loo mafuli i ai ia sailiiliga:

1. Taulaga Mu – Burnt Offering
2. Taulaga i Meaai – Grain Offering
3. Taulaga o le Leleiga – Peace Offering
4. Taulaga o le Agasala – Sin Offering
5. Taulaga mo le ua ta'usalaina – Guilt Offering

O le fa'amoemoe o lenei mataupu, o le toe faamanatu o ituaiga taulaga ma lona aoga e pei ona faatinoina i le Feagaiga Tuai.

Faatinoga o le Mataupu:

1. E fautuaina le faia o kopi o le fesoasoani mo le Mataupu ua saunia poo se isi lava faiga (Projector) e mafai ona faitau ma fefaasoai faatasi le Autalavou.
2. O loo i ai tusi o le Tusi Paia, o loo faavae ai le tatou mataupu. E lelei foi le faitau ma talanoa e malamalama atili ai.

Fesoasoani mo le Mataupu:

1. Taulaga mu – Burnt Offering:

O le faamoemoe o le taulaga mu o le taulaga e mo le togioala lautele o le agasala ma le faaaliga o le faamaoni i le

Atua. O loo faamauina i le Levitiko 1: 3-17 faatonuga mo le faataunuaina o lenei taulaga. O le taulaga e mafai ona faaoga ai le povi (1: 3), mamoe po o 'oti (1:10), po o le lupe (1:14). O le manu e tatau ona susunuina atoa i le po (6: 8-13), ae aveese le pa'u ma tuuina atu i le faitaulaga (1: 6). Kenese 22 o loo faamanino ai ma faamautu ai, e le taliaina e le Atua ni taulaga mu e faia ma faaoga ai fanau. O le tasi lea finauga e teena ai le taulaga lea e tele tusitusiga na faia e Iefata i lona afafine. E lei susunuina le afafine o Iefata ae na ofoina e auauna i le Atua i lona olaga atoa.

2. Taulaga i Meaai – Grain Offering:

O faatonuga mo taulaga i Meaai o loo faamauina i le Levitiko 2. O le fa'amoemoe o lenei taulaga, o se faailoga o le agaga faafetai o le tagata soifua ona o le foai ma le agalelei o le Atua. E masani ona tunu falaoa (2: 4), kuka (2: 5), falai (2: 7), pe faia foi i le cereal (2:14). O le taulaga mu – burnt offering e susunu atoa le manu, ao le taulaga i meaai e susunu na o se vaega ao vaega e totoe e tuuina mo ositaulaga mo a latou mea'ai (2:10). E ui lava o loo iai le saolotoga o le tagata e faia ai o lana taulaga, peitai, ua talia lautele lava le tatau ona ofoina o uluai fua – first fruits o faatoaga ma mea e te maua e fai taulaga ai i le Atua (Ken 4: 4). O manu pepeti ma fua aupito sili ona lelei o le faatoaga o mea e tatau ona ofoina mo le Atua.

3. Taulaga o le Leleiga – Peace Offering: Levitiko 3, 7:12

O le faamoemoe o le taulaga o le leleiga o se avanoa lea e faalelei ai ni tagata na feeseeseai. O loo taua na talanoaina

muamua i le Levitiko 3, e aofia ai Taulaga o Aso Faafetai (Lev 7:12), Taulaga o le Lotofuatiiaifo (7:16), ma Taulaga lulu (7:30). O le taulaga e mafai ona faaoga ai le povi (3: 1), mamoe (3: 7), po'o se 'oti (3:12). O soo se manu e faaogaina (poa/fafine), ae e tatau ona aunoa ma se faaletonu. Afai o se Aso Faafetai, e mafai ona aofia ai ni falaoa eseese (7:12). E faia le taulaga ona faaiu lea i le taumafataga, e aai ai tagata uma ua auai i lea aso. E aai ma talatalanoa i nisi o auala e toe fa'aleleia atili ai le auunaga i le Atua Soifua. O le fatafata (breast) o le manu e faaogaina i le taulaga e tuuina atu i le ositaulaga sili (7:31). Ao le vae taumatau o le manu e tuuina atu i le ositaulaga e faia le taumafataga (7:32). O meaai e totoe e tatau ona susunuina pe a mae'a aso e lua (7:17).

4. Taulaga o le Agasala – Sin Offering:

O le faamoemoea autu o lenei taulaga e le o le togiolaina mo agasala ae ia faamamaina le tagata mo le toe ulufale atu i le Afioaga o le Atua. E eseese lava faaupuga e faaogaina e faaigoa ai lenei ituaiga taulaga. O nisi o taimi ua faaupu o le – Taulaga o le Faamamaina o vaivaiga ma mea ua le atoatoa ai le tagata soifua i le va fesootea ma le Atua (Levitiko 4: 13-14, 4: 22-23). Aemaise lava i le itu faaleagaga o le tagata. O nisi o taimi ua faaigoaina o le taulaga o le togiola o agasala e lē iloa –unintentional sin pea afai o le itu faaletino (Levitiko 4: 2-3, 4:20). O elemene o le ofoina atu o le Faamamaina e mafai ona avea ma se tasi o elemene o taulaga muamua e tolu, e ui lava e

le pei o le Peace Offering, o le taumafataga e le tatau ona tufatufaina e le tasi o loo ofoina atu le taulaga.

5. Taulaga mo lē ua ta'usalaina: Guilt Offering: Levitiko 5:14-19, 14:12-18, 1:1-7

O le fa'amoemoe o lenei taulaga, ia faatauina le tagata ua tausalaina mai le leaga ae ia toe aumaia o ia i le mafutaga a tagata ua faapaiaina mo le Atua. O le taulaga e foliga o se tau e faatau ai le tagata ua agasala ina ia mafai ona toe faamamaina mo le galuega a le Atua. E lua tala faamauiina i le Tusi Paia o loo taua ai ia taulaga: Levitiko 19: 20-22, Numera 6: 9-12. O lenei ituaiga taulaga e moomia pe afai e faia e le tagata mea nei: 1. faaleagaina pe tagofia mea ua faapaiaina mo le Atua – Holy Things. 2. Ua le faamaoni i lana tautinoga na faia i le Atua. 3. Ua faaoga fua muamua –first fruits o lana faatoaga ae le ofoina mo le Atua. 4. Ua faaoga mea ua taua ai igoa o le au ositaulaga. 4. E mafai foi na ofoina lenei taulaga pe afai ua tupu se maseiga ma le isi uso a tagata. O le taulaga e faaogaina ai se manu lelei (povi poo le 'oti), manu e le'i amo avega. E totogi foi le 20 pasene agai i le ositaulaga o mea ua faaleagaina pe afai o i ai ni meatotino na faaleagaina. Afai e le maua se manu e osi ai le taulaga, e mafai ona aumai le tau o le manu i tupe siliva. O le toto o le manu e sausau ai tulimanu o le fata faitaulaga.

O nai fesoasoani ia mo le fai mataupu. Ae talitonu o le a tele pea le silafia pe afai e faitau ma sailiili i tusi faavae e pei ona tuuina atu.

Peitai, o ia taulaga eseese na faia e tagata, e le mafai ona faatusaina i ai le taulaga na saunia e Iesu Keriso mo le lalolagi atoa. O le maliu o Iesu Keriso, ua atoa i ai taulaga eseese na faia e le tagata.

Faamanatu: O le taulaga e le faatusaina, le taulaga na saunia e Iesu Keriso mo i tatou.

Aso Sa: 8 Setema 2019

Mataupu: AISEA NA TEENA AI E VASATI LE FAATONUGA A ASUERU LE TUPU?

Tusi Faitau: Eseta 1: 1-22

O le tusi faitau mo le tatou mataupu, o loo faamatala ai le aveesea o le tofi masiofo o Vasati ona ua ia teena le faatonuga a le tupu e pei ona taua i le fuaiupu 11-12. O le aveesea o le tofi masiofo o Vasati, o se faaiuga na fautuaina ai Asueru e lana au faufautua ma ua malie foi i ai lona loto.

O le talitonuga o le au faufautua a Asueru, o le teena o le faatonuga e le masiofo, o se luma o le tupu pe afai ae iloa e tagata o le malo ma nisi tagata. Peitai o loo faamauina e nisi o suesuega a le au suesue o le Tusi Paia, e i ai le mafuaaga na teena ai e Vasati le poloaiga a le tupu. O le mataupu o lenei aso, o le a tatou faitau ai ma sailiili i le mafuaaga na teena ai e Vasati le mafuaaga e pei ona taua i

molimau a le au suesue o le Tusi Paia. A maea ona tatou toe talanoa lea i le faaiuga na faia e Asueru ma lana au faufautua pe sa'o pe leai foi.

Faatinoga o le Mataupu: Faamasinoga i le va o Vasati ma Asueru.

1. O le tatou mataupu e faatino faapei o se faamasinoga. Ua oo mai le tagi a Vasati e uiga i le faaiuga a Asueru na faia ia te ia.

Itu tagi: Teine – faaulu le tagi i le faamasinoga e sese le faaiuga a Asueru ua faia ona o nisi o mafuaaga – silasila i le fesoasoani mo le itu tetee o loo taua i lalo e tau faufau ai ni mafauaaga o le mafuaaga ua le usitaia ai le faatonuga a Asueru.

Itu tetee: Tama -latou te lagolagoina le faaiuga ua faia e Asueru e pei ona taua i le tala. Mo le itu tetee i le tagi, e tumau pea le lagolago i le faaiuga. Sa tatau lava ia Vasati ona usitai i le faatonuga.

Faamasino: O lau Susuga i le Faiaoga

Fesoasoani mo le Itu Tagi – Vaega a Teine.

O le faaiuga a Asueru ma lana au faufautua o loo finau le toatele o le au suesue o le Tusi Paia, o se faaiuga sese. E mafai ona faaaoga le upu – ua matuia tele. O se faaiuga ua sili ona ogaoga pe a toe faitau ma iloilo i le mafuaaga na lē usitaia ai e Vasati le faatonuga/poloaiga a le tupu. O le mafuaaga o loo lilifa i ai manatu o le au suesue o le Tusi Paia o loo faapea mai:

Ua usitai Vasati i le tulafono a Metai ma Peresia. O le tulafono a Metai ma Peresia e lē tatau na soli/auai se masiofo/toalua faaipoipo i taimi o fiafia/inugaava malosiuaina a le tupu ma nisi tagata. Pau lava i latou e soli/auai pe afai e manao i ai le tupu i le taimi o tafaoga, ua na o i latou ua tā'ua o palake (concubines – auauna fafine/teine e tali ai le manao o le tupu ma ana uo – e le o ni fafine/teine ua faaipoipo).

O le tulafono o loo puipuia ai le mamalu tauave o le masiofo o le tupu aemaise o le va fealoaloai ma isi tagata. O le fa'amoemoe ia aua lava nei tasina le mamalu o le masiofo i luma o tagata aemaise o tagata ua tagofia le 'ava. Peitai o le faatonuga a le tupu, o loo faasino tonu lava ia Vasati: *“ia au mai le masiofo o Vasati i luma o le tupu, ma le palealii o le masiofo, ina ia faaali atu lona lalelei i le nuu ma alii; aua e lalelei lava o ia. –f.11”*

I le talitonuga o i latou o loo faapea mai e sese le faaiuga a Asueru ma lana au faufautua na fai, o le mafuaaga lea o le lē usitai o Vasati. O loo silafia lelei e Vasati, e le tatau ona ia soli/auai i le fiafia o loo faia a Asueru ma ana uo. Afai o se faatonuga a Asueru, o lona uiga ua ōnā le tupu. Aua e le taumate ua loa foi ona iloa e Asueru, e le tatau ona ia aamia Vasati i se taimi faapea. Peitai, ua galo lea tulafono ona ua ōnā i le uaina. O le pine faamau o le iloa o Vasati ma le iloa lelei e Asueru o lea tulafono a Metai ma Peresia, o le tausamiga lea na faia e Vasati ma fafine na o i latou–f.9. O loo taua i le fuaiupu e 9, o le tausamiga na faia i le

fale o le tupu o Asueru. O le faailoga lena, o le talia e Asueru o le fiafia lea a Vasati ma fafine na o i latou.

O loo finau nisi ma faapea mai, sa tatau ona usitai pea Vasati ia Asueru, o le tali: E lē suia e se isi tulafono a Metai ma Peresia. E tusa lava poo le usitai i le tupu ma lana faatonuga, o le mea mautinoa, e le mafaia lava i se isi malosiuaina ona suia tulafono a Metai ma Peresia. O Vasati foi i lona talafaasolopito, o se teine e tupuga mai le aiga taualua ma le tele o le tamaoiga. O ia o se tamaitai o le nuu. Ua leva ona aoaoina lona olaga i tulafono a lona nuu o Metai ma Peresia.

O nisi ia o fesoasoani mo le itu tagi e lagolago ai le latou mau uiga i le faaiuga ua faia e Asueru. O loo i ai foi le fa'amoemoe o le mataupu e mafai lava ona aumai ni vaaiga faalotoifale o Samoa e faatusatusa i ai le mataupu ua talanoaina.

I le faaiuga o le finauga, e tatau ona manino ni aoaoga taua mo le tupulaga talavou mai lena finauga.

Afai e sa'o Asueru o nisi ia o aoaoga e mafai ona aoao mai mo i tatou:

1. Ia tatou faalogo ma usiusitai i o tatou taitai.
2. Aua le faaalua so tatou iloa i se auala e faamaina ai o tatou taitai.
3. Usitai muamua, faitio mulimuli. (ma isi aoaoga)

Afai foi e sa'o Vasati, o nisi ia o aoaoga mo i tatou:

1. Aua le faia onana a tatou faaiuga faia. (E faia le faaiuga a Asueru o loo ōnā i le uaina faapea foi i le au faufautua).

2. Ia faautauta lelei a tatou faaiuga, aua e tele lona aafiaga mo le tagata ua aafia pe afai e le sa'o. (atonu na toe malamalama ae le mafaufau o Asueru, ua aveesea tofi masiofo o Vasati)

3. Aua le faia a tatou faaiuga ona o le vaaiga a tagata. (Ua manatu le au faufautua a Asueru, o le luma ma le tauvaley o le malo ma le tupu, pe a le faateaina Vasati mai lona tofi masiofo. (ma isi aoaoga e iu i ai le talanoaga – f. 15-22).

Ma nisi lava aoaoga e maua mai le finauga – debate o le a faia. Ia manuia le mataupu.

Aso Sa: 15 Setema 2019

Mataupu: O AAPO MA TULAFONO A LE ATUA

Tusi Faitau: 1 Tupu 21: 1-14

O loo fefuliai pea faalaaui mamafa le tulafono i le lisiina ma le umia o fanua pulea saoloto e o tatou tagatanuu. Ua tele foi sailiiliga ma tusitusiga e uiga i lenei tulafono. Peitai, e mau eseese lava le atunuu. E tonu foi le tagata ia i ona manatu. O le tala ua filifilia o le tala ia Napota ma lona teena o le manao o le tupu e faatau atu le fanua o ona matua.

O le teena e Napota o le manao o le tupu, o loo faavae i lona iloa: O Fanua o le tofi o le tagata mai le Atua. O fanua o meaalofa mai le Atua mo le tagata. E tatau foi la i le tagata, ona faapelepele i ona fanua.

Faatinoga o le Mataupu:

1. Ia faitau le tala ma tali i le fesili lenei:

a. O a ni tulafono o tulafono e 10 – Esoto 20 ua soli ma lē usitaia e Aapo ma Iesepela?

e. O le a se fesootaiga o le tala i le fanua o Napota ma le tulafono o le lisiina ma le pulea o fanua umia saoloto e o tatou tagata Samoa?

Fesoasoani i le Mataupu:

E fa tulafono o tulafono e 10 ua soli ma le usitaia e Aapo ma lana masiofo fautua leaga o Iesepela.

1. O le tulafono e sefulu (10) – Aua e te manao i le fale o lē lua te tuaoi, aua e te manao i le ava a lē lua te tuaoi, po o lana auauna tane , po o lana auauna fafine, po o lana povi, po o lana asini po o se tasi mea a lē lua te tuaoi.

➤ O Aapo o le tupu, e tele lona tamaoiga ae le'i atoatoa ai lona fiafia. O le tasi aso, ua manatu le tupu e fai se togalaaui 'aina – vegetable garden e siosio ai lona maota ina ia matagofie atili. Ao lona tuaoi o Napota. Ona talosaga lea ia Napota. E lua vaega o le manao o Aapo:

1. Ia avatu se isi tovine e sili atu e sui ai le tovine o Napota ae aumai le fanua.

2. Ia faatau mai le fanua i se tinoitupe e manao ai Napota.

Peitai, na teena e Napota le talosaga atu a le tupu.

➤ Peitai, e le'i fiafia Aapo i le tali a Napota. O le fesili: aisea ua le fiafia ai Aapo i le tali a Napota, ao lea ua manino au o fala i le mafuaaga o le teena o le talosaga: (1) o le fanua o le tofi mai le Atua. (2) O fanua e mo fanau i le lumana'i.

➤ O le tali: Ua manao tele le tupu. Ua le faamalieina le manao i mea ua maua. Ua manao fua i le fanua o le la te tuaoi.

O le a se manatu o le Autalavou i le tali lea a Napota ma le tulafono o le lisiina ma le faatau atu o fanua pulea saoloto?

2. O le tulafono e iva (9) – Aua e te molimau pepelo i lē lua te tuaoi.

➤ Ua iloa e Iesepela le mea ua tupu, ona ia fafau lea o le togafiti ina ia maua ai e i laua le tovine ma le fanua. F.5-10, o loo faamatala ai gaioga piopio na faia e le masiofo. Ua tusia le tulafono ae faamau faailogaina i le faailoga a le tupu e faapea: Ia anapogi tagata uma. Peitai, ua ave fatasi ai ma le manao, ia faia ni tuuaiga sese ia Napota ina ia fasiotia ai o ia. O le na molimau pepelo ai isi taulelea ulavavale e toalua e uiga ia Napota ua faifai i le Atua. O tuuaiga sese ma molimau pepelo ona o le manao ua le faamalieina.

3. O le tulafono e ono (6) – Aua e te fasioti tagata

➤ Ua avea le molimau pepelo ma ala ua fasioti ai Napota. Ua latou fetogi i maa i tuāpa. O le fetogi i maa i tuapa, o le faasalaga faalutaia mo e ua agasala. E i ai i latou o e

faatuatua ua fetogi i maa, ona ua tauagasalaina i latou i le manatu o tagata.

4. O le tulafono e valu (8) – Aua e te gaoui.

➤ Ua mavae le oti o Napota, ona ave faamalosi ai lea e Aapo ma Iesepela le fanua o Napota. O le ave e aunoa ma se maliega ua faia, o le ave faagaoui lea. O le manatu o Aapo ma Iesepela, o le fanua ua la ave faamalosi e umia saoloto e Napota. Peitai, na manino lava le tali a Napota: *Ia faamamao e le Alii ia te au ona ou avatu ia te oe le **tofi** o ou tamā.* O lona uiga, o le fanua ma le tovine e pule ai le Atua.

➤ O le upu '**tofi**'- inheritance e pei ona talanoa Napota e uiga faatasi ma le upu Eperu o loo faaliliuina - o faamanuiaga/matupalapala/measina mai le Atua.

O le tali ua atagia ai le ola mata'u o Napota i le Atua. Ua silafia lelei e Napota, o le poloaiga mai le Atua – *ia aua nei faatauina fanua, a ia faato mo a outou fanau – Levitiko 25: 23-28.*

O le tali a le tagata ua ia faasilisili ma faapelepele i le fanua/tofi/matupalapala mai le Atua i loo tupe e faifai uma. O le tali a le tagata e alofa moni i lona aiga ma lana fanau. Aua e mavae atu o ia, ae fai ae tupulaga e fia ma fia o lona aiga.

O le lu'i lea o lenei tala mo lenei vaitau i le fetuleni mai o tulafono e aafia ai le lumana'i manuia o fanau. Mo i tatou le tupulaga talavou, ia faaeteete ma faautauta le tatou faataau. Alolofa i fanau tuputupuae o aiga. Aua le matapeapea i tupe ma le tamaoiga aua e le umi. Ao fanua

ma suafa o aiga, o measina/tofi/matupalapala/faamanuiaga mo nei, taeao e oo i le faavavau.

O le tali a Napota, o le tali a le tagata alofa, e le o se tete e i le fingalo o le tupu, ae o le manatu alofa i lona aiga mo a taeao. Manuia le mataupu.

Faamanatu: Faaaoga tatau faamanuiaga a le Atua ua i ou aao.

Aso Sa: 22 Setema 2019

**Mataupu: O LE AGAGA FOAFOA I PESE
(The Creative Spirit in Songs)**

O le mataupu o lenei Aso, ua faaaogaina ai le pepa o sailiiliga na saunia e le Susuga ia Eroni Sitanilei (AM) – EFKS Toamua, mo le Mafutaga a le Matagaluega a Faleata i le masina o Iulai 2018.

Faatinoga o le Mataupu:

E fautuaina le faia o ni kopi o le pepa. A maea ona faitau ona tuuina lea o le avanoa mo ni fesili.

O le pepa ua vaevaeina i ni vaega tetele se lima (5):

1. O LE AGAGA FOAFOA O LE ATUA.

E tele tala o le Tusi Paia, o loo taua ai galuega na faamaite e le Agaga Foafoa o le Atua, peitai o le tala o le foafoaga, o le uluai vaaiga lea i le silisili ese ma le matautia o

galuega a le Agaga Foafoa o le Atua. *Kenese 1: 1-2 - (faitau e le Autalavou)*

O loo taua le Agaga o le Atua sa *fegaoioiai* i luga o le fogatai. I lomiga faaperetania o le Tusi Paia, e eseese¹ lava upu faaperetania o loo faaliliuina mai ai le upu samoa lea o le *fegaoioiai*. I le gagana Eperu (uluai gagana na faaliliuina ai le Tusi Paia) o loo faaaogaina le upu – *me-ra-he-pet*. I le *Teuterenome 32:11* – (*faitau e le Autalavou*), o le *me-ra-he-pet* o loo faamatala ai nafa faamatua o le aeto mo lana fanau/toloai.

O le faapepepepe a le aeto, e le na o le sauni e tuvae i lona ofaga. Peitai, o le faapepepepe o loo i ai faatasi ma nafa faamatua: e vaavaai totoa poo saogalemu ma lelei mea uma mo lana fanau/toloai. E foliga faapea le galuega a le Agaga Foafoa o le Atua sa faia i le amataga. Sa *fegaioioiai* i lana silasila toto'a. Sa tapena ma tusitusi le ata (plan, design) o le foafoaga. Ao lei oo mai le aso, ua uma ona ia faataoto mea uma i le faagasologa e tatau ona fai ai.

O le itu matautia e pei ona taua i le tala, o auala na tino ai ia galuega Foafoa. O mea uma o le foafoaga o lana fetalaiiga mamana na tino mai ai: “*Ua fetalai atu...ona i ai lava lea*”. Seia vagana ai le ituaso na faia o le tagata e tauluga i ai galuega o le foafoaga. Na faia ai e le Atua le tagata mai le eleele. Ua suia ai le eleele mate e pei ona i ai, i le eleele ua i ai le ola. Ua le o se eleele foi o toe gugu, pei

¹King James Version- *moving/moved*, New International Version (NIV) – *hovering*, New Revised Standard Version (NRSV) - *swept upon*.

ona muai i ai, a ua i ai lona leo ma lana gagana. Ua i ai lona tino, o le mafaufau ma lona agaga aua ua manava i ai e le Atua le manava ola. O le molimau a Kenese, ua lelei ma atoatoa mea uma. O lona uiga, ua leai, leai lava se mea o toe faaletonu. Ao ia mea lelei ma mea matagofie sa amatamea ma faamaite e le Agaga Foafoa o le Atua sa fegaoioiai i le fogatai.

2. O LE AGAGA FOAFOA O LE TAGATA mai LE AGAGA FOAFOA O LE ATUA

E i ai le talitonuga o le Agaga Foafoa o le tagata, e tupuga (originate) mai le Agaga Foafoa o le Atua. O se meaalofo foaifua mo le tagata mai le Atua i le amataga.

1. Kenese 1: 26, 28:

E lua ni vaaiga taua e manatu lenei pepa na mafai ona maua ai e le tagata le Agaga Foafoa o le Atua.

(a) Na faia le tagata i le faatusa o le Atua.

(e) Ua faamanuia le Atua ma tuu atu le *pule* i le tagata mo le faaaogaina ma le faaigoaina o le foafoaga. O le *pule* ua tuuina atu i le tagata, ua faaliliuina: o le *tausi mea a le Foafoaga a le Atua (stewardship of the Creation)*. O le fa'amoemoe maualuga, ia lē gata e faaaogaina ma le tatau le foafoaga ae ia teuteu ma ia faatumauina e le tagata le matagofie o le foafoaga e pei ona muai faia ai e le Atua. I le faatinoina ma le faataunuina o ia nafa tauave, e tatau i le tagata ona i ai le *poto ma le mafaufau lelei*, e fuafua tatau ai ana galuega o lea aso ma lea aso.

E ui ua i le tagata le *pule* e faatino ai ana galuega, peitai, o le tofiga ma le valaauina o mea ia e *pule* ai le Atua. O le

poto ma le mafaufau lelei e faatino ai ia galuega e aumai mai le Atua. E tele tala o le Tusi Paia o loo faamaonia ai lenei mau. (Silasila *Kenese 4:21, Esoto 31:1-5*)

3. O LE AGAGA FOAFOA I PESE: Pese e amatamea ai le Agaga Foafoa o le Atua

O le a taoto ia le taua o pese faalelalolagi poo pese faasalamausau, e ui o loo iloga foi lo latou taua. Ae mo le fa'amoemoe o lenei taumafaiga, o le a faasino tonu lava i Pese poo Viiga mo le Atua. Mo le Tusi Paia lava ia, o Iupalu² le tupuaga o tagata musika/pese. E selau lima sefulu (150) pese ua mafai ona tuufatasia i le Tusi o Salamo. Ae le faitauina ai isi pese o loo taua i nisi o tala o le Tusi Paia³.

O nisi nei aoga o le Pese/Viiga mo le tagata faatuatua:

1. O le pese e fai ma vaifofo –1 Samuelu 16: 14-23. O le tala masani i le faitau ma le faalogo. O le tala i le faaaogaina o le potu ma le taleni o Tavita i musika ma pese e fai ma vailaau e foia ai le loto ita o le tupu o Saulo. Ua toe faamanatu mai, e mafai e upu malie ma le fati malie o le pese ona aveesea le ita mai le loto o le tagata, ae faatumulia i le fiafia/olioli. Lea lava o loo molimau lenei soifuaga i le faaaogaina o Pese ma Viiga a le tatou Ekalesia i taimi o maliu. F.t. 225 (Pese ma Viiga)

²Kenese 4: 21 “O le igoa o lona uso o **Iupalu** lea; o le tupuga ia o i latou uma o e fai kitara ma faaili.”

³Feagaiga Tuai: Pese a Miriama - Esoto 15:1-21, Pese a Mose - Teuterenome 32:1-43, Pese a Tepora- Faamasino 5, Pese a Hana - 1 Samuelu 2:1-10, Pese a Tavita - 1 Samuelu 18: 7 ma isi. Feagaiga Fou: Luka 1: 46-55 – Pese vivii a Maria, Luka 1: 67-79 – Pese a Sakaria.

2. O le tatalo ua lagiina faapese i le Atua pe a feagai ma puapuaga – Galuega 16:25. O le tala ia Paulo ma Sila ao i ai i le fale puipui. Na pepese ai ma tatalo i le Atua mo se fesoasoani. Na faafuasei ai ona lulu o le mafuie tele ma matalatala ai le falepuipui ma maunuunu ai o latou noanoaga uma lava.

3. Pese o Viiga (Songs of Praise) - Salamo 145: O le viiga ua lagiina e le tagata soifua mo le Atua ona o le matagofie ma le maoae o galuega a ona aao e ala i le foafoaga.

4. Pese o le Loto Faafetai (Songs of Thanksgiving) Salamo 100 - Ua manatu nisi o le au suesue o le Tusi Paia, o pese o le loto faafetai o loo mafuli lava i le fiafia/olioli o le tagata soifua ona o le tausiga ma le leoleoga a le Atua ia te ia. E moni lava o loo aofia ai foi ma le agaga faafetai ona o le siosiomaga ma manuia mai le Atua, peitai, o ia mea e autasi lava i le tausiga malu a le Atua ua saogalemu ai lona ola mai le fili ma ana faiga.

5. Pese o Auega (Songs of Lamentation) Salamo 142 - O pese o auega o loo faamauiina ai le aioi atu ma le faatoga mamate o le tagata soifua i le Atua mo se fesoasoani. O faigata ma faiga a le fili ua lofia ai le tagata faatuatua, ona tagi lea ma aioi i le Alii e ala atu i le pese.

O nisi ia o pese ua filifilia peitai, e tele ma anoanoai isi pese o loo taua i le Tusi Paia, o loo afifi ai se feau taua mo i tatou o tagata faitau ma tagata faatuatua. E pei lava ona taua muamua, o pese uma lava na te aumaia se faamalosi, o se faalototele, o se faamafanafanaga poo se isi lava feau

taua mo le tagata soifua, o pese ia ua tusia ma fatuina i le Agaga Foafoa o le Atua.

4. AOTELEGA O MANATU O LE PEPA:

I le faaiuga o lenei sailiiliga ua manatu ai le pepa e faapea:

1. O le Agaga Foafoa e pei ona taua i le Manatu Autu, o loo faasino lea i le Agaga Foafoa o le Atua ua faaosofia ai le tagata e fatu, usu ma ta le PESE.

2. O le Agaga Foafoa o le tagata o se meaalofa foaifua mai le Atua i le amataga.

3. O le Pese na te faatupu le malosi, o le olioli ma le mafanafana i le tagata soifua.

4. “E Lauga le PESE”

5. FAATATAU:

Ua lē masino le tele o PESE ua outou faafofoga ma tatou faalogo i ai. O le upu moni, e le o pese uma foi e mai le Agaga Foafoa o le Atua. Aua o lea foi e faalogoina pea pese faatupu vevesi, pese e faaali ai le lē fiafia o le isi i le isi. O pese o loo fa’ailoa ai le malosi faaletagata ma isi lava pese e manatu lenei taumafaiga e le’i amatamea pe na faamaite e le Agaga Foafoa o le Atua. E taua ai le toe faamanatu mai o lenei pepa, ina ia silasila totoa ane i le taua o pese o loo tatou fiafia e faalogo ma faafofoga i ai. Afai o ni pese e liua ai se agaga mo le Atua ma lona malo, o pese na e tatau ona tatou pepese uma ai. Silasila ane i le taua o viiga ma pese i taimi o sauniga. O nisi o pese lotu ua faaaoga fati faasalamausau e usuina ai. O nisi foi o taimi ua le manatu mamafa i le saunia lelei o pese mo le lotu. Ao lea ua faamanatu mai lenei pepa, e le itiiti le taua o Pese i

le taimi o Sauniga Lotu. E faafetaia ai foi le galuega sa fitaituga i ai tama ma i latou na tuufaatasia le Tusi Pese a le tatou Ekalesia. Aua o Pese o loo i ai, i ona fati ma ona upu, o Pese lava na faamaite ma amatamea ai le Agaga Foafoa o le Atua. O i latou foi o loo i ai le taleni i le musika, o lea ua faamanatu mai, ua tofia ma valaauina i tatou e le Atua mo lea galuega taua. E taua ai le faatino ma le faamaoni o lea galuega. Ma ia atagia ia tatou galuega le Agaga Foafoa o le Atua mo sona viiga, ae aua mo i tatou. **O LE AGAGA FOAFOA O LE ATUA I PESE, ua se faitotoa o lana faaolataga mo e ua mafatia ma lagona le vaivai. Ao le maliu ma le toe soifua mai o Iesu Keriso, o le faavae mautu lea o le PESE o le MANUMALO ua pepese ai nei le au faatuatua uma, aua ua manumalo lo tatou Alii mai le oti ma le tuugamau.**

Faamanatu: Avea lou ola o se Pese mo le Atua

Aso Sa: 29 Setema 2019

Mataupu: O LE TUSI I EKALEZIA I FILATELEFAIA

Tusi faitau: Fa'aaliga 3: 7-13

O le Ekalesia lona ono lenei o ekalesia e pei ona tatou susesueina mai le Aso Sa ua tuanai.

Faatinoga o le Mataupu:

Sailiili ma tali i fesili ua tuuina atu:

1. O le a le uiga o upu o loo faamatala ai Iesu i le amataga o le tusi? f. 7
2. O a galuega lelei ua faia e le Ekalesia?
3. O le a le faafitauli o loo feagai ma le aulotu?
4. O a faamanuiaga mo le tagata usita ma le faasalaga e oo i ai le tagata le usitai?

Fesoasoani mo le Mataupu:

O Filatelefaia o se 'a'ai e tu i luga o se nofoaga e le saogalemu. O le nofoaga e faigofie ma a'afia gofie i mauga mu ma mafui'e. O le 'a'ai o lo'o tu ai se sunako ua fa'aigoaina o le sunako o Satani. O lea sunako e ta'ita'ia e tagata ua fai mai o latou o Iutaia, ma o le latou galuega o le fasiotia lea o tagata ma le tapua'iga fa'a-Kerisiano. E le o se 'a'ai e to'atele ni tagata e nonofo ai, ma e vaivai foi lona tamaoaiga.

1. "Ia e tusi foi i agelu a le ekalesia o i Filatelefaia. O mea nei ua fai mai ai "*Le pa'ia*", o le "*Fa'amaoni*" ia, o le ua i ai le "*ki a Tavita*", o le na te talā, a e leai se na te fa'amauina; o le na te fa'amauina foi, ae leai se na te tatalaina"

O fa'aupuga ia o le Pa'ia ma le Fa'amaoni, o lo'o fa'atatau i a Iesu Keriso. Ae o lo'o fa'atatau foi i le Atua, e pei ona ta'ua i le mata'upu 6:10. O lo'o aumai ai se ata manino o le Atua ua tasi ma Iesu. O le upu Fa'amaoni o lo'o fa'aalia

ai le fa'amaoni o Iesu i ana fetalaiga ma ana mea uma e fai.

Ki a Tavita: E uiga tutusa lava le fuaitau lea ma le fa'a'upuga o lo'o i le mata'upu 1:18 o le tusi lava lenei i Fa'aaliga, ma le 'upu o lo'o tusia i le Isaia e 22:22. O le pule po'o le malosi o lo'o i a Iesu Keriso na te taofia ai pe 'ave'eseina mea leaga uma mai i le ulufale atu i le 'a'ai a Tavita, le Ierusalem fou po'o le ma lo o le Mesia.

v.8,9: O fuai'upu nei o lo'o fa'amanino ai le mea o lo'o ta'ua i le fuai'upu e fitu. O i latou ua latou faimai o Iutaia i latou, o le a 'ave'eseina ma lē toe iloa i lea ta'uga. Aua o lo latou sunako ua ta'ua o le sunako o Satani.

Sunako o Satani: O le igoa ua fa'aigoaina ai e Iesu le sunako o tagata Iutaia, o ē ua latou tete'e i le finagalo o le Atua, ma latou faia galuega leaga e fa'apologaina ai ma saisaitia ai le 'au pa'ia po'o tagata kerisiano.

O le fuai'upu e 9 o lo'o fa'amanino mai ai e Iesu, e i ai le aso o le a fa'atuina ai le malo o le Mesia, ma o le a va'ai tino ai foi le au tete'e, i tagata kerisiano o ē na latou sauaina, ua fai i latou ma tagata fa'amaoni e 'au'auna i le Atali'i o le tagata, ma avea ai i latou ma tagata o le malo o le Atua.

v.10. "Ua e tausia le upu o lo'u onosa'i, o lea foi ou te tausi ai ia te oe i le ituaso e tofotofoina ai, a o'o mai i le lalolagi uma, e tofotofo ai i ē o nonofo i le lalolag".

"O le aso e tofotofoina ai": O le aso lea e lavea'iina ai tagata kerisiano mai i sauaga ma mea tiga e faia e tagata

leaga, ae lē o le aso o le fa'amasinoga a le Atua i le lalolagi.

v.11. "Fa'auta, ou te vave alu atu; ia e taofi i le mea ua ia te oe, ne'i avea e se tasi lou pale".

O le lapataiga mo se mea o le a tupu i se taimi vave. O lona uiga e le toe aoga se moe, ae ia mataala ma tumau.

v.12. "poutu o le malumalu": O le mata'upu e 21:22, o lo'o fa'amanino mai ai e leai se malumalu. Peita'i o le Atua, ma le tama'i mamoe i le Ierusalem fou i le lagi. O le manuia e maua e i latou o ē tumau pea i le fa'atuatua ma le talitonu i le Atua ma lona Alo o Iesu.

"ou te tusi foi i ai le suafa o lo'u Atua": o le fa'aauuina o fa'amanuiaga mo i latou e tumau ma onosa'i, e avea i latou ma tagata o le maota i le lagi po'o le malo o le Atua le tupu.

A'oa'oga:

Ia avea i tatou ma talavou e tumau i le ola mamā ma le fa'atuatua fa'amaoni i le Atua. O le ola i a Keriso e fa'apaleina ai i tatou i manuia e tele o le Atua.

Aso Sa: 27 Oketopa 2019

Mataupu: FAATĀUA LE ASO SA

Faatinoga o le mataupu:

Ia vaevae le autalavou i vaega se tolu, ona o lea e su'esu'e i tusi e pei ona avatu i le mata'upu. Ia fa'aali ni finagalo o vaega taitasi e fa'atatau i le autu, pe a maea suesuega.

Fesoasoani mo le fai mata'upu:

O le Aso Sa po'o le Sapati, ua fa'aliliuina mai i le upu Eperu o lona uiga o le *"malolo"*. O le fa'amoemoe o le Atua na afua ai ona malolo i le Aso fitu, o se ata fa'ata'atia lea ua finagalo ai le Atua, e ao ona mulimulita'i i ai le tagata ma mea uma o lana foafoaga.

Malologa i le Aso fitu: *"The Sabbath Day"*: (Kenese 2:3&4)

O le Aso fitu, o le aso lea na malolo ai le Atua mai ana galuega uma na fai. E le i fa'apea na vaivai le Atua na afua ai ona malolo. Peitai, ua silafia e le Atua, ua uma le foafoaga ma ua leai se isi mea o totoe, Ua lelei ma atoatoa mea uma. Ona finagalo loa lea o le Atua, o le a fai se aso malolo, e fa'amanatu ai le foafoaga ua maea. *"A day to celebrate the creation that was already and well done"*. O le aso o le manumalo a'ia'i o le Atua i mea o le foafoaga.

Tausaga lona fitu: *"Sabbatical Year"*: (Teuteronomie 15:1-16:21)

O le tausaga lea e ta'ua o le tausaga lona fitu po'o le tausaga fa'a-le sapati, ua fai ma tausaga e malolo ai tagata atoa ma mea uma o le foafoaga. Ua faia lea tulafono ina ia malolo ai e le gata i le tagata, ae fa'apea fo'i i manu ma le laueleele.

O le tausaga lea e fa'asaoloto ai le auauna ma le pologa e lona matai. E le toe galuea'iina ai foi le lau'ele'ele mo ni mea toto, ae fa'apena foi ona malolo ai le povi ma le asini ma isi manu mai i le fa'afaigaluegaina. E faigaluega mea uma nei i tausaga e ono, ae o le tausaga lona fitu, o le tausaga lea e malolo ai i latou mai a latou galuega.

O lona uiga o le tausaga o le fa'amanuia ma le fiafia ina ua mae'a le tele o galuega na feagai ai i tausaga e ono. E le gata la ina fiafia tagata, fa'apea foi i manu ma la'au ma le lau'ele'ele. *"The seventh year is the year of celebration, not for man only, but all the creation"*. O le aso o le manumalo o mea uma na faia e le Atua.

O le Aso Sapati fou: *"The new Sabbath Day"*: (Eperu 4:1-10)

E pei ona ta'ua i luga, o le upu Sapati, o lona uiga o le malolo. E le o le aso fitu po'o le Aso Sa. Ae o le aso malolo, e pei ona malolo ai le Atua mai i ana galuega o le foafoaga. O le fa'amanuia mo le galuega ua mae'a ma ua atoatoa. Ua leai se isi mea e toe fa'aopoopo i ai pe ave'ese foi, aua ua atoatoa lelei, ma o le uiga foi lea o le numera fitu, o le numera atoa.

O le mea mautinoa, e toatele pea tagata o lo'o le malamalama i le uiga o le suia mai o le Sapati mai i le Aso fitu, agai mai i le Aso Sa e pei ona i ai nei. E pei ona ta'ua i le tusi i le au Eperu, o le malologa o loo taua i le Kenese, o le malologa a le Atua ina ua uma ona faia o le lalolagi ma ua atoatoa. O le finagalo la o le Atua, ia fa'apea foi ona ola le tagata. Ia galue ma malolo. O le fa'asaina e le Atua

o le Aso fitu e fai ma aso malolo, o le fa'amoemoe lava, ina ia galue le tagata i ana galuega i aso e ono, ae malolo atu i le Atua i le Aso Fitu. O lona uiga o le Aso lea e fa'amanuia (celebrate) fa'atasi ai e le tagata ma le Atua galuega ua mae'a o le vaiaso, ma toe fa'afou ai le malosi mo feau o le vaiaso fou.

Peitai, ona o le galuega o le fa'aolataga na saunia e Iesu Keriso, fa'atasi ai ma lona toetu manumalo, o le ala lea na suia ai loa le Aso Sapati mai i le Aso lona fitu, i le Aso muamua o le vaiaso. Aisea? Aua foi o le aso lea ua mae'a ma ua lelei atoatoa le galuega sa feagai ma Iesu. Ua fa'amauiina o le aso ua uma ai le tiga o le tagata i galuega I le ola nei, ae ua avanoa o ia mo le malologa lelei I le Sapati e faavavau ua saunia mo le au faatuatua.

O lona uiga o le Sapati e fa'avavau ua le gata e mo le malologa i le tino, ae ua faapea foi ma le agaga. O le ala lea ua faamamaluina ai e Ekalesia Kerisiano uma le Aso

Sa e pei ona I ai nei e fai ma aso malolo, o le aso o le famanuia (celebration) ina ua toetu manumalo ai lo tatou Alii o Iesu, ua ia aumai ai le malologa sili mo i tatou uma e talitonu ma fa'atuatua ia te ia.

Faamanatu: Ia e manatua le Aso Sa e te faapaiaina.

Aso Sa: 3 Novema 2019

Mataupu: O LE A LE TAULAGA E MĀLIE I LE ATUA?

O le masina lenei o faigataulaga o le Tala Lelei faasolo atu ia Novema o le isi taulaga tele – Taulaga Samoa. E maua fo'i le manatu, ua loa ona silafia le taua o le ola faitaulaga i le Atua. Peitai, o loo lagonaina pea le tuufesilisili pea o nisi po o le taulaga e mālīe i le Atua?

Ua tupu se manatu ina ia tatou fefaasoa'i i nisi nei o fesili o loo faalogoina pea i lenei vaitau o faigataulaga e ui ua tatou iloa ma aoaoina i le taua o le ola faitaulaga i le Atua.

Faatinoga o le Mataupu:

E lelei pea le fai faafinauga le mataupu – debate. O le vaega e LAGOLAGOINA fesili ua tuuina atu ma le vaega e faapea mai e TETEE.

E lelei foi le aumai o ni mau mai le Tusi Paia e lagolago ai finauga a vaega taitasi.

O nisi o tusi o le Tusi Paia e fesoasoani i le finauga:

1. Mataio 12: 41-44
2. Eperu 13: 15-16
3. Roma 12:1
4. Galuega 20:35
5. Teuteranome 8:18
6. Faataoto 3:9

Fesili:

1. E malie i le Atua le taulaga e maua mai fua o au galuega sa atiae: faatoaga, lafu manu ma oloa e gaosi ma faatau atu, poo le taulaga e faia i nonogatupe/loan mai faletupe?
 2. O le faifeau e tatau lava ona tele lana taulaga i lo o tagata uma?
 3. E malie i le Atua le taulaga e faia e isi (tupe lafo mai atunuu e mamao) ae tusi ai le igoa o le isi tagata?
 4. E tatau lava ona lau taulaga i luma o le aulotu.
 5. E tatau ona faasili atu le taulaga o le tausaga lenei 2019 i loo le taulaga o le 2018.
 6. O le a sou manatu – Se mea tatau lea faaupuga: *Pau lava o mea ua aumai e le Atua e osi ai le taulaga?* Silasila i le tagata e tele lona tamaoiga ma le tagata e utiuti le faasoa.
 8. O le a le uiga o le fai le mea sili mo le Atua i lou manatu?
- O nisi ia o mataupu poo ni fesili foi o loo tuu fesilisili ai pea le toatele e uiga i le ola faitaulaga i le Atua. O le fa'amoemoe ia lava lo tatou iloa faatagata o le EFKS i le uiga loloto ma le taua o le faitaulaga i le Atua.

Ia tapena pea lau susuga i le fai mataupu e tuu faatasi manatu o le Autalavou ma ia manino itu e taua ai le faitaulaga i le Atua. Ia manuia le mataupu

Faamanatu: O soo se foi e ta'ua ai le suafa o le Atua, o taulaga ia ia te IA.

Aso Sa: 10 Novema 2019

Mataupu: 'AUA LE TAGA'I I LE LAU A MANU AE SILASILA I LE FAAMULI O ATU (Tautua ma le loto faatuatua i le Atua).

O le mataupu o lenei Aso ua faaaogaina ai le alagaupu o alofaga – tuligaatu e tau faamatala ai le ola tautua lotu o o tatou tagata EFKS i nei aso. O le upu moni, ua tele ina lagonaina le iu leo o le tomumu ma le faitio i mea fai a le lotu. Ua avea foi ia faitioga ma ala ua fultua ma liu lotu ai nisi o tagata. O le fa'amoemoe o lenei mataupu, ia aoaoina pea le Autalavou i le taua o le tautua e faia ma le loto faatuatua: E le taua ai le lau a manu, ae faamuamua le faamuli o atu.

Faatinoga o le Mataupu:

1. Talanoa i le uiga o le alagaupu: Aua le tagai i le lau a manu ae silasila i le faamuli o atu.
2. O a ni tala o le Tusi Paia o loo atagia ai lenei tala ma le alagaupu.
3. O a ni aoaoga e fesootai ma le olaga tautua o loo tatou faia nei.

Fesoasoani mo le Mataupu:

O le masani o alofaga o le gatai fale, o le lau a manu o le faailoilo lea e iloa ai e tautai le nofoaga tonu o loo i ai le mafua o ia. Poo fea lava le mamao ma le soua o le vasa, ae

a iloa loa le lau a manu, e taufaialo uma sa o tautai ina ia maua ni ia o le faiva. O fea lava la e aga i ai le lau a manu e tulituli lava i le malosi e alo le vaa. I le talitonuga, o loo tele le mafua o i'a. Peitai, o le mau a nisi o tautai o le vasa, e i ai taimi e le tele ai ni i'a o le mafua i le mea o loo tetele ai le lau a manu, ae tele i le faamuli o atu. O le faamuli o atu, o atu o loo mulimuli atu i tua o le lau a manu. O nisi o taimi e televave le lau a manu ae telegese nisi atu. O nisi o taimi e ese le mea o alu i ai le lau a manu, ese le mea o loo tetele ai atu. Lea e afua ai le fautua mai o nisi o tautai: *Aua le tagai i le lau a manu ae silasila i le faamuli o atu.*

O upu faufautua ina nei mao a luma i le tulituli o le lau a manu, ae mulimuli ane ua maumau le malosi. E taua tele ai le faautauta ma le silasila totoa ina nei taitaiina sese e le lau a manu.

Ua faaaogaina le alagaupu lea e tau faamatala ai nisi o manatu ma tuuaiga ua faalogoina e uiga i le soifua tautua i le Atua e ala atu i le lotu.

O nisi o tagata ua faape mai:

1. Ua fiu le tautua le lotu
2. O nisi ua faapea ifo: A ave uma ma le lotu ae faapefea ona aai le fanau?
3. A ave uma i le lotu, ae faapefea ona faaaogaa le fanau?
4. Ua pau o mea ua aumai e le Atua e fai ai le tautua?

O le a se finagalo o le Autalavou i ia tuuaiga ma lafoga ua faalogoina? O se mea tataua lea mea o le tuuai o le Tala Lelei i le lava o le faasoa ma le aai o fanau?

E eseese lava tali e mafai ona tali ai ia fesili. Ao le faataua o lenei mataupu, ia iloa e le Autalavou, *e le finagalo le Atua ia pologa le tagata ona o le Tala Lelei.*

2 Korinito 9: 7 – Foaia ma le lotu malie

O le soifua tautua ma le fai taulaga i le Atua, e faia i le mea ua ofoina ma le lotu atoa. O lou lotu fuatia ifo e lelei ae le o le faatauanau. O lona uiga, e leai se mea o le a tuuaia ai fua le lotu. Aua ua ia te oe le mafaufau lelei e fetuutuunai ai le mea e tataua ona fai. Afai ua lotu malie e ave mo le Atua e ala i le lotu, o le mea sili lena. I loo le ave, ae ese le mea o loo manatu i ai.

Mataio 6: 1-4: Ia foai ona o le alofa i le Atua

O nisi ua fua a latou taulaga i tofiga o loo i ai. O se faiga e taua, i le manatu, o tofiga ua maua o faamanuiaaga mai le Atua. E tataua ai ona foai le mea silisili mo le Atua o le na maua ai ia tofiga. Peitai, ua fai ma faaitauli i nisi o taimi, le avea o ia tofiga ma ala ua faatagata ai le foai mo le Atua. Ua tauau ina faataua ai tofiga ae faatuatuanai le uiga ma le aano moni o le ola faitaulaga i le Atua. O nisi o taimi ua foai faatusatusa i isi tagata. Ua foai ona o le tofiga ua maua ae le o le alofa i le Atua. Ona alilali lea o le vaivaiga le aua taatele nei: o le foai i le vaaiga a tagata. Peitai o le fetalaiga a Iesu, *pe afai e te faia le foai ia aua nei faalialia vale.* E le o faamalosiaga mai e Iesu ma faapea mai: *A fai le foai...o le faaupuga o loo faaaogaina...pe afai e te faia le foai...aua le faalialia vale.*

Galuega 20:35: E faamanuia le Atua i lau foai

Ia manatua o le foai mo le Atua, e le o se mea e faatauva. Ua loa ona fetalai Iesu, e sili ona manuia o le tagata e foai i loo le na te talia. O le foai o loo talanoa ai Iesu, o le foai ma le loto faatuatua. Tusa lava pe le lava lau faasoa, ae afai lava ua e foai ma le loto faatuatua e tali ma faateleina e le Atua. Ia manatua le fafine Sarefata ma lana foai na faia ma le faatuatua i le tagata o le Atua – Elia – 1 Tupu 17:8-24.

Faataoto 3:9 -10 – Foai i measilisili mo le Atua.

O le fautuaga a le Poto i le ola foai, ina ia faia i measilisili ua e maua. O le foai o measilisili ua e maua, o se foai e faigata ona faia faanatinati. E tatau ona fuafua ma mafaufau lelei poo fea a tua i ai leni foai. E le soona faia foi le ituaiga foai, seia vagana tagata ua pele i lou loto. O le mafuaaga lea o le faamanatu a le Poto, O le Atua o le Atua e alofa faamaoni i le tagata. O le Atua foi e tatau i ai le foai o measilisili. Afai e te foai au mea ua faapolopolo (measina/mea taua/taugata/anagata/measilisili) mo le Atua ma lou loto faatuatua, e toe faateleina ai ou fale saito ma ou manuia.

‘Aua le tagai i le lau a manu, ae silasila i le faamuli o atu’. Aua le faitauina lau foai o se mea ua maumau mo le Atua, ae ia tulimatai faamanuiaga a le Atua. Ua molimau le Tusi Paia, e le se mea faaleaoga lou tautiga mo le Atua. O le foai e faia ma le loto faatuatua o taulaga ia malie i luma o le Atua.

O Iesu Keriso i lana galuega faaola, na faatauva ai te ia le ma, o le satauro mataga ma le tuugamau pogisa, e le’i

solomuli ai le Alii, ae na onosai lava, ona o le alofa ia te oe ma a’u.

Faamanatu: E taua le lau a manu ae sili ai ona taua le faamuli o atu.

Aso Sa: 17 Novema 2019

Mataupu: E TATAU NEI SUIGA PE LEAI?

O le mataupu o leni Aso, o le toe silasila lea i nisi o faatinoga ua faaaogaina i totonu o tapuaiga, o loo tuufesilisili pea nisi o tagata lotu pe tatau ona faia pe leai. O ia faatinoga ua manatu le toatele, o suiga mai aso ua tuanai e faaaogaina ai le poto faatekonalosi – technology. O le itu o loo popole i ai nisi o tagata, o le avea o ia faiga/suiga ma ala e aveesea ai le mamalu o le tapuaiga. Ua avea le manaia o teuga ma suiga ua aveesa ai le agaga moni o le tapuaiga ua faia.

O ia faatinoga/suiga e aofia ai mea nei:

1. O le faaaogaina o projectors e fa’ailoa ai pese ma le gasologa o le tapuaiga. O nisi o taimi, ua avea le manaia o ata ma mea ua matamata ai tagata ae galo ai le lotu.
2. O le faaaogaina o instruments e ta ai pese lotu. Ua le faaaogaina ai taleni ta pese. O nisi o instruments e i ai taimi e le maua ai le agaga o le pese.
3. O le faaaogaina o fati faasalamausau e usu ai pese lotu – fati Lion King. Ua tele fati e masani ona faalogoina o fati

ai pese aualofa o le tama i le teine ae toe faaaoga e usu ai pese lotu.

4. O le faaaogaina o ipads ma telefoni e faitau ai le Tusi Paia ma usu ai Pese. Ua vaaia ua toatele nisi ua na o le telefoni ma le ipad e ave i le lotu ae leai se Tusi Paia ma se Pese. O fea o i ai le Afioga Paia a le Atua – o le telefoni poo le Tusi Paia e pei ona iloa ai?

5. O le faaaogaina o mea faifaili i pese lotu. O nisi o mea faifaili ua leotele. O nisi ua pao vale ma aveese ai le agaga o le pese.

6. Fausaga o Falesa: moli, faalo, pulelaa ma isi – pei ua le mamalu le falesa, ua pei se hotel

7. Teuga ma ie teu ai falesa. O nisi o teuga faaneionapo o ie mo falesa, ua pei ni teuga o se faaipoipoga poo se aso fialia.

O le mataupu o le aso leni, o le tatou faaso ma talanoa poo le a se finagalo o le Autalavou i ia suiga/faatinoga.

Faatinoga o le Mataupu:

Vaevae le Autalavou i vaega e lua. O le vaega e lagolagoina le faia o ia suiga ma le vaega e tetee i le faiga o ia suiga. Ia matua manino i finagalo faaalua itu e taua ai ia faiga ma itu foi e lape ai.

Fesoasoani mo le Mataupu:

O le fa'amoemoe o leni mataupu ia tatou talanoa pe aisea e tatau ai ona faia ia suiga i aso nei, ae aisea foi e le tatau ai ona tatou faia ia suiga. O le mea mautinoa lava, e lelei

suiga e fuafua i le vaitau o loo tupu ai. Peitai, e mafai ona lape pe afai e le faaaogaina tatau aemaise o le fuafua tatau agai i le siosiomaga (context) o loo faaaogaina ai.

Itu e taua ai suiga:

1. E taua projectors mo le faalauiloaina o pese mo tagata lautele e le o ni tagata EFKS o loo lolotu ma tapuai i le lotu. O le toatele o tagata e mafai ona avea le fa'ailoa o pese e faitau ma iloa ai le agaga o le pese.

2. O le faaaogaina o instruments, o se faiga ua faia e nisi o le au asafo e ta ma taimi ai le pese i le taimi e tasi - pe afai e ta toe taimi e le tagata e toatasi. O le isi itu taua o instruments, e mafai ona faaaogaina e nisi o tagata e le iloa ta laau mo latou pesepesega mo Aoga Aso Sa ma Autalavou.

3. E i ai lava fati e tatau, ae i ai foi fati e le tatau ona faaaogaina.

4. O ipads ma telefoni ua i ai lava polokalame e faaaogaina e faitau ai le Tusi Paia ma usu ai Pese. Afai o loo faaaogaina laupepa mai le laau e tusi ai pese ma lolomi ai Afioga Paia a le Atua, aisea la e le tatau ai ona faaoga telefoni ma ipads?

5. E aoga mea faifaaili ae ia faaoga tatau. E i ai foi leo ma mea faifaili e tatau mo pese taitasi ma o latou uiga. E le tatau foi ona ova atu le leo o drums i leo o le aufaipese.

6. O le falesa/malumalu e fai i ai le fai measili o le tagata. Afai e lelei ona fai hotels, aisea la e le tatau ai ona ova atu le falesa?

7. Ua i ai lava ie ma o latou lanu e faatauaina e le kalena lotu a le EFKS. O le tele o teuga, o le tele foi lea o le taugata. E tele foi le tomai ma le agavaa e faatino ai. O se faiga lelei, aua o loo faaali ai le taleni i teuga ma ie falesa. Ia fai lena ma ala e teuteu ai le malumalu. O le a le aoga e potu ai e teu faamanaia aso faamanatu ae le teu ai faapea le malumalu mo tapuaiga?

O nai faatupu manatu ia ina ia lautele ma malamalama atili le mataupu. E pei lava ona taua i le amataga, o le fa'amoemoe ia malamalama i tatou le talavou, pe aisea ua faaoga ai ia suiga ae aisea foi ua le faaogaina ai. E taua lo tatou fai mealelei mo le Atua, ae taua ai ona faia mo se viiga o le Atua ma ia aua nei aafia agaga lotu o tagata ona o sa tatou faatinoga ua fai.

Faamanatu: E tatau suiga mo le Viiga o le Atua ae lē o le tagata.

Aso Sa: 24 Novema 2019

Mataupu: O LE TUSI I LE EKALEZIA I LAOTIKAIA

Tusi Faitau: Faaaliga 3: 14 – 22

Manatu e fia faamamafaina: E faamasinoina oe e tusa ma au mea e fai.

O le tusi mo le ekalesia i Laotikaia, o le tusi lona fitu lea o tusi na poloai le agelu ia Ioane na te tusia ma tuina i Ekalesia e pei ona filifilia. O tusi e fitu i Ekalesia e fitu o tusi lava ia mo ekalesia uma i le lalolagi. I le manatu o le aposetolo o le faafitauli lea o loo tupu i lenei aulotu i Laotikaia, o tagata i le ituaiga o olaga lea, o lona uiga e le o tuuina atu atoatoa le lotu i le mea e fai poo tiute ua tofia i ai. E na ona fai o se mea, ae le o i ai atoatoa le lotu, ma o lona uiga foi la, e le i'u i se lelei lea faiga. O le ala lea o le tele o le faafitauli ua tula'i mai i lenei aulotu i Laotikaia. O le ala foi lea ua manatu ai lenei aulotu i ona tagata lotu, o latou ua atamamai i le faatuatua, ae latou te le o iloaina, o loo agai o latou olaga i le leaga ma le faafanoga.

Faatinoina o le Mataupu:

(i) Vaega I – Suesue i fuaiupu 15 & 16 ma saili poo le a tonu le uiga o ia upu a le Aposetolo

(ii) Vaega II – Suesue i fuaiupu 17 & 18 ma saili foi poo le a tonu le uiga o ia upu a le aposetolo

(iii) Vaega III – Suesue i fuaiupu 19 & 20 ma saili i uiga o ia upu

Aumai sailiga a vaega taitasi i luma o le Autalavou atoa ma fai se felafolafoaiga lautele e faafetaui ai nei suesuega ma lo tatou olaga ua i ai nei.

Fesoasoani mo le Mataupu:

O Laotikaia i lona tala faasolopito o se aai e tele lona tamaoauga i soo se itu. O le aai e taulai i ai le tele o

fefaatauaiga i le itu Asia. Ina ua aafia Laotikaia i se mafuie na faaleagaina ai le tele o lona malo, sa tóatele malo na ofoina atu le latou fesoasoani. Peitai, na teena e Laotikaia lea fesoasoani mai isi malo – imperial disaster assistance ae ua fausia lava e i latou le malo e faaaoga ai le tele o lona tamaoaiga. E lauiloa Laotikaia i le tele o fale gaosi oloa e pei o lavalava ma vailaau e gaosi ai vai e tului ai mata. O le talitonuga, o le vai mata muamua i le lalolagi, o Laotikaia na muai faia ai. O se malo foi e tele ona faletupe.

1. O le faafituali lea ua maua: Ua faaleogalua le olaga o tagata. O le taimi ua maalili, o le taimi foi ua vevela. Ua faaaoga ia fuaitau – maalili ma vevela e faamatala ai le ola le mautonu o tagata. E le tumau i se mea e tasi. O le faalotolotolua. O le taimi ua ioe, o le taimi foi ua musu. Ua leai se mautinoa e tutumau ai tagata i se mea e tasi.

I le finagalo o le Atua, e le o se mea lelei le ola femoumouai. O loo taulagi lava o i latou o tagata mauoa ma tagata e tele le tamaoaiga peitai, i le silafaga a le Atua ua faasolo atu Laotikaia i le malaia ma le faafanoga.

E sau le taimi e le toe mitamita ai i lona tamaoaiga o loo i ai. E faasolo ina tauaso, ao Laotikaia e gaosi ai le vailaau mo vai tului mata. E faasolo ina lē lavalava, ao lea e tele fale gaosi lavalava. E faasolo ina mativa ae tele faletupe. O puapuaga ia e oo i ai le tagata faaleogalua. O le tagata femoumouai i luma o le Atua e iu i le malaia ma le faafanoga.

O le feau o loo momoli i le ekalesia i Laotikaia: e leaga le ola faaleogalua. E leaga le ola femoumouai. Ae ia tutumau

tagata uma i le Atua e aeae ai i ona manuia ua saunia. Fetalai le Atua, ua na o Ia o loo i ai le vailaau tului mata e manino ai le vaai faaletino ma le vaai faaleagaga. O le ofu sisina o le ofu o le faaeaina, o le ofu e le pala. O le auro ua faamamaina e taugata ma anagata e faatuputeleina ai le tamaoaiga o lē ua ia maua.

O fesili e ta aofai ai le Mataupu:

- (i) O le a sau vaai i la tatou Autalavou, o i ai nisi o maua i lenei uiga vaivai o le ola faaleogalua?
- (ii) Aisea e leaga ai le ola faaleogalua?
- (iii) Afai o mea e te lulu, o mea foi na e te selesese mai, mata o se faiga lelei le lulu o le faaleogalua?

Saunoa faaiu lau susuga e faamamafa atili le fanau ma tupulaga le taua o le i ai atoa o le loto ma le agaga i le faatinoga o a tatou feau ma galuega ua tofia i tatou i ai e le Atua.

Faamanatu: A ua maalili ia matua maalili. A ua vevela ia matua vevela

Aso Sa: 1 Tesema 2019

Mataupu: O TATOU FOI O TAGATA VALAAUINA

Tusi Faitau: 1 Korinito 1:1-3

Fesoasoani mo le fai mataupu:

O fuai'upu muamua lava e 10 o le tusi muamua lenei a le aposetolo ia Korinito, e le itiiti ifo ma le fa'asefulu ona ta'ua e le aposetolo le suafa o *Iesu Keriso*. O le tusi muamua lenei ia Korinito e fai si faigata, ona na tusia i le taimi o le feagai ai o le aposetolo ma faigata. Ona la o ia faigata, o le ala lea o le matuā fa'amamafa e le aposetolo o le ta'ua o le suafa o Iesu Keriso i lana tusi.

O nisi taimi ia tatou, ua tatou taumafai e fo'ia o tatou fa'afitauli e ala lea i lo tatou fa'aaogaina o tulafono. Po'o tulafono a nu'u, tulafono a le malo, po'o tulafono foi o lo'o i ai i le Tusi Paia. O nisi foi taimi pe a feagai i tatou ma ni fa'afitauli ogaoga, e tatou te taumafai lava e fo'ia ia fa'afitauli i o tatou lava auala, ma lo tatou malosi fa'ale-tagata.

Peitai o Paulo e le i fa'apea. O ona fa'afitauli, sa ia fa'aaogaina le suafa o Iesu Keriso. E peisea'i o le fofu lea o ona fa'afitauli uma lava. Ae o le taumafai lava lea o le aposetolo, e fa'ailoa le malamalama o le satauro o Keriso ma lona alofa tunoa. E pei o le malosi lilo lea e fa'amoemoe tele i ai le aposetolo, e foia ai ona fa'afitauli ma faigata o lana galuega.

O le fa'ataimuaga la o le tusi lenei a Paulo, o lo'o atagia mai ai ni mea taua se lua.

(i) O lo'o fa'amatala mai ai e Paulo se mea e uiga i le Ekalesia. E le o talanoa mai Paulo i le Ekalesia i Korinito; ae o le Ekalesia a le Atua. O le manatu o le aposetolo, po'o fea lava le nofoaga e potopoto ai ni tagata ma fa'atu ai se

Ekalesia, o le Ekalesia lava a le Atua. E le o talanoa mai Paulo i le Ekalesia i Samoa, po'o Amerika Samoa; e nate le o aumaia foi se nofoaga ose Ekalesia, ae na pau le mea o lo'o fa'amanino mai e le aposetolo, o le fa'apotopotoga o tagata o e ua talitonu ia Iesu Keriso, o le Ekalesia lena a le Atua. Ae o le mea sili ona taua e tusa ma le manatu o le aposetolo, a tatou mafaufau i le ekalesia, e ao ona tatou manatua, o le ekalesia a le Atua, o le nofoaga lea e tu'ufa'atasia ai lana au paia e ui ini ese'esega.

(ii) O le isi vaega o lo'o atagia mai i le vaega lenei o le tusi faitau, o le Kerisiano to'atasi. (Individual Christian). Ma o lo'o fa'a-āta mai e Paulo ia te ia lava ni mea taua se tolu.

(a) "*v.1 ...na vala'auina i le finagalo o le Atua, e fai ma aposetolo a Iesu Keriso*". O le upu vala'auina i lona fa'aliliuina mai ai mai le gagana Eleni, o le vavae'eseina mo le Atua, ina ia paia, e ala lea i le ofoina atu o le ola mo Ia ma lana fe'au. O le avea ma Kerisiano, o le avea lava lea o i tatou ma tagata na maliu ai Keriso ma iloa lea mea, ma mautinoa, ua avea i tatou ma tagata o le Atua, ona o lena fa'aolataga.

(e) O lo'o fa'amatalaina manino mai i le vaega lea e Paulo, le vala'auina e fai ma tagata o le Atua. O le upu lea o le "vavae'eseina", ua fa'apena ona tatou fa'amatalaina ai se vaega o tagata, ua fa'apai'aina mo le Atua. Ma e le o mafai ona atagia ai le uiga ato'atoa o le upu vavae'eseina. O lea foi ua tatou manatu ai, o i latou ua ta'ua o ositaulaga, po'o faife'au, o tagata tonu ia ua fa'asino i ai le upu vavae'eseina. Peitai o lea ua fa'amanino mai i upu a le

apostolo, e le na oni faifeau ma ni a'oa'o ua ta'ua o tagata ua vavae'eseina mo le Atua. Ae o tagata uma ua fa'apai'aina ma fa'amamaina i le toto o Keriso, ma ua latou matuā talia Iesu i o latou loto, e aofia uma ai lava i le upu lea o le vavae'eseina. O lona uiga la, e aofia ai ma tatou.

(iii) O lo'o tautala Paulo i le Ali'i o Iesu Keriso, e le fa'apito ise tagata po'o se fa'alapotopotoga o tagata. *f.2.atoa uma ma e ua vala'au atu i le suafo o lo tatou Ali'i o Iesu Keriso i mea uma, o lo latou Ali'i atoa ma lo tatou*". O lona uiga e le o fa'apito le manatu o le apostolo ise vaega o tagata. Ma ose mea manaia lea i tagata Kerisiano uma ua iloa ai, e le na oni tagata ua fa'apitoa mo le galuega folafola o le Talalelei e ta'ua o ē ua vala'auina, ae o le vala'au e aofia ai tagata uma lava. Ua fa'ailoa mai ai foi le alofa o le Atua i tagata ta'ito'atasi uma, o ē ua ta'itasi ma alofa atu i le Atua..

A'oa'oga:

O le a'oa'oga taua o lenei mata'upu mo tatou le autalavou, ina ia tatou fa'atauaina lo tatou vala'auina fa'atama ma fa'ateine talavou. Fa'ataua fa'apefea? Aua ete manatu na o lou sau lava i le autalavou e te nofonofa ma e fa'alogologo i mata'upu o le Tusi Paia. Ae ao foi ona e lauga atu le Tusi Paia i tagata. Lauga fa'afefea? O a a'oa'oga a le Tusi Paia ua a'oa'oina ai lou loto, ona e tago lea e fa'atino i lou olaga.

Manatua, e i ai tagata e faigata ona a'oa'oina i le fa'alogo, ae faigofie ona talia le fe'au i o latou loto, e ala i a tatou

fa'atinoga. Ia atagia i o tatou olaga o aso uma, o i tatou foi o isi tagata ua vavae'eseina mo le Atua ma lana feau, ina ia fa'aolaina nisi tagata. Pei lava o le apostolo o Paulo, na faigata lava i tagata ona talia lana feau i le amataga o lana galuega, ona o le toatele o tagata ua latou iloa o ia o se tasi o tagata sa sauaina le aukerisiano. Peitai, o le fa'atinoga o lona vala'auina i le suiga o lana amio, na vave ai ona a'oa'oina tagata i lana feau ma liliu mai ai.

E fa'apena foi i tatou, e le mafai ona atoatoa lo tatou ola vala'auina, pe afai na o lo tatou lauga atu o le upu, ae tatou te le olaina i aso faiso'o.

Aso Sa: 8 Tesema 2019

Mataupu: O OE MA LE TAPA'A

“E TE OTI I LE TAPA'A” - o le tasi lea anavatau a le Soifua Maloloina o loo faaogaina e tuutiitia ma tafiesea ai le taumafa tapa'a. O se anavatau o loo faavae mai i le tele o suesuega faasaienisi ua iloa ai: e toatele i latou ua maliliu ona o le tapa'a. I se isi faaupuga lata mai o le manatu autu: E le aoga le tapaa i lou soifua maloloina. Peitai, o loo matauina pea i le taaviliga ma le soifuaga o aso uma. E i ai lava i latou o loo manatu e lelei le tapa'a. O le Mataupu o lenei Aso Sa o le debate/finauga e faaautu: O OE MA LE TAPA'A

Faatinoga o le Mataupu:

1. Vaevae i vaega e lua:

- vaega e taumafa tapaa – Ioe, e aoga le tapa’a.
- vaega e lē tagofia le tapaa – Leai, e leaga le tapa’a.

a. Ia manino i folasaga a vaega uma ni manatu e lagolago ai le finauga.

e. Ia faitauina ni mau mai le Tusi Paia e lagolago ai finagalo o vaega taitasi.

Fesoaoani mo le Mataupu:

O nisi nei o aoga o le tapa’a i le tagata e masani ona faalogoina e fesoasoani i le finauga. E aoga foi e tolaulau taitasi ae faaali i ai finagalo o le Autalavou.

- E manatu nisi o le tapa’a e maua se isi malosia faasili. E toe faaala ai mata. E mapu i ai pe a uma se galuega mamafa.
- O taimi o le mamafa o fuafuaga fai (pressure), o le tapa’a e mapu i ai
- O le tapa’a e maua ai nisi uo fou. O nisi o taimi e avea le tapa’a ma ala e masani ai ma isi tagata. O tagata ia e mafai ona maua ai se fesoasoani i nisi o taimi.
- O le tapa’a e faatupu fiafia – mo le tagata ulaula lava ia, a leai se tapa’a e pei e le fiafia. Ae a i ai le tapa’a i le ato, e fai mea fiafia lava i taimi uma – Faataoto 17:22
- E le oti se isi i le tapa’a. E oti le tagata ona ua tele mai e aafia ai lona tino. Ae le o le tapa’a.

➤ E le fuatia lou sao i le ola e faavavau i le ulaula poo le le ulaula. Ae fuatia lou sao i le ola e faavavau i au galuega faatino. E sili atu le tagata ulaula ae galue ma le faatuatua i loo le tagata e le ulaula ae le galue mo le Atua.

➤ O le oo uma lava tagata i le oti. E pule foi le Atua i le ola – Kenese 2:7. E maliliu tagata ulaula, e maliliu foi e le ulaula tapa’a.

Mo le vaega e tetee i le taumafa tapa’a. O nisi nei o mau mai le Tusi Paia e mafai ona fesoasoani e faalautele ai le mau.

- O le ulaula tapaa e na o le tagata ulaula e aafia ai ae aafia ai foi ma nisi o loo lagonaina le manogi o le tapaa - Roma 14:21, 15:1-2, Filipi 2:3-4.
- O le tapaa ua faaigoaina e nisi o le tupua – idol. Ua faamuamua ma faasili e nisi le tapaa i loo le Atua ma le Tala Lelei – Esoto 20:4-6
- ‘E te oti i le tapa’a’ – O le tapaa e maua ai le tagata i faamai eseeese e ono maumau ai le soifua. O lona uiga o le ‘tapa’a’ o se aupega na te faaoo le oti i le tagata. Ao le ula i le tapa’a, o le ioe lava lea e oti. Ao le tulafono e ono o loo faapea mai: Aua e te fasioti tagata – Esoto 20: 13.
- O nisi o loo faapea mai o le tapa’a e tuutiitia ai le mamafa o galuega ma fuafuaga a le tagata (smoking reléases pressure). O lona uiga e maua le malosia faasili pe a ula le tapa’a. O le fesili, ua le maua se

malosi faasili i le tatalo ma le talitonu i le Atua? – Filipi 4:13.

- E faaleagaina ai totoga o le tagata ma faavaivaia ai le malosi o le tino e tetee atu i faamai.
- E tele le tupe e faaaluina e le tagata i le tau o le tapaa. O lona uiga o tupe maumau ia.
- O le taumafa tapaa, e le o se mea e faigofie ona toe tuu. A oo loa ina fiafia i le tapaa, ona faigata tele loa lea ona toe fia fai se faiga e tuu ai.

O nisi ia o fesoasoani e faalauteleina ai le Mataupu. O le taumafa tapa'a e le o se Mataupu e fou i le faalogo.

A maea le finauga, ona fesiligia lea poo a ni aoaoga ua maua mai i lenei Mataupu.

Faamanatu: O lau filifiliga e te lelei ai, o lau filifiliga foi e te leaga ai.

Aso Sa: 15 Tesema 2019

Mataupu: O LE A SAU MEAALOFA MO IESU I LENEI TAUSAGA?

E manatu lava o lea ua tatou tu lalata i le vaitau o le Kerisimasi, o le vaitau o faigameaalofa. O le fesili ua mafai ma manatu autu, o se fesili e lu'i ai o tatou tagata galulue. O LE A SA TATOU MEAALOFA MO IESU MA LONA SOIFUA MAI?

Faatinoga o le Mataupu:

1. Tuu pea le avanoa i sui taitasi e faasoa ai se mea taua ua ia maua mai i totonu o mafutaga faaAupalavou.
2. Ta'u le meaalofa a le tagata ia ua ia finagalo e ave mo Iesu

Fesoasoani mo le Mataupu:

O le faaiuga leni o feau ma galuega faa-Aupalavou. E manatu ua tele ma anoanoai taumafa faaleagaga ua faatofutofusia ai i tatou i leni tausaga 2019. Ao le fesili lea: O le sau *meaalofa*. A tapena se meaalofa mo ni valaaulia, e saili lava e tagata ni oloa taugata ma anagata. O nisi o tagata ua faamau faailoga o latou igoa i luga o meaalofa. O le fa'amoemoe ia manatua pea lea meaalofa i taimi e faaoga ai. O nisi o tagata ua oo lava i taavale, o fanua ma isi lava meatotino taugata ona o le manatu alofa i le tagata o loo ave i ai le meaalofa. Afai foi e faatupe le meaalofa, o le mea mautinoa e le itiiti se tino i tupe e faaalu ai. Ma e le o se mea e fou leni mea o le fai meaalofa i o tatou tagata lotu.

E mafai foi ona faaupu a tatou taulaga o loo fai mo le Atua, o meaalofa mo le Atua e ala atu i le Ekalesia. O le ala lea e ofoina ai measilisili mo le Atua ma lana galuega. O le fesili la mo i tatou le Aupalavou: *E fia sau faigataulaga mo le Atua i leni tausaga? O a ni galuega mo le Ekalesia sa e tautiga ai i leni tausaga?* Afai e tele, ia viia le Atua, ae afai e faaletele ia toe sasaa le fafao ma toe timata le upega.

O nisi o tagata e faia tautinoga ma faapea mai, o le a le toe ulaula, le toe inu 'ava malosi ma nisi lava folafolaga ua fai ma meaalofo ma lenei tausaga. O le faamanatu: Aue le tauto pepelo. Ia manatua o tautinoga e faia i luma o le Atua, o tautinoga e ao ona tausia ma savavali ai.

Ia manatua, o le au makoi, na latou ofoina le auro, pulumuro ma le pululipano. O maa taua ma maa anagata. E taugofie. Ao le faailoga lea o le fai mea sili mo le Atua. *E ave mea lelei ma mea taugata ma le anagata mo le Alii. Ae a mai i tatou?*

Faamanatu: Ia ofo ma le loto atoa lau meaalofo mo Iesu

IA MANUIA LE KERISIMASI MA LE TAUSAGA FOU



**SUSUGA TOEAINA & FALETUA,
SUSUGA FAAFEAGAIGA & A'OM'O,
FAIA'OGA ASO SA & TA'ITA'I
AUTALAVOU.**

“O le viiga i le Atua i mea aupitoaluga; ma le manuia i le lalolagi i tagata ua alofagia e ia”

E momoli atu faamanuiaga o le Kerisimasi ma le Tausaga Fou, i le Ekalesia pele i le agaga. Ia manuia le alo atu i faiga tuuaga ma malologa, se'ia toe a'e i le alofa o le Lepe Faasola.

Alofaaga o le Matagaluega A'oa'oga Kerisiano